


明書

一〇





書

明

(十)

纂 麟 維 傳

明書卷五十二

志五

綸渙志二

建文皇帝

卽位詔

十八日詔赦天下。詔曰。天佑下民。作之君。我高祖皇帝受天之命。統有萬邦。宵衣旰食。宏濟斯民。凡事有益於天下者。無所不用其心。政教休明。規模宏遠。朕以眇躬。纂承大統。恭依遺詔。於洪武三十一年閏五月十六日。卽皇帝位。夙夜惶懼。思所以克相上帝。寵綏四方。以無忝我皇祖之大命。永惟寬猛之宜。誕布維新之政。其以明年正月初一日爲建文元年。大赦天下。嗚呼。德維善政。政在養民。當遵先聖之言。期致雍熙之盛。百辟卿士。體朕至懷。自洪武三十一年閏五月十八日昧爽以前。大辟罪以下。已發覺未發覺。已結正未結正。當赦所不原者。咸赦除之。敢有以赦前事相告。以其罪罪之。故茲詔示。想宜知悉。

追尊册立分封詔

詔曰。朕惟有盛德而不享其報者。必垂慶於後昆。履大位而不逮乎親者。必致尊於宗廟。此天下之至理。

古今之通義也。昔我太祖高皇帝平定天下，承千載之大統。皇考懿文皇太子蚤登儲位，參決萬幾，默施寬仁，陰贊至治，視斯民如赤子，體天眷之聖德，錫祐朕躬。太祖皇帝奄棄臣民，肆朕嗣登大位，既諡太祖爲高皇帝，孝慈皇后爲高皇后，而皇考諡號未稱，心切悼焉。邇者採羣臣之言，追尊皇考爲孝康皇帝，廟號興宗，皇妣敬妃爲孝康皇后，擇日祔廟。羣臣復謂中宮之號未正，無以共承祭祀，諸弟之封未定，無以夾輔邦家，繼以爲請。已冊妃馬氏爲皇后，封弟允燹爲吳王，允燾爲衡王，允熙爲徐王，夫尊親所以崇孝敬之道，正家所以厚風俗之原，嘉興萬方，同臻至治。

興師北伐詔

詔曰：朕奉先皇帝遺詔，纂承大統，宵旰衣食，思圖善政，以安兆民。豈意國家不幸，骨肉之親，屢謀僭逆。去年周庶人櫛，潛爲不軌，辭連燕齊湘三王，皆與同謀。朕以親親之故，不忍暴揚其惡，止治櫛罪，餘置不問。今年齊王禩謀逆事覺，推問犯者，又言與燕王棣、湘王柏同謀大逆。柏自知罪惡難逃，自焚死。禩已廢爲庶人。朕以燕王棣於親最近，未忍窮治其事。今棣乃忘祖逆天，稱兵構逆，意欲犯闕危宗祖，悖逆如此，孰不駭聞。昔先皇帝時，棣包藏禍心，爲日已久，印造僞鈔，陰結人心，朝命窮極，藏匿辜人。先帝因怒，遂以成疾。至於升遐，海內聞知，莫不痛忿。今不悔過，又造滔天之惡，雖欲赦之，而獲罪宗社，天地不容。已告太廟，廢爲庶人。遣長興侯耿炳文等率兵三十萬往討其罪。咨爾中外臣民軍士，各宜懷忠守義，奉職平燕，與國同心，永安至治。布告天下，咸使聞知。

改都察院爲御史府詔

詔曰。頃以斷獄繁。易御史臺號都察院。與刑部分治庶獄。今賴宗廟神靈。斷獄頗簡。其都察院承漢制爲御史府。專以糾貪殘。舉循良。匡政事。宣教化。爲職。省御史員。定爲二十八人。務爲忠厚。以底治平。

召勤王詔

詔曰。燕兵勢將犯闕。中外臣民。坐視余之困而不余救乎。凡文武吏士。宜卽日勤王。共除大難。宗社再安。余不敢忘報。

太宗文皇帝

卽位詔

詔曰。昔我皇父太祖高皇帝。龍飛淮町。汛掃區宇。東抵虞淵。西踰崑崙。南跨南交。北際潮海。仁風義聲。震盪六合。芻爽闇昧。咸際光明。三十年間。九有甯謐。宴駕之日。萬方嗟悼。煌煌功業。恢於湯武。德澤廣布。至仁彌流。姪允焮以幼沖之資。嗣守大業。秉心不孝。更改憲章。戕害諸王。放黜師保。崇信奸回。大興土木。天變於上。而不畏。地震於下。而不懼。災延承天。而文其過。蝗飛蔽天。而不修德。益乃委政宦官。淫泆無度。禍機四發。將及於朕。朕惟高皇帝嫡子。祖有明訓。朝無政臣。內有姦惡。王得與兵討之。朕遵奉條章。舉兵以清君側之惡。蓋出於不得已也。使朕兵不舉。天下亦將有聲罪而攻之者。允焮曾不反躬自責。肆行旅拒。荷蒙天地宗社之靈。戰勝攻克。擣之於垣上。殲之於白溝。破之於滄洲。瀆之於蕘城。塵之於夾河。矚之於

靈璧六戰已不國矣。朕於是駐師畿甸，索其姦回。庶希周公輔成之誼，而乃不究朕懷。闔宮自焚，以自絕於宗社。天地所不庇，鬼神所不容，事不可已。朕乃整師入京，秋毫無犯。諸王大臣謂朕太祖之嫡，應天順人。天位不可以久虛，神器不可以無主。上章勸進，朕拒之再三。爰乃俯徇輿情，已於六月十七日即皇帝位。於戲！文帝入漢，尙資恭儉之風。武王紹周，願廣至仁之化。布告天下，其體朕懷。洪武三十五年七月初一日。

大封功臣詔

詔曰：昔元末興兵，豪傑競起。割據土地，糜爛生民。天命我父皇太祖高皇帝龍飛淮甸，東征西討，掃除禍亂。華夷一統，身致太平。垂四十年，父皇賓天，建文嗣位。頑很昏昧，專任姦回。內作色荒，改更成憲。殘害宗親，將及朕躬。朕不得已起兵自救，身親戰陣，已經四載。賴天地祖宗之靈，遂平內難。爾諸奉天征討將士，臥雪眠霜，櫛風沐雨，百戰百勝，萬死一生。報太祖之深恩，弘濟艱難，宣力甚多。輔成大功，仰稽太祖皇帝開國功臣賞賜等第，參酌得宜。論功高下，定爾爵賞。朕不敢私，在爾諸將亦自知之。於戲！人君之職，惟在奉天。爵賞之頒，豈容私意。今以天下之財，賞天下之功。民之資力有限，名爵之貴無窮。故茲賚與，亦不以多少爲輕重。或朕知有未盡，未滿爾心。對朕自陳，若退有後言者，於犯法甚不可也。但恐爾不立功爾。今後果能立功，至再至三，不吝爵賞。朕之此言，通於天地，布告爾衆。咸使聞知。洪武三十五年九月初四日。

冊立皇后詔

詔曰。朕荷天地神靈。祖宗庇祐。繼承大統。華夏肅清。稽於古典。虞夏殷周之盛。亦資內助。以致雍熙。朕皇考太祖高皇帝肇修人紀。悼典庸禮。臻茲治平。薄海內外。室家相慶。功德兼隆。與天同運。亦惟皇妣孝慈高祖后效法承天。肅雍顯相。德配聖人。化家爲國。朕奉藩於燕。垂二十年。正妃徐氏。開國元勳。中山武甯王徐達之女。佐朕皇考。咸有一德。格于皇天。天惟申命。用休君臣。篤慶榮裕。始終毓茲貞淑。嬪于肇封。家政輯甯。朕恭行天討。無內顧之憂。厚德嘉禎。壺儀懿範。同朕恭勤。保茲天命。君臨爾萬姓之上。是用於洪武三十五年十一月十三日。命使奉金冊金寶。立徐氏爲皇后。正位中宮。恭承宗廟。布告天下。咸使聞知。洪武三十五年十一月十三日。

復封諸王詔

詔曰。仁義之推。施由親始。帝王之治。睦族爲先。歷觀往古。克洽太平。未有不由茲道也。昔朕皇考太祖高皇帝受天命。奄有萬方。隆厚親親。及於異姓。寰宇同風。誠悼孝友。乃遵古道。封建諸王。藩屏帝室。與國咸休。允攸無道。不孝不君。不恥不仁。不畏不義。滅絕天理。敗壞人倫。恣其狂悖。悖祖滅親。卽位三年。骨肉幾盡。周王奉藩。守法循理。匡輔朝廷。初無罪愆。忠不見信。以賢見疑。偏聽讒言。忽興師旅。籍其資財。空其宮室。害其宮屬。周王莫知其由。自來京師。欲伸枉屈。略不加察。卽竄之蠻夷萬里瘴癘之鄉。流離道路。父子殊方。幽囚苦困。穴牆通食。體無完衣。窮窘危辱。濱於死亡。誣構湘王。令其闔宮自焚。加以惡謚。執齊王於京邸。囚代王於大同。囚岷王於雲南。日夜所思。惟殘賊骨肉之計。不盡不廢。乃以懿文太子薨逝之時。

皇考欲立朕爲嗣。尤所猜忌。無覺可圖。聽信姦臣。縱兵害朕。朕不得已。舉兵自救。荷天地神明祖宗孚佑。皇考之靈。兵至畿甸。索其姦回。爇文自知。慚負天地。無顏相見。自焚而死。諸王臣民。尊朕爲皇帝。重念骨肉之親。良深存沒之感。是用復封周王於河南。齊王於青州。湘王賜諡曰獻。治其墳廟。代王岷王皆脫拘囚。還其封爵。秦愨王之子尙炳封爲興平王。尙烜爲永壽王。尙忻爲安定王。晉恭王之子濟曠爲平陽王。濟熯爲廣昌王。周王長子有燉復爲周世子。次子有勳封爲汝南王。有烜爲順陽王。有熯爲祥符王。有熿爲新安王。有光爲永甯王。有煬爲汝陽王。有曠爲鎮平王。有焮爲宜陽王。齊王之子賢燧爲樂安王。賢煖爲長山王。賢窈爲平陽王。於戲。天有顯道。厥類爲彰。善惡之應。捷於影響。皇考重分封之意。允爇絕骨肉之恩。不孝違天。天命殛之。今朕奉天。復遵舊制。藩屏宗親。期百世本支之盛。山河帶礪。資萬年磐石之安。布告天下。咸使聞知。永樂元年正月十三日。

改諡高帝后詔

詔曰。朕惟帝王盛德。皆因實以著名。達孝尊親。必揚名而顯實。此放勳重華所以贊堯舜。而宣哲於皇所以頌文武也。洪惟朕皇考皇帝聰明神武。峻德格天。至誠膺合於乾剛。光大實侔於坤厚。固天縱之至聖。應麻數之在躬。當元運之訖祿。四海紛紜。強暴相凌。生民塗炭。憫墊溺之莫拯。奮一劍以龍興。曾無寸土一民之階。自有英雄萬國之會。汛掃塵氛。奠安寰宇。不數載而成帝業。乃一舉而治太平。制禮作樂。典章煥乎重新。用夏變夷。人文蔚其宣著。卽東西際日月之出沒。南北極寒暑之幽遐。咸蒙覆幬。均被沾濡。四

十餘年。德教洋溢。淳風熙皞。自生民以來。未有盛於皇考皇帝者也。皇妣孝慈皇后。齊莊懿淑。恭儉仁孝。誕符景運。作配至尊。弘濟艱難。化家爲國。盡其誠敬之心。以奉神靈之統。輔成內治。表著母儀。極天下之富貴。曾何加乎其身。躬蠶以桑爲常。服澣濯不爲異。有樛木逮下之德。致螽斯多男之祥。雖嬀汭嬪虞。塗山啓夏。有娥肇殷。擊任興周。蹟同開創。實莫與京。自古后妃。未有盛於皇妣孝慈皇后者也。仰惟二聖之鴻休。允合兩儀之大德。日月于邁。深切孝思。念名號未稱乎功德。典禮必在於尊崇。考諸經史之文。尤重尊親之謚。迺者下詔廷臣。上定尊謚。衆心戴慕。輿議僉同。皇考尊謚聖神文武欽明啓運峻德成功統天大孝高皇帝。廟號太祖。皇妣尊謚孝慈昭憲至仁文德承天順聖高皇后。告於天地宗社。以六月十一日。恭上册寶於戲。顯號鴻名。永協臣民之公論。配天享祀。用伸人子之至情。光華宇宙。垂裕萬年。布告天下。咸使聞知。永樂元年六月十二日。

册立太子詔

詔曰。立太子以尊宗廟。重社稷。樹王國以廣藩輔。隆本支非一家之私。爲天下之公。夏商周漢唐宋之盛。用此道也。朕皇考聖神文武欽明啓運峻德成功統天大孝高皇帝。皇妣孝慈昭憲至仁文德承天順聖高皇后。聖靈陟降。敷佑朕躬。君臨大寶。夙夜靡甯。思惟賢德。傳敍維成。繼續神明之統紀。益爲皇考妣之光華。監官簡俾。延歷於茲。周王以宗室之長。屢表請立太子。封建諸王宗室。羣臣百姓合辭累表。謂朕長子足以嗣承宗廟。諸子皆足以夾輔邦家。朕惟天下之通義。詢衆志之僉同。乃於永樂二年四月初四日。

立長子高熾爲皇太子。授冊寶正位。於戲。治法前王。統承列聖。內外相維。保宗社萬年之福。華夷同樂。亘古今全盛之基。布告天下。咸使聞知。永樂二年四月初四日。

免北京錢糧詔

詔曰。朕祇承天命。統紹鴻基。安民之心。不忘夙夕。思昔姦臣。謀危宗社。毒害親親。奉藩於燕。橫遭讒間。禍機四發。興兵圍逼。危迫朕躬。實不得已。用兵自救。誅討姦回。以平內難。當時朕帥將士南征。躬擐甲冑。臥雪眠霜。間關行陣。衝冒鋒鏑。乘危轉逸。萬死一生。諸將士與朕同甘苦。勤勞尤甚。時皇太子居守北京。賴軍民竭忠効力。不避艱難。供給軍需。饋運糧餉。馳驅負輓。晝夜不甯。攻守戰鬪。披堅執銳。冒犯矢石。父母妻子。不保朝夕。甚爲勞苦。使朕無北顧之憂。遂誅姦回。定平禍亂。奠安宗社。朕自卽位以來。念爾將士人。民飲食夢寐。時刻不忘。其間民有效順。始終不變者。已嘗全免稅糧。以酬其勞。比年之間。北京所屬郡縣。數被水患。歲穀不登。民多缺食。流移他所。朕甚憫焉。其北京永樂四年五年所有該納稅糧馬草折收米豆戶口食鹽價米諸色課程。邇未納者。盡行蠲免。其諸色課程。仍自永樂六年爲始。除見收在官外。免徵三年。門攤課程三年。免徵後革去增加之數。只依舊額供辦。於戲。同濟艱難。久念勤勞之績。憫茲窮乏。覃敷寬恤之恩。庶俾康寧。少伸朕意。故茲詔諭。咸使聞知。永樂六年二月十八日。

親征北虜詔

詔曰。朕受天命。承太祖高皇帝洪基。統馭萬方。撫輯庶類。四夷僻遠。靡不從化。獨北虜殘孽。處於荒裔。肆

驍兇暴。屢遣使臣開諭。輒拘留殺戮。乃者其人犯邊。邊將獲之。再遣使護送。復見拘殺。恩既過背。德豈可懷。況豺狼野心。貪悍猾賊。虐噬其衆。引領後蘇。稽於天道。則其運已絕。驗於人事。則彼衆皆離。朕今親率六軍往征之。大振武威。用彰天討。且朕必勝之道有五。以大擊小。以順取逆。以治攻亂。以逸代勞。以悅弔怒。鮮不殘絕。蕩除有罪。掃清沙漠。撫綏顛連。則疆場久安。人民無轉輸之苦。將士無饑寒戰鬪之虞。可以解甲高枕。一勞久逸。暫費永寧也。布告中外。咸使聞知。永樂八年二月初四日。

平虜第一詔

詔曰。自元祚旣終。四海鼎沸。天命我太祖高皇帝。統一華夏。普天率土。靡不臣妾。惟虜寇遺孽。奔竄沙漠。皆窟偷生。殺戮易置。有如反掌。朕承大統。撫治寰區。志在安民。惟懷不及。盡心殫慮。以求其寧。凡居覆轡之中。舉納甄陶之內。獨此殘胡。驍兇硬化。屢使撫循。輒見拘殺。往者邊將擒其部屬。念其各有父母妻子。盡釋還鄉。遣使送之。彼狡性不移。復殺信使。積慝恣虐。益肆寇攘。怨慙神人。實天所殛。遏虐之旅。以慰後蘇。遂親率六軍往征之。用拯顛連。綏寧降附。五月十三日。師至幹難河。遇胡寇本雅失理來戰。卽摧敗之。追奔逐北。電掃霆驅。本雅失理奔命不暇。以七騎奔遁。獲馬駝牛羊生口無算。其餘款附者相繼而至。遂撫安之。給其羊馬糧廩。令各安生業。數百種之。拊芽。一旦蕩除。千萬里之腥羶。由茲洒滌。乃封於山川。振旅班師。於戲。包舉無外。弘施一視之仁。撫輯有方。永樂萬年之治。布告中外。咸使聞知。永樂八年五月二十日。

平虜第二詔

詔曰。朕祇奉天命。撫馭華夷。惟欲乂安。咸得其所。瓦剌黠寇。僻處窮荒。與其醜類。歲在讐殺。敗亡喪沒。存者無幾。朕卽位之初。撫摩存恤。授以封爵。數年以來。憑仗朝廷。始得休息。烏合爲羣。卽復驕恣。辜德負恩。背違信義。擅自弑立。執殺使臣。侵擾邊境。天豕封狼。貪欲無厭。覬覦自大。朕不得已。躬率六軍。以討之。師至撒里哈兒之地。賊兵來迎戰。一鼓而敗之。追至土刺河。賊首答里巴、馬哈木、太平、把禿孛羅。不度智能。掃境而來。兵刃纒交。如摧枯振朽。追奔逐北。獸獮禽戮。殺其名王以下數千人。斬馘無算。餘孽宵遁。遂班師而還。歸至飲馬河。和寧王阿魯台遣其酋長率衆詣軍門來朝。推誠待納。以安反側。勞徠撫輯。令回部落。於戲。奉行天罰。掃腥羶於絕塞。綏寧附順。覃恩澤於遠人。俾中國免征輸之勞。邊邑無烽埃之警。故茲詔示。咸使聞知。永樂十二年六月二十八日。

北京御殿詔

詔曰。開基創業。興王之本爲先。繼體守成。經國之宜尤重。昔朕皇考太祖高皇帝受天明命。君主華夷。創立江左。以肇邦基。肆朕纘承大統。恢弘鴻業。惟懷永圖。眷茲北京。實爲都會。地勢雄偉。山川鞏固。四方萬國。道理適均。惟天意之所屬。實卜筮之攸同。乃倣古制。徇輿情。立兩京。置郊社宗祖。創建宮室。上以紹皇考太祖高皇帝之先志。下以開子孫萬世之弘規。且於巡狩駐守。實有便焉。爰自營建以來。天下軍民樂於趨事。天人協贊。景貺駢臻。今工已告成。選以永樂十九年正月朔旦。御奉天殿朝百官。誕新治理。用致

雍熙於戲。天地清寧。衍宗社萬年之福。華夷綏靖。隆古今全盛之基。故茲詔。皇帝敕諭文武羣臣。朕聞爲君難。爲臣不易。創業難。守成不易。剛柔寬猛。適其中。禮樂刑政。有其序。唐虞三代。至漢唐宋。率由斯道。是故舜清問下民。報虐以威。誅四凶。聖讒說。明五刑。然後無爲。恭己南面。神禹承之。無間可議。夏桀之亂。民從其暴。成湯之興。兼弱攻昧。取亂侮亡。肇修人紀。用革愆淫。旣奠四方。子孫承之。惟監成憲。殷紂之亂。商俗靡靡。周公相武王。誅紂伐奄。遷殷頑民。滅國五十。繼相成王。制禮作樂。垂拱仰成。刑措不用。漢承秦大亂之後。高祖令蕭何定律令。韓信伸軍法。張蒼定章程。法令嚴明。惠帝清淨。至於文景。挾書之律。肉刑之慘。一切除之。務行寬厚。唐承隋末。詔諛汰侈。暴慢成風。高祖定官制。頒律令。立租庸調法。汰僧道。勳臣犯法。無所假貸。太祖貞觀之後。懲斬趾。禁鞭背。刪定律令。變爲輕典。力行仁義。幾致刑措。宋興承五季之亂。太祖太宗。頗用重刑。以繩姦慝。躬自折獄。務抵明慎。立法之制。嚴示威使。聞知永樂十八年十一月初四日。

北京宮殿成大赦詔

詔曰。朕荷天地祖宗眷祐。繼承大統。撫馭萬方。夙夜祇勤。率遵成憲。乃者紹皇考太祖高皇帝之制。效成周卜洛之規。建立兩京。爲子孫帝王萬世之基。爰自經營以來。賴天下臣民殫竭心力。涉寒暑。冒風霜。趨事赴工。勤勞匪懈。朕心眷念。拳切不忘。今宮殿告成。朕已御正朝。祇祀天地宗廟社稷。懋圖治理。嘉興維新。重懷寬恤之仁。用廣好生之德。大赦天下。於戲。華夷一統。覃敷曠蕩之恩。海宇清寧。永樂太平之治。故

茲詔示。咸使聞知。永樂十九年正月十五日。

奉天殿災詔

詔曰。朕恭膺天命。統馭華夷。夙夜祇勤。罔敢忽怠。比者遵做古制。肇建兩京。惟在安民。永隆基業。乃永樂十九年四月初八日。奉天殿災。朕爲此懼。莫究所由。此朕不德之所致歟。抑任用匪人。毒痛天下。而致此歟。今特詔告天下。凡有殃及於吾民。及不急之務。悉皆停止。用蘇困弊。以答天心。於戲。奉天法祖。敢忘修省之誠。布德覃恩。用舉寬仁之政。故茲詔示。咸使聞知。永樂十九年四月十三日。

平虜第三詔

詔曰。天地之大。覆載而無外。帝王之治。一視而同仁。朕恭膺天命。主宰華夷。夙夜勤勞。勉圖治理。無非使天下生靈。咸得其所而已。往者醜虜阿魯台。窮居漠北。鼠穴偷生。屢爲瓦剌困逼。妻子不保。遂率其部落來歸。朕念其遑遑無依。特加優恤。授以封爵。令其仍居本土。安生樂業。永享太平。豈意北虜心懷譎詐。僭妄驕矜。違天逆命。負德辜恩。殺戮信使。侵犯邊境。恣肆慘酷。毒痛生靈。朕以保愛天下軍民。躬率六師。往討之。以七月十四日。師抵闊樂海之北。其醜虜阿魯台。聞風震懼。棄其車輛牛羊馬匹。逃命遠遁。躬追累日。獲其謀者云。醜虜阿魯台。自知負德辜恩。驚悸失措。致病疴羸。爲天地鬼神所殛。餘孽潰敗。朕乃移兵勦捕其惡黨兀良答之寇。東行至屈裂兒河。逼寇迎敵。朕親率前鋒摧敗之。直抵其巢穴。殺賊首數十人。斬馘其餘黨無算。獲其部落人口。焚其車輛兵器。盡收其馬匹牛羊。綏撫降附。振旅班師。嗚呼。聲罪致討。

用伸九伐之威。殄寇安民。永樂萬年之治。布告中外。咸使聞知。永樂二十年八月十七日。

勝虜第四詔

詔曰。朕恭膺天命。統承皇考太祖高皇帝鴻業。夙夜究治。惟懷永圖。比以天虜殘孽。辜恩負德。梗化弗廷。乃以今夏四月四日。躬御六師往討之。師駐應昌。前鋒獲虜聲息。詢悉孽虜去秋探知大軍出塞。卽挾妻子遠竄山谷。圖保殘喘。至冬又爲天地鬼神所譴。雨雪連綿。積深尋丈。其牛羊騾馬。亡弊殆盡。種落叛散。互相劫奪。及今又聞大軍之初。日夜奔遁。深入漠北。窮蹙困迫。莫克自知。朕以爲此寇譎詐。未可深信。徑進兵至答間納木兒河。窮摻極索。直抵白邨山。四望蕭條。曠無人跡。遂移師東行。踰屈裂兒河。復涉溥溫河。擣賊孽黨。閱其巢穴。悉已傾蕩。耕牧之地。盡爲荒墟。是用班師還京。於戲。征伐國之重事。昔高宗之伐鬼方。周宣之逐玁狁。豈其得已哉。然皆爲保庇生靈。規國遠圖。是以徂征之師。不容不舉。今妖氛汎掃。沙漠肅清。豈惟朕之威力所及。實賴宗社之靈。天心眷佑。永貽四海蒼生無窮之福。故茲詔示。咸使聞知。永樂二十一年七月十五日。

封忠勇王詔

詔曰。朕惟天地覆載。以生育爲德。帝王統馭。以安養爲心。順者撫之。逆者摧之。所以示無外而一天下也。且夷狄爲患。其來已久。書曰。蠻夷猾夏。詩稱戎狄是膺。歷漢及唐。屢被侵侮。至於有宋。其禍尤甚。是以腥穢上聞。天生我皇。考太祖高皇帝受天命。主宰生靈。削平禍亂。掃蕩腥羶。以開萬萬年太平之盛治。聖

德成功。自開關以來。未之有也。肆朕躬膺天命。紹承大統。夙夜圖治。惟在安民。蕞爾醜虜。尙敢偷生草野。鼠竊邊疆。已嘗躬率六師往平之。芟除惡類。撫輯善良。令其仍居本土。以遂其生。不意其違天背德。叛服無常。復來犯我邊疆。乃以今秋七月二十四日。朕躬御戎服。親率將士出塞以討之。乃命寧陽侯陳懋爲前鋒以攻其西。朕兵抵陰山之脊。適虜中僞知院阿失鐵木兒等率妻子來降。備言虜寇爲瓦剌順寧王脫歡等勦戮。餘孽奔潰。逃命無所。未幾前鋒寧陽侯陳懋又得其名王也先土于率部落及其家屬馬驢牛羊以數萬計。遠來降附。然也先土于驕悍勇猛。乃虜寇中之最狡黠者。虜共畏服。今旣稽首軍門。敷陳誠悃。以爲天命在朕。不敢違越。敬率部落。上順天道。親來朝見。眷茲忠誠。宜加撫勞。特封爲忠勇王。以表其來歸之心。是用班師還京。於戲。安夏攘夷。用致雍熙之治。綏降撫順。廣推一視之仁。詔告中外。咸使聞知。永樂二十一年十月十三日。

仁宗昭皇帝

卽位詔

詔曰。朕惟上天生民。爰立君主。仁育兆庶。咸底於泰和。統御華夷。同躋於熙皞。我先皇帝奉天撫運。治化高於百王。文德武功。聲教被於四海。比緣邊警。塵龍御以親征。逮及凱旋。竟鼎湖之升逝。遺命神器。付予眇躬。顧哀疚之方深。豈遵承之遽忍。宗親公侯駙馬。伯文武臣僚軍民耆老。及四夷朝貢之使。俯伏闕下。奉表勸進。以爲天位不可以久虛。生民不可以無主。長嫡承統。國家常經。陳詞再三。瀝懇勤切。用是仰遵

遺命俯徇輿情。已於八月十五日祇告天地宗廟社稷。卽皇帝位。奉祖考之洪佑。仰聖神之永圖。屬茲蒞祚之初。宣布維新之命。其以明年爲洪熙元年。於戲。軍民一體。愛人必務。於寬弘。賞罰有經。爲國必彰。於明信。尙賴文武賢卿。中外良臣。據乃忠貞。匡輔不逮。用承鴻業。隆國家永遠之基。嘉惠羣黎。廣海宇治平之福。敷告天下。咸使聞知。永樂二十二年八月十五日。

上諡號詔

詔曰。朕惟自古聖君哲后。有大功有大德者。必有顯號徽稱。以表揚鴻美。垂萬萬年。欽惟皇考大行皇帝。躬膺天命。統御兆民。制治保邦。隆繼述之大孝。篤近舉遠。同覆載之至仁。神武弘廓。清之功。聖文廣輯。熙之化。天地宗社享於上。華夷蠻貊戴於下。輿圖克拓。曠古所無。泰和融液。嘉徵畢至。海宇乂寧。臻於熙皞。欽惟皇妣仁孝皇后。德熙九聖。上配宸嚴。至順以承天。厚德以載物。含弘光大。端一誠莊。隆化理之原。篤宗祧之敬。宣昭懿範。母儀天下。神遊益遠。哀慕無窮。屬茲繼敘之初。式舉尊崇之典。謹命文武羣臣。稽古禮文。議薦諡號。大公之義。輿論僉同。祇告天地宗廟社稷。恭上皇考大行皇帝尊諡體天弘道高明廣運聖武神功純仁至孝文皇帝。廟號太宗。皇妣仁孝皇后尊諡仁孝慈懿誠明莊獻配天齊聖文皇后。於戲。惟神聖配乾坤。蓋名言之莫罄。惟光華同日月。著尊仰於不忘。敷告臣民。咸使聞知。永樂二十二年九月初十日。

立太子封諸王詔

詔曰。朕惟致理必先正內。所以崇王化之基。承統必重建儲。所以厚國家之本。迺若衆建宗室。式以永壯藩維。帝王大經。典章斯在。朕祇承天敍。君主萬邦。顧茲臨御之初。方布維新之治。念德澤之未究。竟夙夜之靡寧。而親王勳臣。文武百辟。志存愛國。咸懷永圖。屢表摠誠。請立皇后。建皇太子。稽率舊章。勉徇衆志。已於十月初八日。册立妃張氏爲皇后。十一月立嫡長子瞻基爲皇太子。封諸子爲王。於戲。惇敍彞倫。自家邦以達乎天下。鞏固宗社。隆本支以傳於萬年。用弘仁厚之風。永協雍熙之化。布告天下。咸使聞知。永樂二十二年十月十八日。

宥盜詔

詔曰。朕以眇躬。托於億兆之上。天下治亂。實係於朕。懼德不類。罔敢怠荒。兢兢業業。日慎一日。兩紀於今矣。然繇頃者。任用輔相。委寄過隆。顯權生事。以紛亂我祖宗之成憲。兼以所在牧守。撫字無狀。以故澤靡下究。情不上通。事旣雍塞。人懷疑阻。遂致賊盜相挺。以興。蓋自兩河兩淮。而西接於閩陝。荆湖二江。二浙而南。底於閩粵嶺海。大憝小醜。實繁有徒。戕殘我人民。蹂躪我疆土。甚者竊據城邑。僭稱號名。兵連累年。怨氣凝結。生靈塗炭。閭井邱墟。國家百年亨育之功。一旦蕩然。興言及此。深用愧悼。靖思厥咎。罪實在朕。念茲庶民。皆我赤子。朕旣不德。不能盡君人之責。使惑於煽誘。以陷於匪人。苟究武威。必示諸討。而不開以自新。雖欲政行爲善。厥路亡繇。是重朕不德也。朕方願與民更始。其獨安取此。屈己弘物。朕所不吝。自今爲始。應凡盜賊。不分首從。苟從招安。卽與原貸。非特待之以不死。尊爵厚祿。頒賞有差。於戲。古人有言。

亂匪降自天。人則爲之。抑生人何辜。非朕之不德。無以至此。天怨於上。人怨於下。顧惟菲薄。敢昧罪己。凡爾將帥。尙咸諭朕意。殺降戮順。厥有重罰。務在綏輯。以圖底於康寧。用副朕思慝之誠。廣朕好生之德。朕言不爽。其明聽毋忽。永樂元年月日。

勉羣臣詔

詔曰。朕承積累之體。撫盈成之運。臨御歲久。望治日深。永爲前世之相沿。各有當時之所尙。三代而上。忠樸質文之累更。兩漢以來。名節經術之異守。或清淡之爲務。或道學以相師。便以相循。莫不久而成蔽。昧於張弛。弗知變而後通。爰暨我朝。所鑒往代。然當法制之肇建。實惟更議之首遵。小紀大綱。罔有條而不紊。前規後矩。乃量一之是拘。凡利害之所存。必章程以爲據。咸樂相仍於苟且。靡圖自獻於猷爲。頃繇邇臣之蔽予。益使正塗之壅底。持祿者口囊而拱默。懷姦者首鼠而依違。蔑蹇蹇之匪躬。慕容容之後福。幾致防川之患。寢成罔上之風。覽習俗之至斯。嗟治體之已累。朕當饋而歎。反席以思。仰祖宗之貽謀。本崇於信厚。故國家之作則。首務於整齊。勢無不弊之時。道有好還之理。咨予三事羣牧。暨爾衆僚庶士。勉罄忠純。各思勵翼。毋牽於忌諱。言必由衷。毋略於幾微。謀須慮遠。共懲膠柱爲固滯。庶求解弦而更張。畢殫獻替之誠。允濟艱難之業。今以爲始。朕以改圖。綜核名實之詳。繼口宣之遺則。推行仁義而效。緝唐后之餘風。期臻三代之隆。永有萬年之譽。朕言匪過。衆聽敢違。永樂年月日。

躬祀南郊詔

詔曰。朕惟君國之道。事天爲大。事天之實。恤民爲本。我國家聖聖相承。太祖高皇帝紹基垂統。弘靖萬邦。太宗文皇帝繼志守成。德威廣被。天下無事。生民乂安。六十年於今矣。是皆天地祐祚之隆。祖宗功德之盛。肆及眇躬。獲承鴻緒。嗣位以來。夙夜祇愼。上惟天命之重。下念生民之艱。式嚴昭事。庶臻康濟。謹於今年正月十五日。恭祀天地於南郊。股肱助相。羣工駿奔。三靈交悅。百順介祥。嘉與臣民。均膺慶澤。於戲。郊禋致誠。所以仰答靈貺。陽春布德。所以順體乾元。迎導至和。發育庶品。尙資有位。咸懋乃官。推其仁愛之誠。輔我太平之治。詔告中外。咸使聞知。洪熙元年正月十五日。

恤刑詔

詔曰。朕恭承大統。爲天下生民之主。惟我皇祖皇考愛民之仁。祇率不怠。旦夕思念人命甚重。哀矜庶獄。惓惓在懷。夫刑以禁暴止邪。導民於善。豈專務誅殺哉。故律令之制。善善長而惡惡短。罰之輕重。咸適厥中。顧執法之吏。不能革平。有虛飾其情。專致死罪。而比附謬妄。尤甚柱人。朕甚憫之。夫五刑之條。莫甚大辟。大辟之施。身首異處。斯已極矣。自今有犯死罪律該凌遲者。依律科決。其餘死罪。止於斬絞。法司並不許牽合傳會。昧情失實。以致冤濫。若朕一時過於嫉惡。律外用籍沒及凌遲之刑。法司再三執奏。三奏不允。至於五奏。五奏不允。同三公及大臣執奏。必允乃已。永爲定制。文武諸司。自今亦不許恣肆暴酷。於法外用鞭背等刑。以傷人命。尤不許用宮刑。絕人嗣續。有自宮者。以不孝論。且人之爲非。固有父子不相爲謀者。肆虞舜爲君。罰弗及嗣。文王之世。罪人不孥。自今惟犯謀反大逆者。依律連坐。其餘有罪。止坐本身。

毋得一概處以連坐之法。古之盛世，恆采民言，用資戒警。今兇險之徒，往往撻拾，誣爲誹謗。法吏刻深，鍛鍊成獄。刑之失中，民則無措。今後但有告誹謗者，一切勿治。爾中外文武羣臣，宜端乃志，悉乃心，畏天愛人，務從寬恕。庶有以佐朕父母斯民之治。或有違者，必罰不貸。敷告天下，咸使聞知。洪熙元年三月十五日。

免稅糧詔

詔曰：朕承大統，主宰天下，上惟天命之重，下念生民之難。夙夜憂勞，惟恐一夫不得其所。屢詔求言，冀達民隱。而山東諸郡及淮安徐州之境，頻歲旱潦，年穀無收。民有乏於衣食，父母妻子不得相濟，凍餒呻吟，流於道路。郡縣之官，漠不留意，而又有科買之擾，豈稱爲民父母之道哉！可全免今年夏稅，其秋糧減半徵收。自今年四月以前，各衙門一應收買及科派物件，除桑穰仍納外，其餘未到官者，盡行停罷。已到官者，從實起解，不許欺隱。若實無見物而先已虛報在官者，亦不許再科於民，以足其數。虛報之罪，俱宥不問。其郡縣之官，務盡撫輯安養之宜，毋縱貪利以重困之。庶幾副朕憫恤黎元之意。故茲詔示，咸使聞知。洪熙元年四月初三日。

明書卷五十三

志五

綸渙志三

宣宗章皇帝

卽位詔

詔曰。洪惟天眷國家。茂隆景運。肇自太祖高皇帝。聖神文武。提一旅之衆。建萬世之業。太宗文皇帝。神功聖德。載安宗社。弘靖萬邦。皇考大行皇帝。紹承大統。奉天子民。體祖宗之至仁。用輯寧於庶類。自臨寶位。夙夜勤勞。甫及踰年。德澤覃霈。不幸違豫。奄臻大漸。顧命神器。付予眇躬。哀慟方殷。罔知攸措。親王文武羣臣。下至耆老軍民。藩夷朝使。萬衆一誠。累表勸進。辭拒不獲。仰惟列聖創守之難。俯徇輿情。已於六月十二日。祇告天地宗廟社稷。卽皇帝位。爲政所重。以德及人。其改明年爲宣德元年。大赦天下。咸與維新。於戲。三聖在天。制治保邦。大經大法。明照日月。垂憲萬年。惟篤欽承。必誠必信。尙賴宗室親王叔祖父。協心藩屏。鞏固國家。暨中外文武賢臣。同德匡輔。用臻至理。弘建宗社。生民悠久之福。詔告天下。咸使聞知。洪熙元年六月十五日。

上諡號詔

詔曰。朕惟聖神之道。不可以名言。功德之隆。必形諸贊述。是以皇有義農之號。帝有堯舜之稱。國之典常。古今一揆。恭惟皇考大行皇帝。稟睿聖之資。備明誠之德。正位儲宮。二十餘年。至孝通於神明。令聞孚於遠邇。嗣登大寶。寅奉鴻圖。體天之心。弘敷惠澤。普昭蘇於萬彙。煥寰宇之一新。致理興化。惇尚文雅。慎修武事。四境無虞。天下歸仁。安於熙皞。不幸踰歲。奄棄大寶。四海臣民。如喪厥考。嗟予罔極之慟。屬茲繼統之初。諒陰敬承之心。敢後追崇之典。謹命在廷文武羣臣。稽古禮文。議薦諡號。至公之道。衆論攸同。乃於七月初二日。祇告天地宗廟社稷。奉冊寶。恭上皇考大行皇帝尊諡。敬天體道純誠至德弘文欽武章聖達孝昭皇帝。廟號仁宗。嗚呼。配天惟德。尊親惟孝。光華宣著於萬年。繼述尙存於後世。布告中外。咸使聞知。洪熙元年七月初三日。

上皇太后徽號詔

詔曰。仁政之務。親親爲先。禮典所崇。尊尊爲大。朕續承鴻業。君臨兆庶。肆用惇於孝理。爰肇正於化原。恭惟聖母輔翼先朝。昭明內政。弘六宮之壺範。表四海之母儀。深仁厚德。施及眇躬。隆鞠育之恩。廣訓迪之道。劬勞備至。以底成立。茲方奉天下之至養。則必極天下之尊稱。謹上皇太后。乃若宗廟之祀。禮重相成。德化之行。始於夫婦。用稽國典。冊妃胡氏爲皇后。夫國之本在家。允屬彝倫之重。上以厚率下。庶臻至理之隆。布告中外。咸使聞知。洪熙元年七月十五日。

平漢王詔

詔曰。我祖宗開創洪業。封建親藩。所以鞏固國家。永安宗社。朕以天敍。嗣承大統。惇厚親親。至於漢王高煦。事以叔父。未嘗違禮。天地神明。所共臨鑒。而彼包蓄禍心。積有年歲。昔我皇祖太宗皇帝。覺其潛懷異圖。削兩護衛。徙置樂安州。皇考仁宗皇帝。友愛之誠。比隆虞舜。而乃忘背大恩。以德爲怨。今者無故招聚無賴。授以兵器。驅掠良民。塚充軍士。搶奪官民馬匹。擅放有司。監繫強盜。縱其爲惡。給與賞賜。暗結都司官及軍衛有司官吏生員人等。賞與金銀等物。除指揮王斌知州朱恆等爲太師都督尙書等官。其餘各授一職。散刀與真定等衛軍官爲號。潛結北京官員軍民。俾爲內應。其他姦謀。不可枚舉。遂致北京官員軍民山東三司衛府州縣等衙門官吏人等。及其護衛親信軍校。并被害軍民五百餘人。奏發其事。朕以至親。初未之信。及差百戶陳剛齋本至京。誣罔先帝。爰及朕躬。假此弄兵。聲言犯闕。及究多人之言。具有成跡。實欲妄覬天位。謀危社稷。流毒生靈。春秋之法。人臣無將。將則必誅。其不軌如此。罪奚可容。朕以祖宗付託之重。國家生民之計。不得已親率六師。往問其罪。兵臨其境。尙擁烏合之衆。敢行抗拒。賴天地眷祐。宗社之靈。罪人斯得。朕以親親之故。不忍棄絕。令同宮眷。居於北京。以全始終之恩。其餘同惡者。明正典刑。協從者。咸釋不問。今已班師於戲。管叔流言。成周致辟。淮南作孽。自闕其躬。大義不私於所親。至仁尙從於寬典。詔告中外。咸使聞知。

征虜大勝詔

詔曰。恭天撫民。固無華夷遠邇之間。除殘去暴。本於帝王仁義之心。故拔稂莠。所以植苗。而斬蛇虺。爲其傷物。惡惡善善。明聖所同。朕嗣宗祖之洪圖。主萬邦之兆庶。志存康濟。夙夜惟勤。比以胡虜。嘗爲邊患。爰於農隙。躬歷疆陲。飭勵將士。嚴固防守。九月初二日。駐師石門。遽得邊報。胡寇庶萬南侵。豕突獸奔。已迫近境。朕躬率鐵騎三千。馳赴之。將士比力。協心咸奮。一當百戰。馘虜首萬餘級。擒其酋長百餘人。徑其巢穴。盡獲其人口兵器馬匹牛羊輜重。不可勝計。腥羶蕩滌。邊境肅清。遂班師振旅。於戲。稔惡弗戢。醜虜何道。於天誅。武威載揚。嘉兵豈予之所志。庶幾攘夷之績。用副保民之心。詔告中外。咸使聞知。宣德二年九月十五日。

皇太子肇生詔

詔曰。朕以菲德。祇膺鴻圖。惟祖宗創業之艱難。惟今日守成之匪易。致勤夙夜。罔敢怠寧。億兆之繁。殫心於和輯。宗社之重。永念於繼承。善慶有源。祥應茲協。陽德初復。長子肇生。家邦之本攸隆。中外之心咸屬。宜施惠澤。覃被多方。今大赦天下。於戲。承序以長。用昭萬世之傳。推德及人。弘敷四海之福。故茲詔諭。咸使聞知。宣德二年十一月十五日。

冊立皇太子詔

詔曰。朕承天序。祇奉寶圖。惟祖宗積慶之隆。衍本支於至盛。惟帝王統理之道。建儲子以爲先。長子祈鎮。日表英明。天資端重。比者親王文武羣臣。合誠奉表。請立東宮。於再於三。言之切至。朕恭承皇太后聖諭。

國家大經。宜循衆議。今以冊寶立祈鎮爲皇太子。夫重建元良。所以垂萬年之統。豫定國本。所以係天下之心。詔告臣民。咸使聞知。宣德三年二月初六日。

當春優恤第一詔

詔曰。朕恭膺天命。嗣承祖宗洪業。夙夜孜孜。保民圖治。每食則思下人之饑。每衣則思下人之寒。心存民瘼。未嘗忘之。今春氣已和。時頒寬恤之令。條示於後。其速行之。爾六卿大臣與國同體。爲國爲民。務盡乃心。如政令有所未當。朕慮有所未周者。尙審思列奏。都御史任耳目之寄。亦宜博訪以聞。庶副朕恤民之意。欽哉。故諭。宣德五年二月二十二日。

當春優恤第二詔

朕以菲德。恭承天命。嗣祖宗之大統。夙夜惓惓。思付託之重。夫君國之道。保民爲要。當春時和。萬物發生。顧念兵民。有未得所。祇體造化之仁。爰敷懷保之政。庶幾下人蒙福。而有以仰答天與祖宗之心。凡爾羣臣。宜同朕志。令行庶務。勉務欽承。故諭。宣德七年月日。

省災寬恤詔

詔曰。朕以菲德。恭嗣天位。統御兆民。夙夜惓惓。圖惟安利。今畿內及河南山東山西並奏。自春及夏。雨澤不降。人民饑窘。朕甚惻焉。夫上天降災。厥有攸自。其政事之有闕歟。刑罰之失中歟。徵斂之頻繁歟。撫字之不得人歟。永念其故。內疚於心。思惟感通之道。必廣寬恤之仁。庶天鑒之。旋災爲福。宣德八年四月十

五日。

英宗睿皇帝

卽位詔

詔曰。我國家膺天明命。統理華夷。奄旬萬姓。於茲七十餘年。仰惟祖宗肇造之功。守成之道。規模弘遠。昭示萬年。惟我皇考皇帝。以至仁大德。統承之。率循憲章。恢弘正化。方期家國永底雍熙。不幸奄茲遐棄。肆予眇躬。祇奉遺命。於宣德十年正月初十日。卽皇帝位。付畀攸重。兢惕惟慄。允惟神天之典。惟敬斯承。生民之重。惟仁斯保。阜成之績。惟勤惟儉。乃克有成。顧予涼薄。勉懷永固。尙賴親王宗室。益修藩屏。中外文武羣臣。宣力效忱。以副委任。以惠我蒼生。用臻富庶。躋於太和。其以明年爲正統元年。與天下更新。嗚呼。自古生民獲福。咸由君臣同心同德。圖厥成功。亦罔不在初。尙協嘉猷。以隆邦本。詔告天下。咸使聞知。宣德十年正月初十日。

上諡號詔

詔曰。朕惟隆古神聖之君。咸有鴻名美諡。垂於萬世。若唐堯虞舜。皆所以形容至德。逮我祖宗。莫不皆然。恭惟皇考大行皇帝。續承天位。統理邦家。弘覆載之仁。溥生成之德。至誠孚於上下。至孝通於神明。寬裕有容。神武不殺。華夏蠻貊。罔不率俾。薄海內外。熙然泰和。不幸上賓。奄棄臣庶。顧以大寶付於眇躬。懷哀慟之孔深。念繼述之彌重。允惟典禮。宜極追崇。謹命文武羣臣。稽古禮文。議薦諡號。參之衆論。協於大公。

乃於正月二十五日祇告天地宗廟社稷奉冊寶恭上皇考大行皇帝尊諡憲天崇道英明神聖欽文昭武寬仁純孝章皇帝廟號宣宗於戲天地之德實廣大而難名日月之明同昭宣於有永詔告天下想宜知悉宣德十年正月二十八日

上太皇太后及皇太后號封王詔

詔曰朕以眇躬嗣登大寶稽古帝王致理之要亦惟尊尊親親表正大倫封建宗藩鞏固王室厥有彝典萬世攸同仰惟聖祖母皇太后大德格天錫之全福以濟我家國保佑朕躬聖母皇后協相先朝用固邦本徽音嗣著大典攸崇謹上册寶尊聖祖母皇太后爲太皇太后聖母皇后爲皇太后復念本支實資藩屏今冊封弟祁鈺爲郟王平陽王美圭嗣封晉王保寧王悅燹嗣封蜀王其餘郡王應封襲者次第頒封於戲崇孝敬以隆天敍之尊敦宗室以重維城之寄爰推仁澤咸及庶邦詔示中外咸使聞知宣德十年二月初九日

水旱省示詔

朕躬嗣大統夙夜祇勤惟天惟祖宗付託之重不敢怠逸比年以來停罷一切徵斂除逋負薄刑罰所冀四方咸遂生息今歲以來災沴數見京畿尤甚自三月至五月亢陽不雨甚傷農麥五月中至六月連雨不止河決隄防淹沒田稼城中傾塌官民廬舍亦有壓溺死者深用兢惕洪範咎徵皆由人事蓋朕不德之所致也其聽納之弗審歟讒佞之弗戢歟政事之臣有頗僻歟輔弼之臣失其職歟何災特甚乎近也

循省厥由。用圖善道。爾等皆與國同體。豈當默默坐視而弗思弗勉乎。自今其體朕心。以敬天愛人爲心。毋懈夙夜。夫持廉戒貪者。善身之本。致公絕私者。善政之要。勿謂可欺。神鑒孔昭。勿謂無害。天應可畏。欽哉。勗哉。務修善政。庶幾以回天意。以固宗社。生民之福爾。亦尙有利哉。正統四年六月二十二日。

寬恤詔

詔曰。朕以眇躬。嗣承大統。仰惟天眷之隆。祖宗創守之艱。夙夜祇慎。用圖政理。以寧萬邦。一切不急之務。悉已停罷。尙冀羣生樂業。上協天心。切慮民情幽隱。庶職未盡得人。承流宣化。有所不至。深歎於懷。茲當春和。萬物發舒。吾民或有不得其所者。悉從寬恤。以遂其生。爾外臣僚體朕心。盡乃職。務求實效。勿事虛文。嗚呼。天地以生物爲心。國家以養民爲政。尙圖成績。用底雍熙。詔告臣民。咸宜知悉。正統四年三月初一日。

御朝詔

詔曰。朕以菲德。祇膺天命。嗣祖宗大統。主宰天下。夙夜思念。開創惟艱。繼承匪易。誠以疆宇之廣。億兆之衆。一人失所。過實自予。肆臨御以來。志存安利。寢食弗安。比者敬循祖宗之舊。建奉天華蓋。謹身三殿。乾清坤寧二宮。禮典宜備。尙慮煩民。迺材因素有。費悉公出。人悅趨事。聿告成功。已於今年十一月初十日。御正朝。臨羣臣。旒言居正而安。宜有及民之澤。於戲。惟君以仁民爲事天之本。惟臣以仁民爲事君之忠。臣民欽體於深仁。黎庶咸臻於至治。敷告中外。悉使聞知。正統六年十一月初一日。

册后詔

詔曰。朕以天敍。祇承大統。君臨海宇。子育兆民。仰惟隆古帝王。政由彝教。禮謹大婚。茲承聖祖母太皇太后聖母皇太后命。慎簡賢淑。作配朕躬。謹昭告天地宗廟。以正統七年五月十九日。册錢氏爲皇后。正位中宮。共承宗祀。協贊化理。敷告中外。咸使聞知。正統七年五月二十一日。

殿災詔

詔曰。朕以涼德。祇承祖宗鴻業。顧惟艱大。罔敢怠遑。乃正統十四年六月初八日。南京謹身等殿災。此誠上天垂戒國家。朕深思咎省躬。夙夜警懼。允惟敬天之實。必以敷仁爲先。其大赦天下。咸與維新。於戲。惟辟奉天。誕布生成之德。惟民歸極。溥承曠蕩之恩。詔告臣民。咸使知悉。正統十四年六月二十一日。

册立皇太子

郕王攝政詔

詔天下。邇因虜寇犯邊。毒害生靈。皇帝恐禍連宗社。不得已躬率六師。往正其罪。以安國家。不意被留賊庭。尙念臣民不可以無主。茲於皇庶子三人之中。選其賢而長者曰見深。立爲皇太子。正位東宮。仍命郕王爲輔。代總國政。撫安天下。於戲。國必有君而社稷爲之安。君必有儲而臣民有所仰。布告天下。咸使聞知。

景皇帝

卽位詔

詔曰。朕以皇考宣宗章皇帝仲子奉藩京師。比因虜寇犯邊。大兄皇帝恐禍連宗社。不得已親征。敕眇躬率百官居守。不幸車駕誤陷虜庭。我聖母皇太后務慰臣民之望。已立皇庶長子見深爲皇太子。命朕躬輔代總國政。皇親公侯伯暨在廷文武羣臣。軍民耆老。四夷朝使。復以天位久虛。神器無主。人心遑遑。莫之底定。合辭上請。早定大計。皇太后以皇太子幼沖。未遽能理萬幾。移命眇躬君臨天下。會有使自虜中還者。口宣大兄皇帝詔旨。宗社之禮。不可久曠。朕弟郕王年長且賢。其令繼統。以奉祭祀。顧痛恨之方殷。豈遵承之遽忍。雖避讓再三。而兪允莫獲。仰惟付託之至重。敢以涼薄而固辭。已於九月初六日。祇告天地宗廟社稷。卽皇帝位。遣使詣虜問安。上大兄皇帝尊號曰太上皇帝。徐圖迎復。爲政之道。必先正始。其以明年爲景泰元年。大赦天下。咸與維新。於戲。惟敬仁誠。可以安宗社。惟恭儉勤。可以惠萬民。尙賴宗室叔祖叔父。協心藩屏。爰暨中外文武賢臣。同心匡輔。弘濟重大之艱。永隆雍熙之治。布告天下。咸使聞知。正統十四年九月初六日。

勝虜詔

詔曰。朕以涼德。嗣承大統。仰惟祖宗創業之艱。宵旰孳孳。勉圖治理。重以大兄太上皇帝變輿未復。痛恨日深。方詰兵數十萬。欲問罪於虜。而虜使來迎復者。屢皆詐。太上皇帝詔旨。謂若重遣金帛以來。虜必款送還京。朝廷固疑其誑。而於理難辭。乃悉勉從之。柰何其計愈行而誑愈篤。乃十月十五日也。先悉衆躬

詣城下仍以請迎講和爲詞。朕遣大臣出迓。徧歷虜營。不見大兄。變輿所在。遂焚書。斬使。揮六師。搗之。斬獲其類無算。虜衆大潰。乘夜奔遁。餘孽散伏於近郊者。亦皆以摻戮無遺。京師內外。爲之帖然。尙慮四方遠近。罔聞克捷。猶懷驚悸。耕鑿未遑。室家靡定。無以慰安人心。特茲詔示。其各復爾舊。寧爾生。永彰殺伐之功。共樂雍熙之治。布告中外。咸使聞知。正統十四年十一月初九日。

上太后號册后詔

詔曰。朕以眇躬。托於億兆臣民之上。罔知治理。夙夜匪寧。顧惟德禮。有未惇庸。將無以道國家天下。蓋德必先於隆孝。而禮惟重乎正名。帝王所同。彝倫斯在。況恩施於己者。有莫大宜。尊歸於親者。無以加。義所當然。事豈惟過。謹上尊聖母皇太后曰。上聖皇太后。生母曰。皇太后。勉遵辭讓之旨。奉遷皇太后居仁壽宮。以俟大兄。變輿之復。進皇太子母周氏爲貴妃。示重天下之本。册朕妃汪氏爲皇后。以厚大倫之原。夫帥天下以仁。固本於親親。然由親親而推。又在於仁民。於戲。愛敬盡於事親。而德教加於百姓。非朕所及。然切於中。雖勉力協和之弗周。期同德於變之靡間。詔告中外。咸體朕懷。正統十四年十二月初十日。

太上皇帝告羣臣詔

朕以不明。爲權奸所誤。致陷於虜庭。已嘗寓書朕弟。嗣皇帝位。主典神器。奉承宗祀。此古今制事之宜。帝王執中之道。朕今幸賴天地祖宗之靈。母后皇帝憫念之切。俾虜悔過。奉送還京。郊社宗廟之禮。旣不可預。國家幾務之重。朕弟惟宜。爾文武羣臣。務悉心以匡其不逮。以福蒼生於無窮。朕到京日。迎接之禮。悉

從省約。布告有位。咸體朕懷。景泰元年八月十五日。

上太上皇帝號詔

詔曰。朕奉先帝聖體之遺。適值國家中衰之運。痛幾務擅專於權倖。致大兄誤陷於虜庭。賴天地祖宗眷佑之隆。荷母后臣民付托之重。授朕大位。俾紹鴻圖。慰安人心。奉承宗祀。雖神器有可保。柰皇業以多艱。胡虜內侵。蠻苗外擾。方茲攘除已定。尙猶宵旰靡寧。顧滅賊之難威。恩以誠而懷怨。肆屢遣人重齎金帛。投虜所好。迎復大兄。柰頑梗而弗悛。豈怨讐之可匿。方圖大舉。遽見彰聞。逆虜革心。翻然畏服。乃自今年七月以來。遣其親信伏闕朝貢。固請講和。至於再三。悔見乎辭。款浮於過。朕不得已。爲親而屈。厚加金帛。選使偕行。敢謂德可動天。自信誠能化暴。乃八月十六日。其太師也。先果遣五百餘騎奉送大兄還京。臣庶交權。宮庭胥慶。然朕卽位之初。已嘗祇告天地宗社。上大兄尊號曰太上皇帝。禮惟有隆而無替。義當以卑而奉尊。雖未酬復怨之私。姑少遂厚倫之願。爰推恩典。溥及臣民。於戲。雪恥不以威而以德。誠有仗宗社之靈。遺民不於勞而於安。志在益家邦之福。尙賴叔祖叔父羣臣賢哲。匡朕躬於不逮。庶幾華夏蠻貊。四方遠邇。臻至效於無窮。布告中外。咸體朕懷。景泰元年八月十九日。

冊立太子詔

詔曰。朕以涼薄。躬際艱危。賴天地祖宗眷佑之隆。膺母后臣民付戴之重。嗣臨大寶。安固家邦。方負荷之弗勝。豈授承之敢慮。而皇親公侯駙馬伯。及在廷文武羣臣。乃合詞上請。以爲天祐下民作之君。實遺安

於四海。父有天下傳之子。斯固本於萬年。此三代之聖謨。誠百王之懿範。謂朕長子序在倫先。宜正東宮。以明繼體。事方聞於聖母。遽見允於輿情。復以皇后之謙沖。固遜軒龍於有子。再三陳懇。理順名端。肆循慈訓之諄。兼遂賢情之切。乃於五月初二日。冊朕長子見濟爲皇太子。其母杭氏爲皇后。大本既正。彝倫亦明。親親之誼。猶所當敦。太上皇帝長子見深。特更封爲沂王。次子見清爲榮王。見淳爲許王。同屏國家。衛安宗社。爰推恩於遠邇。庸資弼於臣民。於戲。綱常正而家道雍。式弘敦於化本。儲副專而國統續。庶永固於基圖。布告臣民。體予至意。景泰三年五月初二日。

英宗睿皇帝

復卽位詔

詔曰。朕昔恭膺天命。嗣承大統。十有五年。民物康阜。不虞北虜之變。惟以宗社生民之故。親率六師禦之。而以庶弟郕王監國。不意兵律失御。乘輿被遮。時文武羣臣既立皇太子而奉之。豈期監國之人。遽攘當守之位。旣而皇天悔禍。虜酋格心。奉朕南還。旣無復辟之誠。反爲幽閉之計。旋易皇儲而立己子。惟天不佑。未久而亡。杜絕諫諍。愈益執迷。矧失德之良多。致沈疾之難療。朝政不臨。人心斯憤。迺今月十七日。朕爲公侯駙馬伯及文武羣臣六軍萬姓之所擁戴。遂請命於聖母皇太后。祇告天地社稷宗廟。以今年正月十七日。復卽皇帝位。躬理庶務。保固邦家。其改景泰八年爲天順元年。大赦天下。咸與維新。於戲。多難興邦。高帝脫平城而肇漢。殷憂啓聖。文王出姜里以興周。天位旣復於其正。人心由是以咸安。咨爾萬方。

臣民同秉忠誠。會歸皇極。弼予政理。永享太平。布告天下。咸使聞知。天順元年正月二十一日。

復立太子詔

詔曰。朕惟帝王之傳序。乃國家之大經。建元良。所以尊祖宗而重社稷。封羣胤。所以壯藩屏而隆本支。今古攸同。典章斯具。茲朕躬膺天命之申。復登大寶之位。顧惟不腆。事有未遑。而公侯駙馬伯及文武羣臣。僉謂朕之元子。當復正位於東宮。其次諸子。宜悉封於藩國。朕以請之聖母皇太后。允從衆議。舉行盛禮。乃於天順元年三月初六日。冊立元子見濬爲皇太子。及封第二子見濤爲德王。第三子見澍爲秀王。第四子見澤爲崇王。第五子見浚爲吉王。於戲。承祧主器得其人。則國本正而萬邦以貞。胙土疏封守其世。則藩輔完而大統以定。天下之心。斯有所繫。宗社之計。永底於安。故茲詔告。咸使聞知。天順元年三月初六日。

寬恤建庶人敕

朕恭膺天命。復承祖宗大統。夙夜憂勤。欲使天下羣生。咸得其所。而況宗室至親者哉。爰念建庶人等。自幼爲前人所累。拘幽至今。已五十餘年。憫此遺孤。特從寬貸。用是厚加賞賚。遣人送至鳳陽居住。月給廩餼。以安其生。仍聽婚婢。以續其後。庶副眷念親親之意。故諭。天順元年十二月十六日。

上太后尊號詔

詔曰。朕惟爲治莫先於孝。而孝莫大尊親。自古帝王。德教加於百姓。刑於四海者。率由此道也。朕以眇躬。

續承丕緒。仰惟聖母皇太后生成厚恩。曷云能報。曩予嗣位之初。屬在幼沖。罔知攸濟。惟我聖母勞心訓育。俾克繼述。用底乂寧。迨居南宮。危疑之間。亦惟我聖母憂勤保護。賴以無虞。及內難將萌。遂伸大義。俾予復位。奠安宗社。康濟生民。功德兼隆。迴超載籍。用是博採公義。表著徽稱。乃於正月二十日。率文武羣臣。謹奉冊寶。上尊號曰聖烈慈壽皇太后。特遣非常之慶。庸昭錫類之心。於戲。推之而準。允惟政治於家邦。動之斯和。尙冀風行於天下。天順二年二月二十二日。

誅姦詔

詔曰。我國家受天明命。以至仁大德。撫有四海。列聖繼統。傳序在子。致治保民。蓋有年矣。暨予中歷險艱。賴天眷人歸。復正大位。維時內官吉祥。武官石亨等。偕衆迎復。掩爲己功。朕信之不疑。厚以爵賞。官其子弟。各數十人。而彼肆欲無厭。黷於貨利。結爲表裏。竊弄威權。少疏抑之。輒懷異志。然石亨事敗。已正典刑。而優寵吉祥。無異平昔。不期吉祥。衷惡蓄姦。日甚一日。與姪男曹欽等。陰養死士。謀爲不軌。乃於今年七月初二日。早。遽行反逆。戕害朝臣。焚毀禁門。罪惡滔天。神人共憤。朕卽時命將發兵誅之。元兇授首。同惡悉除。浹日之間。都城清肅。此實上天垂佑之靈。宗社無疆之福也。夫武以戡亂。愧未發於先機。仁以惠民。期益臻於至治。於戲。戡定之後。事莫急於變通。變通之宜。治莫先於仁惠。惟爾中外臣庶。各究乃心。體予至意。天順五年七月初十日。

上諡號詔

詔曰。朕惟有大功德者。必有徽稱。以垂永久。稽諸典禮。萬世攸同。仰惟皇妣聖烈慈壽皇太后。至仁大德。本於天性。配我皇考。克敦化原。誕育朕躬。恩勤備至。朕自幼沖嗣位。以至於今。前後幾三十年。賴我皇妣訓誨維持。底於成立。用能奠安宗社。輯寧邦家。不幸奄違。至養哀慕無窮。重惟罔極之恩。宜舉尊崇之典。謹命禮官議薦徽號。博採輿論。協於至公。已於十月初七日。祇告天地宗廟社稷。恭上皇妣尊諡曰孝恭懿憲慈仁莊烈齊天配聖章皇后。嗚呼。盛德難名。曷表尊親之孝。光儀具在。永垂裕後之休。布告中外。咸使聞知。天順六年十月初十日。

寬恤詔

詔曰。朕仰荷上天眷命。子育萬民。民之戚休。恆存念慮。顧惟畿內。去冬少雪。今春缺雨。四方之遠。亦恐或然。夫天時既已遠和。斯地利必有未盡。吾民衣食。何所自出。興言及此。良深憫惻。欲慰羣情之望。宜加寬恤之仁。況修德弭災。厥有彝典。冀爾中外羣臣。咸體朕心。勤政保民。用臻康樂。庶天降鑒。協於至和。於戲。代天理物。爰推一念之誠。節用愛人。用錫萬邦之福。詔告中外。咸使聞知。天順七年三月十三日。

憲宗純皇帝

卽位詔

詔曰。洪惟我祖宗誕膺天命。肇開帝業。爲生民主。幾百年矣。聖聖相承。志勤於治。武功文德。紹體前聞。暨我皇考皇帝恢弘政治。二紀於茲。厚澤深仁。有以衍皇明萬世無疆之祚。不幸奄茲遐棄。遺命神器付於

眇躬顧哀痛之方殷。奚遽忍於繼承。而親王文武羣臣及耆老軍民。累表勸進。誠切意堅。朕不得已。仰遵遺命。俯徇輿情。於正月二十二日。祇告天地宗廟社稷。卽皇帝位。自惟涼薄。勉懷永圖。嘉與中外親賢。率循至道。惟敬是持。惟誠是立。惟仁義是行。惟古訓成憲是式。庶臻於治。康我兆民。其以明年爲成化元年。大赦天下。於戲。體元居正。宜宏經世之規。發政施仁。用錫普天之澤。尙賴宗室親王。文武賢臣。協德一心。恭勤乃事。以弼予於至治。詔告中外。咸使聞知。天順八年正月二十二日。

上諭號詔

詔曰。朕惟自古英君義辟。咸有美謚。垂示方來。若二帝三王以及後世之賢主。莫不皆然。乃國家之茂典。不易之令猷也。恭惟我皇考大行皇帝。以英武之資。剛健之德。嗣守祖宗之鴻業。躬勤政務於萬幾。至孝通於神明。洪恩被於黎庶。嚴百神之祀享。重賢士之登庸。志協羣情。智周萬慮。誕敷文命。慎簡兵戎。立經國之遠圖。興治古之盛事。華夏蠻貊。罔不歸心。四海九州。臻於熙皞。不幸奄棄臣民。哀慟曷已。允惟宗室之託。深思負荷之艱。矧繼述之方殷。顧追崇之敢後。謹命在廷文武羣臣。稽古禮文。議薦謚號。參之衆論。合於至公。乃於二月十二日。祇告天地宗廟社稷。奉冊寶。恭上皇考大行皇帝尊謚。法天立道。仁明誠敬。昭文憲武。至德廣孝。睿皇帝。廟號英宗。嗚呼。聖德允合於乾坤。神功光垂於宇宙。豈名言之可罄。尙丕顯於無窮。布告邇遐。咸使知悉。天順八年二月十五日。

尊母后母妃詔

詔曰。朕惟大孝尊親。著於典禮。是以自古聖帝明王之有天下者。靡不以尊親爲重。而亦未嘗不致隆於所生。傳序在予。祇循敢後。仰惟母后以坤德之懿。配我皇考。昭宣化源。而嬰疾有年。燕禩弗兆。於時贊理宮闈。相成宗祀。與所以迓續天休而隆邦本者。實我母后之功。德是賴。內治雍睦。皇考鑒焉。予一人躬承兩宮訓育。至於有成。嗣統之初。敢忘圖報。夫欲兼隆於至養。固宜各極於尊稱。是用率籲衆心。參稽古誼。謹上册寶尊母后。皇后曰慈懿皇太后。尊母妃皇貴妃曰皇太后。至情大義。庶幾兩盡無違。然孝旣盡於尊親。仁當推以逮下。於戲。養以天下。永惟二聖之尊。福被後人。懋衍萬年之慶。布告中外。咸使聞知。天順八年三月初二日。

册后詔

詔曰。婚姻正始。人道所重。朕大婚之期。先帝有成命矣。遽焉卽吉。誠所未安。茲者親王廷臣累辭以請。而聖母慈懿皇太后。皇太后慈訓加切。咸以繼承之重。爲言義旣有在。朕敢固違。謹昭告天地宗廟。以天順八年七月二十一日册立吳氏爲皇后。正位中宮。以共承宗祀。奉養慈闈。庶惇彝倫。用化成於天下。敷告中外。咸使聞知。天順八年七月二十四日。

改册后詔

詔曰。帝王爲始。莫先正家。正家之道。必自大婚始。惟先帝臨御之日。嘗爲朕簡求賢淑。已定王氏。育於別宮。以待期矣。迨至憑几顧命。猶以婚期責成有司。朕於時執禮彌甚。未敢遽從。矧敢與知其事。不意內臣

牛玉偏徇己私。朦朧奏請皇太后將已退吳氏復選冊立。禮成之後。朕觀吳氏德不稱位。因察其實。始知非預定者。夫既遵先帝之命以成禮。而乃違命立非其人。何以表宮闈而相宗祀。興言及此。內疚於心。用是不得已。請命母后。明正牛玉之罪。廢黜吳氏。不敢以歲月緩。自念與其非人。寧虛厥位。而在廷文武羣臣。再三陳請。謂中宮不可久虛。義正詞切。朕難固拒。今勉從所請。仍遵先帝成命。冊立王氏爲皇后。於戲。自古人倫。有常有變。變而得正。何憚弗爲。茲朕是舉。匪獨正家。抑恐上負先帝選授之命。於心有不安焉。誕告多方。使明知朕意。天順八年十月十五日。

上皇太后諡詔

詔曰。朕稽古聖君。治隆孝道。固謹於其始。尤嚴於其終。是以薦徽稱。垂永世。實今所當遵用也。惟我皇妣大行慈懿皇太后。配我皇考英宗睿皇帝。正位坤宮。殆將二紀。逮於紹休聖緒。尊奉母儀。並膺至養。亦閱五載。懿範仁恩。自家刑國。宜壽萬年。而遽爾升遐。思馨送往之誠。惟崇媲美之號。是用博采廷議。於七月十九日。祇告天地宗廟社稷。恭上尊諡曰孝莊獻穆弘惠顯仁恭天欽聖睿皇后。於戲。陵廟祔於先皇。允符天地高厚之配。聲名溢於中國。施及日月照臨之區。播告遐邇。咸使知悉。成化四年七月二十二日。

彗星見詔

詔曰。朕嗣無疆大歷服。夙夜祇畏。靡敢怠遑。然德服加隆。政弗臻治。荷天心仁愛。屢出災異以示儆焉。迺九月朔以來。星芒垂象。逼台掃斗。威譴尤切。朕慄焉修省。永惟斯人。天之赤子。爰加惠澤。期與更新。庶幾

仰當上天眷命付朕億兆之意於戲爾中外文武之臣既俯治於人尙仰畏於天受職任事者惟義是循理兵牧民者惟仁是篤惟朕憂是分惟玄鑑是儆故茲詔誥咸使聞知

寬恤詔

詔曰朕以眇躬君臨海宇惟上天付畀之重祖宗創守之艱常懷惕厲罔敢怠荒遑豫冀民物阜康協於至治而志勤道遠厥效未彰比者災沴薦臻畿甸尤甚三時不雨一雨連旬旱澇相仍民食缺乏循省厥咎在予一人百姓何辜罹茲艱厄輿言及此良用惻然夫篤近舉遠者古之規視遠猶邇者朕之志爰推憂勤之念普施寬恤之仁於戲朕體上天好生之德用加惠於吾民中外大小臣僚上體朕恤民之意務求臻於實效故茲詔示咸使聞知成化六年八月初八日

册立太子詔

詔曰自古帝王君臨海宇必崇建元良以爲儲副此久安長治之道也惟我祖宗列聖允迪大猷承傳有序邦本既正鴻業斯隆暨朕嗣守丕圖於茲八載彝章未舉蓋有待焉長子祐極天資明粹日表英奇中和之性夙成內外之心是屬比者公侯駙馬伯文武羣臣合誠奉表請建東宮恭承皇太后聖訓茲事重大宜從衆議爰以令辰舉行彝典授祐極以册寶立爲皇太子正位東宮用篤邦家之祐衍宗社無疆之休大禮既成輿情交慶宜敷霈澤覃被萬方於戲元良正位緜大統於萬年曠蕩推恩均至仁於四海詔諭遐邇咸使聞化成化七年十一月十六日

災傷寬恤詔

詔曰。朕紹祖宗鴻業。爲天下生民主。夙夜憂勤。用圖康濟。柰近年以來。旱澇相繼。歲數不登。加以今春亢旱爲虐。京畿州縣被災者多。而山東濟南等六府。河南彰德一府。災傷尤甚。人民缺食。十常八九。守臣以告。朕心惻然。夫民生不遂。實司牧之過。如又坐視其饑窘困窮而不顧。豈爲民父母之道哉。用是發倉儲。出內帑。弘施寬恤之仁。少慰黎元之望。凡爾居官食祿爲朕牧民者。務加意賑恤。毋生事煩擾。乃諭吾民。鄰里相救。有無相通。共濟艱厄。以俟秋成。有積者毋閉糴。自私自乖救急之義。窮乏者毋流移轉徙。放縱非爲。以重害而生於戲。憂民之憂。朕心良切。故茲詔示。咸使聞知。成化九年四月十七日。

再冊立太子詔

詔曰。帝王誕膺景命。必建儲闈。所以重宗社之承。正邦家之本。此古今通制也。朕丕纘令績。祇後永圖。旰食宵衣。不遑自逸。允惟七鬯之主。實繫臣民之心。庸舉盛儀。以慰羣望。皇子祐檉。聰明天賦。睿智夙成。孝本因心。禮皆中度。朕遠稽古昔。近法祖宗。覽羣臣請建之章。奉聖母從衆之訓。遂授冊寶。立祐檉爲皇太子。正位東宮。衍寶祚於萬年。隆本支於百世。弘施慶澤。覃被寰區。於戲。正元良之位。式副輿情。推曠蕩之恩。用敦博愛。詔告天下。咸使聞知。成化十一年十一月初八日。

復郕王帝號詔

朕叔郕王踐祚。戡難保邦。奠安宗社。亦既有年。及寢疾臨薨之際。姦臣貪功生事。妄興讒搆。請去帝號。先

帝尋知誣枉。深懷悔恨。以次抵姦於法。不幸上賓。未及舉正。朕嗣成大業。於茲一紀。每思先儒有言。祖父有欲爲之志而未爲。子孫善繼其志而成就之。此所謂孝。間以帝號之復。質諸聖母皇太后。亦云此先帝本意。宜卽舉行。朕祇服慈訓。敦念親親。誕告在廷。用成先志。其邨王可仍舊皇帝之號。所有尊諡。禮部會議以聞。務合人心。毋乖典禮。仍令所司修飾陵寢。如敕奉行。故諭。成化十一年十二月十三日。

災異寬恤詔

詔曰。朕紹祖宗大位。撫御萬方。思惟負荷之艱。罔敢自逸自豫。然而治效未著。災沴迭興。地道弗寧。天時亢旱。土無所演。朕切憂惶。嘗齋心懇禱。遣廷臣祭告山川。柰歲竟不登。而河南山東畿內。率多饑饉。陝西山西尤劇。至有棄恆產室家。不相顧者。元元何辜。罹茲危阨。朕爲民主。可愆然莫之愍耶。累博采羣議。發內帑倉儲。敕所在官司多方賑濟。期此今人咸歸樂土。不意冬暮春初。兩次星變有聲。朕愈兢惕。載敕廷臣備陳時政得失。采納而行。用以下慰民望。上答天心。方春和時。萬物發育。祇承乾元資始之仁。誕敷寬恤天下之典。成化二十一年正月初七日。

上皇太后徽號詔

詔曰。朕惟古帝王之孝親。匪惟養以天下。而必尊以鴻名。蓋所以表功象德。顯於今而垂於後也。情文咸具。敢忘祇循。恭惟聖母皇太后。夙贊先聖。茂隆內治。誕毓眇質。纘紹丕圖。迄今二紀。宗社奠安。海宇寧謐。實皆聖母深仁。洪慈訓迪之所致也。矧於皇太子勤劬長育。用底有成。家室攸宜。國本深固。凡茲勛德。超

軼千古而尊崇元禮。尙未加隆。朕心歎焉。乃稽彝典。率籲臣工。以今月十七日。謹奉冊寶。上尊號曰聖慈仁壽皇太后。仰酬罔極之恩。遠追帝王之孝。禮既成於家國。澤斯溥於寰區。於戲。據古尊稱。式廣親親之教。揆今恤下。誕敷老老之仁。詔告中外。咸使聞知。成化二十三年四月十九日。

明書卷五十四

志五

綸渙志四

孝宗敬皇帝

卽位詔

詔曰。惟我祖宗聖聖相承。膺天明命。爲華夷主。創業守成。神功聖德。誠度越往古矣。暨我皇考大行皇帝。嗣統深仁厚澤。覆冒海宇。二紀於茲。而憂勤求治之心。猶宵旰靡遑。因臻遼豫。遽出綴衣。忍聞憑几之言。猥以神器之屬。哀疚方殷。罔知攸措。時親王文武羣臣。下及耆老軍民。合詞伐闕。勸進者。至於再三。辭拒弗獲。乃遵遺命。以九月初六日。祇告天地宗廟社稷。卽皇帝位。顧茲付畀之重。深懼仔肩之難。勉圖弘濟。一惟恢張治道。惠綏黎元。用底阜成。躋於熙皞。庶衍皇明億萬年無疆之祚。其以明年爲弘治元年。夫當居正體元之初。宜布更新欽恤之典。於戲。祖宗皇考大經大法。啓佑我後人者。纖悉具至。繹思體行。在予眇躬。尙賴遐邇宗親。內外忠良。同德一心。恪恭乃事。以輔予之不逮。誕告多方。咸使聞知。成化二十三年九月初六日。

上諡號詔

詔曰。自昔帝王功德隆盛。皆有美諡。以詔垂於萬世。此不易之令典也。洪惟皇考大行皇帝英資神聖。至德寬仁。早主鬯以繫人心。繼定位而正天序。緝熙聖學。躬勤政教。法祖敬天。尊親致養。恩誼篤於宗室。惠澤溥於黎元。舉賢能而疏遠無遺。慎兵刑而威德宣布。歷年二紀。治底雍熙。華夏戎夷。罔不歸戴。揆茲功德。邁古帝王遠矣。不幸奄爾上賓。臣民慟慕。顧予哀疚彌切。敢緩追崇。謹命在廷文武羣臣。稽古禮文。議薦諡號。博參輿論。允協至公。乃於九月十九日。祇告天地宗廟社稷。奉冊寶恭上皇考大行皇帝尊諡曰。繼天凝道誠明仁敬崇文肅武宏德至孝純皇帝。廟號憲宗。嗚呼。乾坤高厚。曷能擬其形容。日月光華。尙同顯於悠久。布告中外。咸使聞知。成化二十三年九月二十二日。

尊太皇太后皇太后冊皇后詔

詔曰。孝莫大於尊親。政必先於正名。禮典俱存。古今攸重。朕恭承丕緒。統御華夷。務惇敘於天倫。式恢弘於化理。仰惟皇祖母聖慈仁壽皇太后懿德配天。慶鍾先帝。茂隆國祚。保育朕躬。聖母皇后貞靜柔慈。含弘光大。賢踰膠木。愛軼螽斯。肆予克底有成。實賴二聖撫迪。擬佑所致也。厚德深仁。罔極莫報。允惟兼養以天下。則必各極其尊稱。續紹之初。舉行敢後。謹於本月初九日。率領文武臣工。寅奉金冊金寶。尊上顯號。皇祖母曰聖慈仁壽太皇太后。母后曰皇太后。乃若相禋助養。必資內德之賢。爰冊妃張氏爲皇后。用襄內治。表正中宮。大禮旣成。湛恩斯溥。於戲。立愛惟親。德教弘敷於四海。正家有道。皇祚茂衍於萬年。誕

告多方。咸知朕意。成化二十三年十月初十日。

星變敕

朕嗣承祖宗大統。三年於今。雖夙夜孜孜。究圖化理。而績効未著。心恆歉然。茲者上天垂戒。彗星見於天津。朕甚憂之。循省咎徵。莫測所自。豈朕德涼薄。行事乖違。天特示異以警之歟。抑邪慝將萌。兆驗先見。天故動威。朕思所以消弭之歟。抑亦政多缺失。君民困苦。朕與爾文武羣臣。交修之道未至。而惠下不敷。歟。惟事關朕躬者。朕已齋沐告天。省己修德。期消變異。而爾等食朕之祿。實同休戚。可不痛加警省歟。今各宜修舉職業。毋或因循懈惰。廉慎節操。毋或背公徇私。凡軍民利病。時政得失。可以興革張弛者。爾文武大臣并科道官。仍條奏來聞。務在切實可行。於國有益。庶幾上下協盡。交修之道。而人心欣慰。天意可回矣。其勉之慎之。故諭。弘治二年十二月初四日。

慎刑敕

朕惟刑以輔治。用之貴得其平。刑平則善有所勸。惡有所懲。而人心服。天道和。不平則不足以懲惡勸善。而人心不服。天道乖。災變之來。誠有不能免焉。曩因天道示異。曾敕天下諸司。審錄重刑發落。遇情可矜。疑及準辯者。奚翅數十百人。雖曰勿拘成案。原官亦不坐罪。此特廣仁愛之意。欲全民命爾。其間實有訊鞫不真。而失入可罪者。然亦有無可矜疑。而強爲出脫者。要之皆非大中至正之道。茲當萬物發育生長之時。朕體天地好生之德。以爲刑者。民命所繫。與其寬之於終。孰若謹之於始。故特戒敕爾等。各加謹慎。

仍行南京三法司及天下大小問刑衙門。今後問刑之際。務必存心以仁恕。持法以公平。察辭辨色。詳審其情。罪所當重者。重之以懲惡。毋務姑息。而不顧縱惡長奸之非。罪所當輕者。輕之以宥過。毋事苛刻。而致有抑鬱稱冤之歎。其或證驗無憑。情隱難明者。尤當加意推究。毋或傳致於時。而冀不坐罪於他日。如此庶不背古聖人欽恤之訓。而於朕刑期無刑之治。亦有裨益焉。爾等其欽承之。毋忽。故諭。弘治四年二月二十四日。

元子誕生詔

詔曰。朕承祖宗鴻業。君主華夷。於今四載。深惟德有未修。澤靡下究。無以安養元元。恐負祖宗之付託。用是夙夜憂勤。勉圖化理。罔敢怠遑。茲者荷蒙上天錫祐。福慶駢□。祖考垂休。本支茂衍。乃於今年九月二十四日。皇后正宮誕生元子。神人胥慶。遐邇同歡。上有以慰聖祖母之心。下有以副中外臣民之望。惟人心之和輯。世道斯隆。惟宗社之靈長。國本愈固。詔天下咸使聞知。弘治四年十月十二日。

冊立皇太子詔

詔曰。帝王統御天下。必立儲副。以定國本。繫人心。斯能長治久安。而縣鴻業於無疆也。朕繼祖宗天序。登極五年。夙夜憂勤。恭膺天眷。元子厚照。軒龍毓秀。資表異常。福慶攸鍾。華夷均戴。茲者皇親公侯駙馬伯文武羣臣。累表率籲。勸請立儲。朕俯鑒悃誠。仰承慈訓。皆謂主器不可以久虛。輿情不可以固拒。事在當舉。理難終辭。爰擇日祇告上下神祇。授厚照以冊寶。立爲皇太子。正位東宮。益增九廟之光。丕衍萬年之

祚。國家大典。中外同歡。宜敷茂恩。用慰願望。於戲元良。建而萬邦。以貞治隆。熙皞解澤。降而率土。斯潤化洽。纖洪。詔告多方。咸使知悉。弘治五年三月初八日。

清寧宮災詔

詔曰。朕祇承天序。嗣祖宗鴻業。一紀於茲。宵旰憂勤。罔敢逸豫。而位育之效。猶有未臻。累歲以來。災異相仍。近者清寧宮之火。其變尤甚。朕心兢懼。若切淵冰。意必人事下垂。斯天道上應。其或舉措違宜。刑賞靡當。時弊滋積。民隱莫伸。或賦役頻繁。侵漁太急。困窮繆寡。日不聊生。以致然歟。朕深居九重。雖慮周天下。而耳目有不逮。恩澤有未宣。服念踰時。益增悔艾。已敕文武羣臣。同加修省。茲特誕敷渙號。普及黔黎。俾覆幬之區。均沾德惠。庶慰渴懸之望。永祈眷佑之休。於戲。虞書以好生爲德。尙體天心。夏訓以固本爲言。必先民事。詔告中外。咸悉朕懷。弘治十一年十二月二十一日。

武宗毅皇帝

卽位詔

詔曰。惟我皇明。誕受天命。爲天下民物主。祖宗列聖。鴻規大訓。傳在子孫。皇考嗣統。十有八年。深仁至德。覃被海內。治化之盛。在古罕聞。間復憫念民窮。勵精新政。訪求利弊。方將大有興革。綸音未布。遽至彌留。叩地籲天。無所逮及。天下之慟。矧予一人。比者親承遺命。謂主器不可久虛。而宗親文武羣臣。軍民耆老。累箋勸進。拒之至再。情意懇切。永惟宗社重寄。不敢固辭。謹以是月十八日。祇告天地宗廟社稷。卽皇帝

位。願國家創造之難。眇躬負荷之重。惟正道是遵。惟古訓成憲是守。率皇考未終之志。擴而行之。康我兆民。登於至治。其以明年爲正德元年。大赦天下。與民更始。於戲。天位至大。民事多艱。尙賴中外臣僚。協心匡輔。以裨朕之不逮。用克紹業。共保億萬年無疆之休。誕告萬方。咸使知悉。弘治十八年五月十八日。

上諡號詔

詔曰。朕惟帝王大行受大名。考德定諡。薦於宗廟。播於無窮者。古之制也。洪惟我皇考大行皇帝。以聖德膺天命。嗣大歷服。越十有八年。敬天法祖。尊親睦族。親賢愛民之心。靡所不至。用是民生又安。海宇寧謐。治理之盛。超軼往古。於前烈有光焉。乃者昊穹降割。龍馭上賓。中外臣民。銜戀恩德。攀號莫逮。願於沖人。肇纘鴻業。時方在疚。禮樂之事。多所未遑。茲當視朝之初。首稱殷禮。謹命在廷文武羣臣。稽古儀。薦諡號。博參衆論。協於至公。於六月初七日。祇告天地宗廟社稷。奉冊寶。恭上皇考大行皇帝尊諡曰。建天明道。誠純中正。聖文神武至仁大德敬皇帝。廟號孝宗。於戲。天地之無窮也。而有高明博厚之稱。惟是盛德難名。舉其大者。用上配列聖。永貽億萬年廟饗之休。布告遐邇。並宜知悉。弘治十八年六月初十日。

上太皇太后皇太后徽號詔

詔曰。朕承皇考遺德。誕嗣丕基。夙夜兢兢。懋圖化理。願治本於孝。雖至貴必有所尊。粵稽古昔。聖帝明王。暨我祖宗。列聖罔不率而行之。予何敢後。恭惟聖祖母皇太后。深仁厚德。母儀天下。徽音令聞。亘古罕比。予沖人獲底成立。實維慈訓是賴。聖母皇后德由天賦。道合坤元。內治允修。克儷皇考。用集無疆之慶。鍾

於眇躬。非各極尊稱。何以申罔極之報。茲卜以八月初二日。率領文武臣工。謹奉冊寶。恭上聖祖母尊號。曰慈聖康壽太皇太后。皇后曰皇太后。庶情文兼至。孝思惟則。以成隆古之治。以紹我祖宗列聖之鴻休。於戲。立愛惟親。成一人之達孝。施恩有序。得萬國之歡心。誕告多方。俾咸知悉。弘治十八年八月初四日。

討安化王詔

詔曰。自古帝王法天立政。布德明刑。不可偏廢。朕嗣位以來。仰荷上天祖宗付託之重。勵精圖治。越五六年。念惟世久承平。人多玩法。振起綱維。剷革姦弊。相與斯人。登於至理。而有司不能悉體朕心。奉行過當。虛懷徒切。和氣弗臻。乃自今春以來。亢旱爲厲。時雨愆期。風霾屢作。異星迭見。四川湖廣等處。寇盜縱橫。撫捕未定。而陝西寧夏都指揮何錦等。戕害守臣。拒殺官兵。屠戮居人。謀立安化王寘鐸爲主。出給印信。票帖。招誘諸路。索要軍馬地圖。各鎮官員。連日奏報。具有實跡。爰下皇親廷臣會議。僉謂寘鐸悖逆天道。得罪祖宗。朕不敢赦。祇告太廟。革其封爵。削其屬籍。命將出師。正名討罪。誅勦首惡。分釋脅從。撫定軍民。安靖邊境。尤念兵戎事重。供億甚勞。加以逋負相仍。科徵未息。在在皆然。方欲省刑薄斂。任賢使能。培養元氣。掃除災孽。以保我國家億萬年之祚。於戲。用兵者如不得已。用刑者必求其生。方輿問罪之師。大布同仁之政。播告中外。咸使聞知。正德五年四月二十六日。

平安化王詔

詔曰。朕自冲年以來。嗣守祖宗大位。惟敬天勤民。睦族用賢。是祈是念。期於至治。邇者寘鐸窺伺神器。與

寧夏叛賊何錦等謀逆。殺害鎮巡重臣。荼毒兵民。僞置官屬。招誘各路軍馬。反形已著。朕祇告太廟。命官致討。罪人既得。已下廷臣鞫問得實。敕天下諸王議實。鑿罪犯。其餘逆黨。明正典刑。及逆賊劉瑾。負朕委任。矯託命令。捏寫旨意。專權賣法。累朝成憲。變亂殆盡。官吏軍民。並受其害。利入私門。歸怨公府。激變地方。又包藏禍心。私蓄兵器。僞造寶印。懷刃入朝。謀爲不軌。待時爲變。亦下廷臣鞫實。以正典刑。數月之間。二變交作。兩功並成。實賴天地眷佑之恩。祖宗庇覆之德。邦家底定。中外咸和。但念四海蒼生。皆吾赤子。或徵科苛急。或刑罰刻深。非徒變亂之愆。抑有奉行之過。歲年屢易。姦弊滋多。揆厥所由。皆非朕意。已令所司查革改正。載申恩典。以慰羣情。通將前後事情。復告於廟。然後行事。嗚呼。天地以好生爲德。人君以法祖爲心。方當釐正之時。載布寬仁之澤。播告中外。咸使聞知。正德五年九月十八日。

乾清宮災詔

詔曰。朕恭承天命。統治萬民。夙夜孜孜。恪尊祖訓。惟以敬天勤民爲首務。期於民物阜康。天休滋至。顧以宴安易溺。舉措有乖。未合天心。至生災變。六行愆度。千里蜚蝗。隕霜雨雹之非時。地震天鳴之迭見。水旱相繼。饑饉薦臻。人民困窮。盜賊充斥。兵馬之調發騷動。近畿芻粟之轉輸。役及婦女。疲羸餓殍。填委溝壑。戰鬪死亡。身膏草野。勤勞或未盡甄賞。義烈或未盡表揚。邑井蕭條。室廬楚蕩。流者無所寄命。歸者無所安居。加之姦吏舞文。貪官黷貨。優卹之旨。每下而廢格不行。蠲免之命。屢頒而催科如故。朕處深宮之中。念慮有所未周。見聞有所未及。以致民隱不能上達。恩澤不能下流。官民乖隔。道路怨咨。禍變可虞。上天

示警。乃於正德九年正月十六日。復有乾清宮之災。累朝經營。一旦煨燼。望之蹙額。言之痛心。九廟震驚。六宮危惕。凡我臣民。罔不疑懼。咎徵所自。實在朕躬。已齋戒薰沐。虔禱於天地宗廟社稷山川。跼蹐敬畏。惟圖自新。復諭令羣臣。同加修省。極陳時政。冀以消弭禍端。仰答天譴。尤念天之視聽。皆自我民。民心獲安。天意乃順。特稽舊典。用布新恩。惠此下民。固我邦本。將以延宗社萬萬年無疆之休。於戲。天惟顯思。仁愛實存於謹告。民亦勞止。予惠必先於困窮。惟德政之交修。庶天人之協應。播告中外。咸使聞知。正德九年正月二十六日。

上太皇后諡詔

詔曰。朕恪守慎終之禮。將崇升祔之儀。睠廷議之僉同。儼天心之鑒格。爰循舊典。上薦徽稱。仰惟皇祖妣。大行慈聖康壽太皇太后淑德至仁。本乎天性。配我皇祖。考憲宗純皇帝。母儀天下。餘二十年。內言不出於宮闈。美化自行於中外。我皇考克承慈訓。既增嗣服之光。予一人甚守丕圖。亦賴詒謀之善。顧大恩之未報。奄至養之終違。況當摧割之中。舉是追崇之典。自非鴻名之稱實。曷揚盛美於將來。已於三月初三日。祇告天地宗廟社稷。恭上尊諡曰孝貞莊懿恭靖仁慈欽天輔聖純皇后。嗚呼。厚德難名。罔極終天之念。徽音不已。尙垂來裔之休。布告萬方。俾咸知悉。正德十三年三月初七日。

世宗肅皇帝

卽位詔

詔曰。朕承皇天之眷命。賴列聖之洪休。奉慈壽皇太后之懿旨。皇兄大行皇帝之遺詔。屬以倫序。入奉廟社。內外文武羣臣及耆老軍民。合詞勸進。至於再三。辭拒弗獲。謹於四月二十二日。祇告天地宗廟社稷。卽皇帝位。深思付託之重。實切兢業之懷。惟我皇兄大行皇帝運撫盈成。業承熙洽。勵精雖切。化理未孚。中遭權姦。曲爲蒙蔽。潛弄政柄。大播兇威。朕昔在藩邸之時。已知非皇兄之意。若欲興道致治。必當革故鼎新。事皆率由乎舊章。亦非敬承夫先志。自惟涼德。方在沖年。尙賴親賢。共圖新治。其以明年爲嘉靖元年。大赦天下。與民更始。嗚呼。君人之道。在昭德以塞違。繼世之規。惟更化而善治。特頒渙號。用慰輿情。弘施大賚之恩。永錫太平之福。四方臣庶。咸使聞知。正德十六年四月二十二日。

上諭詔

詔曰。自古人君功德。施於當時。咸有顯號隆名。以祔於廟饗。傳諸萬世。我朝列聖相承。率由茲典。有不可易者。恭惟皇兄大行皇帝。以英武之資。剛健之德。嗣登寶祚。十有七年。於茲矣。任賢圖政。節財阜民。克詰戎兵。屢平僭亂。淵慮弗遑於寢食。皇威昭布於邇遐。真有安不忘危。持盈保成之志。用是宇內咸乂。邊陲晏然。治理之興。方有望於今日。夫何不幸。龍馭上賓。天下臣民。攀號莫逮。顧予涼薄。肇纘鴻基。允惟付託之艱。方深在疚之慟。追慕遺烈。率遵舊章。謹命在廷文武羣臣。參稽禮文。議薦諡號。博采衆論。協於至公。乃於今年五月初八日。祇告天地宗廟社稷。奉冊寶。恭上大行皇帝尊諡曰。承天達道英肅睿哲昭德顯功宏文思孝毅皇帝。廟號武宗。嗚呼。盛德法乎乾剛。實揄揚之莫罄。徽稱薦夫殷禮。尙昭顯於無窮。布告

萬方咸宜知悉。正德十六年五月十一日。

上尊號詔

詔曰。自古帝王以孝治天下。尊親之禮。其來遠矣。仰惟聖母慈壽皇太后。敬相皇考孝宗皇帝。訓育皇兄武宗皇帝。含弘光大。蔚有顯聞。皇兄奄棄臣民之日。中外岌岌。賴我聖母上念宗社大計。擁翊冲人。入繼大統。及翦除兇逆。潛消禍變。呼吸之際。安定家邦。功德並隆。揄揚莫既。不舉尊崇之典。曷伸孝敬之誠。皇嫂皇后。巽順含章。安貞應地。克儷宸極。表正宮闈。母儀有年。名稱宜異。重念聖祖母貴妃聖善慈仁。靜專明哲。事我憲祖。贊理內庭。燕謀兆祥。澤降佑啓。本生父興獻王聰明天授。仁孝夙成。河間好禮。東平樂善。餘慶流衍。垂裕後人。本生母興獻王妃莊敬持身儉勤。治內媿德。任姒遠嗣。徽音誕育。眇躬丕承。前烈雖傳。序之統義有所專。而天性之恩。自不容已。用是遠稽載籍。博采公言。率籲文武羣臣。謹奉冊寶。上聖母尊號曰昭聖慈壽皇太后。皇嫂曰莊肅皇后。又奉聖母懿旨。上聖祖母尊號曰壽安皇太后。本生父母曰興獻帝興國太后。大禮既舉。洪恩誕敷。嗚呼。愛由親始。廣孝必因乎心。恩以序推。爲治可運於掌。詔告天下。咸使聞知。嘉靖元年三月十五日。

立皇后詔

詔曰。君理外治。后理內治。天下之大義也。自古聖帝明王。彝章具載。朕繼承大統。夙夜孜孜。敷求賢哲。共圖治理。近者聖母昭聖慈壽皇太后。念內治之重。特諭所司。簡求令淑。作配朕躬。朕勉尊慈命。乃敢詔告。

天地宗廟於嘉靖元年九月二十八日册立陳氏爲皇后正位中宮以共承宗祀奉養四宮用衍本支萬萬年之慶布告中外咸使聞知嘉靖元年十月初一日

加上尊號詔

詔曰朕恭膺天命嗣承皇兄武宗毅皇帝大統祇奉宗祀惟我皇考孝宗敬皇帝神謨聖政是繼是行夙夜孜孜圖惟化理以治本於孝故雖天子必有所尊仰惟聖母昭聖慈壽皇太后擁翊之功至大莫馨名言本生父母興獻帝興國太后鞠育之恩至深罔殫報稱尊稱未極恆用慊然爰稽舊章祇告於郊廟社稷率文武羣臣恭奉册寶加上聖母尊號曰昭聖康惠慈壽皇太后興獻帝尊號曰本生皇考恭穆獻皇帝興國太后尊號曰本生聖母章聖皇太后義專隆於正統禮兼盡夫至情旣舉縟儀肆彰大慶於戲愛敬始於家邦致一人之達孝仁恩徧於海宇得萬國之歡心布告臣民俾咸知悉嘉靖三年四月十九日

定稱謂詔

詔曰人君爲治必本於孝道聖人論政必先於正名孝在篤於親而名貴循其實自古及今未有外是而能化成天下者也朕本憲宗純皇帝之孫孝宗敬皇帝之姪恭穆獻皇帝之子逮皇兄武宗毅皇帝上賓之日仰遵聖祖兄終弟及之訓屬以倫序當立遺詔命朕嗣皇帝位昭聖康惠慈壽皇太后乃以懿旨遣官迎朕入繼大統朕受明命位於臣民之上者於茲已三年矣尊稱大禮屢命廷臣集議輒引漢定陶共皇宋濮安懿王二事爲據至再至三而其論未定朕心靡定蓋伯姪父子乃天經地義豈人所能爲乎況

漢宋二帝在衣裳垂御之日。嘗爲立子。而朕則宮車晏駕之後。入奉宗祧。實與爲人後者不同。今亦爲繼嗣。亦非我聖祖垂訓初意。是豈徒禮官之失。而亦朕冲年未能決擇之咎也。朕祇承九廟。尊養三宮。正統大義。未嘗有間。惕然此心。夙夜不忘。惟恭穆獻皇帝章聖皇太后。朕之父母也。劬勞之恩。昊天罔極。雖位號已隆。而名稱未正。因心之孝。每用歉然。謹已告於天地宗廟社稷。稱孝宗敬皇帝。曰皇伯考。昭聖皇太后曰皇伯母。恭穆獻皇帝曰皇考。章聖皇太后曰聖母。各正厥名。揆之天敘。人倫。情旣允稱。而禮亦無悖焉。猶慮天下臣民。未能知悉。特茲詔諭。以申朕拳拳孝親之誠。夫孝立則篤。近舉遠。而家邦四海。咸囿於至仁。名正則言順。事成。而禮樂刑法。各臻於至理。朕蓋庶幾於古帝王之盛也。顧惟昔者。孝未遂於尊親。事多拂於天性。君臣之際。未免少乖。舉措之間。或多違戾。今彝倫攸敘。大禮告成。朕方欲同心以和典禮之重。敬事以建臣民之極。爾內外諸司百僚。務宜體朕之意。有官守者。修其職。有言責者。盡其忠。凡舊章未復。弊政未除。人才未用。民生未安。邊備未飭。軍儲未充。一切有俾於政理。利於軍民者。其一一條具聞奏。朕將舉而行之。期於得萬國之歡心。致天人之佑助。以成至治。以全大孝。則朕之志。於是乎可慰矣。布告中外。咸使聞知。嘉靖三年九月十五日。

遇災變寬恤詔

詔曰。朕惟人君。奉天明命。統御萬方。作人君長。朕以菲薄之資。起自宗藩。入繼祖宗大統。夙夜孜孜。罔敢自豫。惟敬天法祖。親賢圖治。以福斯民。然必賴左右輔導文武羣臣。協心贊助。以匡不逮。夫自卽位以來。

災變頻仍而去歲之災尤大且異。豈非政化未臻。民心積怨。上干天和。朕深用驚懼。寢食靡寧。究其咎本。實予一人所致。而內外文武百官。亦不無責輔導之臣。不能盡誠贊襄。部院之官。不能協力任事。居言路者。言非忠讜。職宣化者。澤不下流。弊政多端。欺上虐下。民心怨咨。無所控訴。朕深居九重。四方民隱。無由盡知。特令部院科道各陳所當興革事宜。開具上請。朕與輔臣采其切實可行者行之。凡爾文武官員。當痛切省戒。深體朕畏天恤民之意。各盡乃職。各修乃事。爲上爲德。勉效忠誠。爲下爲民。加意撫恤。務期道洽忻悅。上回天意。導迎休祥。陰陽調和。民物康乂。以成熙皞之治。勿得視爲虛文。欽哉戒哉。於戲。應天以實。必上下之交修。視民如傷。合遠邇而一致。當春陽發育之候。施同仁曠蕩之恩。庶幾化洽於人和。用以培植乎國本。詔告天下。咸使聞知。嘉靖六年二月十三日。

郊祀禮成詔

詔曰。朕尊太祖高皇帝敬天之制。恭建圓丘於南郊。於今十一月二十二日冬至。祇行大報之禮。朕惟人君上奉皇天而作之子。下主億兆而作乎王。是以上古聖帝明王。咸克上奉於天下。勤於民者。乃以其祇若天心。勤恤黎庶。洪惟朕皇祖高皇帝當夷狄亂華之時。稱皇天之眷求。乃挺立紀綱。掃氛除垢。復建人極。重修五典。於是奉郊廟社稷。有儀文之可推。有憲章之可法。用昭假於神祇。祖考允爲創世之首務。萬代不刊之巨範也。朕以藩服。仰荷天命。作厥辟於萬方。顧其寡昧。深懼弗勝。茲恭率祖之攸行。用欽吳穹之眷注。上賴皇天垂鑒。祖考蔭翊。以及左右勳輔賢良。矢心殫力之所贊成者也。於朕則無一得焉。嗚呼。

大報旣成。庶遂微忱之懇。恩澤適布。以敷洪造之仁。尙賴忠賢匡朕一人之不逮。期臻至治。用光列祖之休嘉。詔告天下。俾悉聞知。嘉靖九年十一月二十三日。

元子誕生詔

詔曰。朕聞承祧主器。必在元良。繼位嗣服。惟宜傳長。故曰君之儲貳。是謂今昔咸同。朕以支人。仰承皇天。洪眷纘嗣。皇祖丕圖。卽位於今。已訖一紀。大婚去後。又越十年。每思傳繼之久。虛若履薄冰而戰懼。上廬聖母。竚望之深。下遺臣民。引領之至。朕心震惕。朝夕匪寧。昨歲元輔建策。慎選淑女。以備妃嬪之御。用廣嗣緒之求。朕請於慈命。聞於祖考。卜吉納九氏。以用資繁衍之祥。助烝嘗之職者。乃於今年八月十九日。皇天降祉。祖宗鑒蔭。朕第一子生。屬麗嬪閭氏出。是皆皇考聖母鍾祥積慶。而衍及孫謀者也。茲用播聞中外。誕布寬恤。於戲。主鬯得人。允副慈懷之怡慰。承家有繼。實昭佑我之通情。爰法舊章。用覃大賚。詔告天下。咸使知悉。嘉靖十二年八月二十五日。

立后詔

詔曰。朕惟大婚爲王教之始。克謹於初。閨門爲政化之原。其終尤慎。是以易著家人之訓。詩昭窈窕之稱。二女妻於舜。乃致風動四方之休。一德配於周。而爲關雎二南之美。凡有天下者。豈不想慕之。未若其時也。朕以宗人。仰承明命。纘嗣丕圖。方當紀元之初。已舉好逑之典。始配以疾而崩。繼立作孽而廢。矧歲時相我宗祀。不可無人。而左右承養慈顏。豈宜少后。弗正厥名而定位。焉能贊治以承乾。乃卜今年正月望。

之令辰。祇聞於皇天后地。請命於列祖皇考。白於聖母。遣文武重臣持節奉制。冊立德嬪方氏爲皇后。贊朕內治。統職陰柔。率教六宮。母儀四國。於戲。天施地生。大本藉茲。而是建。乾剛坤順。洪基由此。以隆興。爰斯申立之禮。成用播三辭。而徧諭。數悉臣民。咸宜知之。嘉靖十三年正月十八日。

元嗣繼生詔

詔曰。朕惟稱孝。以有後爲大。著在聖經。人生而望嗣。則同。王者特重。欲宗祀之緜緜。須繼承之續續。比歲朕荷天錫。元祥未久而已。由斯聖母重其懷。臣民重其望。朕每慮此。若臨深淵。而用懼惶。茲者是歲孟冬之六日。仰戴皇天降鑒。幸惟皇祖慶源。朕繼生元嗣。乃昭嬪王氏出焉。爰循往例。申布恩宜。令至所司。主者卽行於戲。震鬯毓祥。上永宗祧之祀。離明增耀。下敷臣庶之歡。詔告天下。俾悉聞知。嘉靖十五年十一月初六日。

禘祫禮成詔

詔曰。朕惟王者之政。莫不以祀典爲先。故謂國之大事。在祀與戎。而祀尤重焉。夫郊所以事天。廟所以事先。其道一而已矣。未有不相關者也。朕以冲愚宗末。仰叨上帝下簡。俾嗣天位。君臨四方。思典禮之重大者。祀爲首焉。每念於茲。切興長慨。柰何經傳所傳。亦多雜亂。聖賢不爲接緒。聖經殘破。莫修。是以郊祀襲合祭於屋下之文。廟祭沿異室同堂之制。褻瀆之甚。謂比同牢。功德不別。太祖莫尊。朕乃不暇他顧。祇聞於皇天。默卜於皇祖。親簡忠賢。與之同力。首建園丘。方澤。以事天地。明陰陽之位。而不可混襲。續創昭穆。

羣廟以祀祖宗。彰太祖爲嘗專尊之主。復作太宗廟於羣廟之外。表祖功宗德之不遷。以享百世之祀。更皇考廟曰獻皇帝廟。別擇吉區。以避渠道。大工悉遂。定五歲大舉禘祭之禮於太廟。以祀皇初祖。而奉太祖配焉。每特享祖宗。以立春於本廟。夏秋冬皆合享於太廟。循時禘之典。季冬仍修大禘禮於太廟。皇考止修四時之祀。以避豐禴之嫌。奉安旣成。將覃恤典。由是先致孝於慈闈。庶伸誠於璇闕。恭上兩宮徽號。曰昭聖恭安康惠慈壽皇太后。章聖慈仁康靜貞壽皇太后。慶禮旣備。推愛宜頒。主者遵承於戲。郊社正而廟制正。庶慊朕事天事祖之心。慈壽尊與慈仁尊。允合夫人情禮情之至。爰推恩恤。肆及宗親。尙期臣工之協恭。俾爾弱君於至治。弘播詔示。悉使聞之。嘉靖十五年閏十二月十二日。

上成祖睿宗廟號詔

詔曰。朕惟天眷我國家。皇祖太祖高皇帝始肇於先。皇祖太宗文皇帝戡成於後。二帝之玄功盛烈。高厚同焉。朕以支宗。荷天下簡。用纘寶位。於茲已一十七載矣。追繹我文皇帝之功光太祖。澤蔭後昆。繼惟我皇考獻皇帝躬備聖德。慶延於朕。輝前庇後。載籍弗聞。文皇帝也。宜有功而祖報焉。獻皇帝也。可有德而宗稱焉。庶幾仲孫子崇。顯尊親之至意。適因法古典。明堂之舉。乃稽循嚴考配帝之經。議命在廷百官。會訂至於再三。師錫之我。僉謂之同。朕以九月九日。躬祗奉於園丘。敢以大禮請命。分命諸使。徧奉朕誠。各請方澤宗廟社稷以告。越二日。率羣臣奉寶冊。崇尊皇祖文皇帝廟號尊諡爲成祖。啓天弘道高明肇運聖武神功純仁至孝文皇帝。尊上皇考獻皇帝廟號尊諡爲睿宗。知天守道洪德淵仁寬穆純聖恭儉敬。

文獻皇帝。卽日恭行皇考。祔享於太廟。仍藏主於原寢。是月之二十一日。太剛。朕躬行季秋堂禮。於大內立極寶殿。祇享於上帝。奉我皇考。睿宗獻皇帝配神。於戲肇。太享於初成。罄物與民胞之意。奉嚴親而上配。答生成罔極之恩。禮典忻成。慶同民物。凡在堪輿之內。聞詔宜悉欽哉。嘉靖十七年九月二十一日。

崇薦大號詔

詔曰。朕聞洪荒草昧。三才未立。追厥開天闢地。於惟上帝宰御焉。載稽往元。醜亂我夏。於惟皇祖高皇帝出焉。次建寶圖。以成高皇之烈者。我太宗皇帝也。申啓明運。以光前勳之盛者。我皇考功德也。於是慶鍾澤積。至於今日。朕方當童昧之年。丕受仔肩之重。眇末弗肖。祇叨荷於天眷洪深。愚暗不才。欽感沐於帝恩隆大。位處王公士兆之上。君臨四國萬姓之尊。圖報稱於上帝皇祖太宗皇考之心。終日思維。十復七歲。矧人君稱皇。取莫大之名於天。又復自謂曰。天子而推崇如事父之情。何未之思。且蒼旻旻上。未盡高覆廣編之極。是以朕特竭愚念。已於此月一日。上辰。祇具册表。親率臣民。趨詣園丘。拜上皇天上帝大號。卽復恭思萬類億物。皆本乎天。朕爲民物報事天之心。旣少少盡矣。惟人之本。則非祖何用。是因追本之誠。亦實昭我皇祖丕烈古前所無者。故就一辰奉册寶。偕皇后率臣妾躬詣太廟。崇薦皇祖聖號曰太祖。開天行道肇紀立極大聖至神仁文義武俊德成功高皇帝。高皇后肇修陰教。允輔天德。加薦慈諡曰孝慈。貞化哲順人徽。成天育聖至德高皇后。復惟太宗皇帝克成太祖洪業。功備創守。前於九月十一日。加尊爲成祖啓天弘道高明肇運聖武神功純仁至孝文皇帝。初以秋季大享之典。所關爲民謝福。王者大

事。式循經義之正。特舉宗祀之章。況我皇考玄德升聞。輝前啓後。宜薦宗稱。卽此之十一日。恭上尊號爲睿宗。知天守道。弘德淵仁。寬穆純聖。恭儉敬文。獻皇帝。是月二十一日。祇大享上帝禮於宮右乾隅之玄極寶殿。奉皇考配帝。茲者六氣始復之辰。九舉大報之典。珪璧是奉。仰上帝已垂歆。祝帛是將。荷皇天之錫鑒。朕衷懼戴。莫罄名言。臣庶同情。敢稽天貺。特覃大賚之恩。敬布好生之德。於戲。事天事帝而事祖考。郊大報與堂大享以同伸。報功德而報生成。皇矣天矣。祖考斯並。盡慶豔神人。忭極民物。澤流帝惠。有血氣者。其思之以尊親。言露朕情。凡見聞者。宜念哉而祇澤。布於華夏。播彼夷虜。欽哉。嘉靖十七年十一月十一日。

冊立皇太子詔

詔曰。朕惟人君。奉天命而君臨天下。所重者大本係焉。是以自神禹至今。率遵此道。用一人心也。比歲朕荷皇天俯眷。元嗣誕生。數歲之間。疊承洪造。顧朕何人。鉅膺帝德。深惟皇祖垂裕之恩。列聖累積之大。皇考功德玄隆。皇妣善慈廣萃。慶集朕躬。顯受丕荷。至有今日。茲念祖宗家法。具在。慈屬切朕。赤中冀文武羣臣屢請。左右元僚力贊。咸以國本之定。此其時也。朕亦思惟欲圖久大之治安。須早定立於儲貳。兼以蕃輔之重。故同建本而行。適取昨旦元吉。是維今月一日。朕躬祇請命於皇天。皇祖分命諸臣。告於方澤。列聖大社稷帝社稷神祇。大頒冊寶。立朕元子載。輦爲皇太子。分封第二子載。至爲裕王。第三子載。圳爲景王。慶典旣成。恩澤斯覃。舉昭代之彝章。答敷天之至望。於戲。宜王宜君。衍本支於百世。錫福錫祿。溥仁

元於萬方。允協神人之大猷。益篤邦家之永祜。徧播華夷。俾悉知悅。嘉靖十八年二月初四日。

駕幸承天詔

詔曰。朕聞聖人之治天下也。率皆以孝爲先。蓋所以教民作範焉。弗孝何以上人乎。朕以菲才。叨承天眷。君茲黔首。主御華夷。所事者人極重焉。故首正父子天倫之正。復宗考廟當有之宗。適者積衍深深。累於慈聖。鸞輿遐邁。哀徒摧五內之傷。鳳寢再圖。禮厥宜二親之共。匪自經營。何慰夙夜。乃於今年仲春之十有一日。奏告於天地宗廟社稷。徧達於百靈衆秩。於十有六日。駕徂荆楚之舊藩。躬視承天之嚴寢。越二十有五日。駐蹕龍飛內之卿雲宮。齋潔肅誠。定禮備樂。有五日元吉。祇奏告之祀於皇天。奉皇考獻宗獻皇帝上配。報生恩而拜謁顯陵。答神功而躬祭社稷。以及道經之望。徧兼舉諸王羣職。迎覲獻誠。雖未如四狩之巡。亦以見省方之意。且朕何人。敢堯舜似。祇欲伸送終之道。以求夫永世之安。庶幾教天下也。今玄寢之制。置旣詳。親體之尊安。攸定。但念本根所在。百姓繫懷。勞擾久時。民艱當軫。承天府自明年爲始。特免田租三歲。湖廣地方與免明年田租五分之二。北直隸河南二處。亦與免明年田租三分之一。用見朕懷恤之意。期以今月二十三日還京。於戲。慎終思永。立愛敬以式。臣民經始求臧。建中業以遺孫子。尙賴忠賢。匡於至治。詔爾華夏。宜悉知之。嘉靖十八年三月二十日。

太廟災詔

詔曰。朕惟蓬古之世。道隆化洽。人淳氣和。其爲君者曰堯曰舜。而爲臣者乃禹乃益。不可及矣。降是禹湯。

文武繼作而有稷契周召以佐之。亦不可尙矣。下而曰漢唐宋。其間誼辟英君之時。見終未若上古之休。或多災害。絕未有如今日之變者也。朕皇祖高皇帝應天順人。復夏掃穢。功德之盛。無前大烈。朕以藩嗣。當皇兄昇遐之日。命朕入繼大統。朕嗣天位十有七歲之間。思報祖德。先正太祖南面之尊。備建七廟之制。加薦尊諡。用馨追崇。賴二三大臣協恭力贊。然非朕變更成典。實本信任古道。他悉罔忌。自謂報答本源之情。少盡詎意有今日之變云也。今年四月五日夜。初正以恆陽之雨爲懼。當時仁廟倏忽火起。驟然暴作。加以猛風四發。人無措手。相視號顛。莫容救護。卽刻仁廟成祖廟主同燬。延熾太廟及昭穆羣廟。祇存睿宗廟安全。朕自昨冬孟月患疾。至今元氣未復。精神失。飲食減。昔氣血兩虧。一聞奏報。若墜深淵。欲赴火中。思無濟事。且因病未全復。益加瘡痍。力疾奉慰祖宗於景神殿。祇載罪奏謝於上帝皇祇。告於太社。遣官徧祭百神。書報宗室諸王。詔示天下臣庶。庶使知一人之重罪。致上延七廟之御棲。按厥咎原。無可容已。爰將寬恤之文。預示圖復之力。於戲。仁敬孝以爲德。必自今而加勉。責在台躬。寅恭忠而弼亮。須伊始以交修。望爾有位。要究夫邦興於多難之機。勿便謂后弗類先王之行。雖時君罔肖申宣。當念我邁德湯武。共圖夾持之道。用盡回天之誠。敷告中外。都使聞知。嘉靖二十年四月。

奉安神主詔

詔曰。朕惟宗廟之禮。所以序昭穆。孝子之至。莫大乎尊親。古之訓也。我國家宗廟之制。自太祖肇基。首立四親廟。其後更制同堂異室。此固稽古之制。用協七廟之文。是以創建。式師周典。迺以鬱攸不戒。原之昭

穆不明用是復同堂之建實有不得已之情爰情更制崇構新宮時祫祭享奉太祖正位居尊成祖及列聖與我皇考睿宗皇兄武宗俱同堂而序享獻之節悉用往儀大功既就茲以七月初一日吉辰敬告成事奉安列聖神主聖靈希妥朕志莫伸維昔典禮之成宜廣推仁之惠於戲闕宮有恤鴻規既復於巍崇寢成孔安殷薦克伸於妥侑固未副沖人之永思特蚤慰一時之孝念也詔告天下尙有聞知嘉靖二十四年七月日

世宗遺詔

詔曰朕以宗人入繼大統獲奉宗廟四十五年深惟享國久長累朝未有乃茲弗起夫復何憾但念朕遠奉列聖之家法近承皇考之身教一念惓惓本惟敬天勤民是務祇緣多病過求長生遂致姦人乘機誑惑禱祠日舉土木歲興郊廟之祀不親朝講之儀久廢既違成憲亦負初心邇者天啓朕衷方圖改轍而遽嬰疾疾補過無由每一追思惟增愧恨蓋愆成美端仗後賢皇子裕王仁孝天植睿知夙成宜上遵祖訓下順羣情卽皇帝位勉修令德勿過毀傷喪禮依舊制以日易月二十七日釋服祭用素饜毋禁民間音樂嫁娶宗室親郡王藩屏爲重不可輒離封域各處總督鎮巡三司官地方攸繫不許擅去職守聞喪之日各止於本處朝夕哭臨三日進香差官代行衛所府州縣并土官並免進香郊社等禮及朕祔葬祔享各稽祖宗舊典斟酌改正自卽位至今建言得罪諸臣存者召用歿者卹錄見監者卽先釋放復職方士人等查照情罪各正刑章齋醮工作採買等項不經勞民之事悉皆停止於戲子以繼志述事兼善爲

孝臣以將順匡救兩盡爲忠。尙體至懷。用欽惟命。詔告中外。咸使聞知。嘉靖四十五年十一月十四日。

明書卷五十五

志五

綸渙志五

穆宗莊皇帝

登極詔

詔曰。惟我祖宗聖聖相承。至治鴻功。超越千古。暨皇考大行皇帝。以經文緯武之德。建安內攘外之勳。增光先朝。垂庇後世。方幸永賴。遽爾上賓。特廛憑几之言。屬以神器之重。朕煢煢在疚。本不忍聞。而文武羣臣下及耆老軍民。合詞勸進。至於再三。不得已。乃遵遺詔。於是月二十六日。祇告天地宗廟社稷。卽皇帝位。以明年爲隆慶元年。仰惟末命之昭垂。深望繼述之兼善。俛焉自省。豈所能勝。然而先志不可不成。聖訓不敢不奉。是用推類以盡義。通變以宜時。期衍舊恩。遙宏新化。於戲。覲耿光而揚大烈。方勉盡於孝思。贊帝軌而翊皇猷。實有資於忠藎。凡爾有位。尙體朕心。各據匡輔之誠。共保熙昌之祚。播告中外。咸使聞知。嘉靖四十五年十二月二十六日。

世宗尊諡詔

詔曰。朕惟自古聖王。其生也。天下之人相與尊而親之。其歿也。相與頌而思之。若禹湯文武是也。洪惟我皇考大行皇帝以上聖之德。撫中興之運。湛恩所被。莫不歸仁。明威所加。罔不震懾。蓋在臨御之日。爲天下所尊親久矣。逮乎宸衷厭世。龍馭遐升。朕銜哀茹荼。不勝瘠毀。而凡臣庶亦莫不摧心泣血。有喪考之感焉。茲朕敕諭文武羣臣。稽古禮文。議薦謚號。博參輿論。允協至公。乃以正月十九日。祇告天地宗廟社稷。奉冊寶。恭上皇考大行皇帝尊諡曰。欽天履道英毅聖神宣文廣武洪仁大孝肅皇帝。廟號世宗。諒爾萬方。其頌而思焉之心。均無窮也。屬殷禮之旣舉。爰渙號之用頒。夫仰皇考之徽稱。則必信從其治教。感皇考之餘澤。則必翊戴於邦家。尙一乃心。用若予化。播告遐邇。咸使聞知。隆慶元年正月二十日。

孝恪皇后尊諡詔

詔曰。朕惟禮不可以忘本。而孝莫大乎尊親。是以自古聖帝明王。暨我祖宗列聖。續祚膺圖。君主天下。莫不致隆於所生。蓋天理人情之至也。成憲具存。在朕爲尤切焉。洪惟皇妣榮淑康妃。生稟巽明。躬備坤則。事我祖妣。旣克嗣於徽音。奉我先皇。寔贊成夫陰教。和惠洽乎九御。恭儉聞於四方。委祉發祥。誕育冲眇。不惟保愛之曲至。抑且訓迪之周詳。茲朕獲奉宗祧。紹列聖之洪休。續先皇之大業。固皆慈誨之貽也。願音容已隔。歎霜露之屢經。尊養欲伸。悲風木之不待。永言感慕。倍結深衷。乃考舊章。並詢輿論。特舉追崇之典。遙隆儷極之積。於正月二十一日。祇告天地宗廟社稷。恭上尊諡曰。孝恪淵純慈懿恭順贊天開聖皇太后。嗚呼。至恩罔報。鴻儀少展於孝思。大德難名。顯號但從於節惠。庶廣普天之譽。用之永世之辭。播

告中外。俾咸知悉。隆慶元年正月二十二日

立后詔

詔曰。朕聞古者天子聽外治。后聽內職。是以外內和順。國家理治。稱盛德焉。朕茲誕膺天命。君臨萬方。深惟王化之成。宜資女士之助。妃陳氏受命先皇。配朕潛邸。徽音克嗣。坤道夙章。是用祇告天地宗廟社稷。以隆慶元年二月初九日册立爲皇后。正位中宮。共承宗祀。庶宏四海之化。益開萬福之原。播告中外。咸宜知悉。隆慶元年二月十三日。

立皇太子詔

詔曰。朕惟自古帝王奉天子民。思宏永世之圖。莫不崇建元良。豫定儲貳。所以隆國本而繫人心也。我祖宗列聖造基纘緒。累洽重熙。率由茲道。朕荷天之眷。早錫胤祚。長子英姿岐嶷。睿質溫文。仁孝之德夙成。中外之情允屬。昨朕嗣登太寶。文武羣臣卽以建儲爲請。朕以子年方在沖幼。未之許也。茲者禮官復稽先朝彝典。疏懇至於再三。詢謀僉同。理難終拒。爰諏吉日。祇告於天地宗廟社稷。授册寶立爲皇太子。上以奉九廟神靈之統。下以慰兆人翊戴之心。盛禮旣成。普天同豫。肆頒渥澤。覃被多方。於戲。震男主器。益培萬載之丕基。巽命敷恩。用衍一人之大慶。詔告華裔。咸使聞知。隆慶二年三月十一日。

遺詔

詔曰。朕以涼德。纘奉丕圖。君主萬方。於茲六載。實夙夜兢兢。圖惟化理。惟恐有辜先帝付託。乃今遘疾彌

篤。殆不能興。夫生之有死。如晝之有夜。自古聖賢。其孰能免。惟是繼體得人。神器有主。朕卽棄世。亦復何憾。皇太子聰明仁孝。令德天成。宜嗣皇帝位。其恪守祖宗成憲。講學親賢。節用愛人。以緜宗社無疆之祚。內外文武羣臣。協心輔佐。共保靈長。斯朕志畢矣。其喪禮悉遵先帝遺制。以日易月。二十七日釋服。毋禁。音樂嫁娶。宗室親王。藩屏是寄。不可輒離。本國各處鎮守總兵巡撫等官。及都布按三司官員。嚴固封疆。安撫軍民。不可擅離職守。聞喪之日。止於本處朝夕哭臨三日。進香遣官代行。廣東廣西四川雲南貴州。及各處布政司七品以下衙門。俱免進香。詔諭中外。咸使聞知。隆慶六年五月二十六日。

神宗顯皇帝

登極詔

詔曰。我國家光啓鴻圖。傳緒萬世。祖宗列聖。創守一心。二百餘年。重熙累洽。我皇考大成皇帝。明哲作則。恭儉守文。虛己任賢。勵精圖治。蓋臨御六載。而天下晏如。四裔來賓。兆人蒙福。方燕詒之永賴。遽龍馭之上賓。顧命眇躬。屬以神器。朕方煢煢在疚。不忍遽聞。而文武羣臣及軍民耆老人等。合詞勸進。至於再三。辭拒弗獲。乃仰遵遺詔。俯順輿情。於六月初十日。祇告天地宗廟社稷。卽皇帝位。朕以涼德。方在沖年。惟上帝之眷命孔殷。祖宗之基業至重。兢兢夙夜。懼不克堪。尙賴文武親賢。共圖化理。爰暨萬方黎庶。與有嘉休。其以明年爲萬厯元年。與民更始。於戲。續大承休。惟奉累朝之成憲。布德施惠。用洽萬國之歡心。將升大猷。在謹初服。詔告天下。咸使聞知。隆慶六年六月初十日。

穆宗尊諡詔

詔曰。朕聞帝王有駿德豐功。昭著於當時。則必有鴻名顯號。垂示於萬世。斯古今之通義。國家之令典也。惟我皇考大行皇帝。聰明睿智。恭儉寬仁。懋聖學於輯熙。攬乾綱於獨斷。靈承帝命。軫恤民艱。先德政而後刑威。崇文教而修武備。外夷賓服。中國乂安。享六載之昇平。垂萬世之基緒。增光列聖。超越百王。功德之隆。蔑以尙已。不幸龍馭上升。攀號莫逮。朕以涼德。嗣守丕基。方纘述之是圖。豈光揚之敢後。謹命文武羣臣。參稽古禮。議薦崇稱。博采師言。協於公論。乃於今年七月初三日。祇告天地宗廟社稷。奉冊寶恭上大行皇帝尊諡曰。契天隆道淵懿寬仁顯文光武純德宏孝莊皇帝。廟號穆宗。於戲。乾坤高厚。固蕩乎其難名。日月昭垂。蓋渙焉而可仰。布告中外。咸使聞知。隆慶六年七月初四日。

敕諭文武羣臣

蓋聞理道之要在正人心。勸阻之機。先示所向。朕以冲幼。獲嗣丕基。夙夜兢兢。若臨淵谷。所賴文武賢臣。同心畢力。弼予寡昧。共底昇平。乃自近歲以來。士習澆漓。官方刊缺。鑽闕隙竇。巧爲獵取之媒。鼓煽朋儔。公事擠排之術。詆老成廉退爲無用。謂讒佞便捷爲有才。愛惡橫生。恩讐交錯。遂使朝廷威福之柄。徒爲人臣酬報之資。四維幾至於不張。九德何由而咸事。朕初承大統。深燭弊源。亟欲大事芟除。用以廓清氛濁。但念臨御茲始。解澤方覃。鈇鋤或及於芝蘭。密網恐驚乎鸞鳳。是用去其太甚。薄示戒懲。餘皆曲賜矜原。與之更始。書不云乎。無偏無黨。王道蕩蕩。無黨無偏。王道平平。朕方嘉與臣民。會歸皇極之路。爾諸臣

亦宜痛湔宿垢。共襄王道之成。自今以後。其尙精白乃心。恪恭乃職。毋懷私以罔上。毋持祿以養交。毋依阿。渙忽以隨時。毋嚙嗜翕訛以亂政。任輔弼者當協恭和衷。毋昵比於淫朋。以塞公正之路。典銓衡者當虛心鑑物。毋任情於好惡。以開邪枉之門。有官守者或內或外。各宜分猷念以濟艱難。有言責者公是公非。各宜奮讜直以資聽納。大臣當崇養德望。有正色立朝之風。小臣當砥礪廉隅。有退食自公之節。庶乎朝清政肅。道泰時康。用臻師師濟濟之休。歸於蕩蕩平平之域。爾等亦皆垂功名於竹帛。緜祿廕於子孫。願不美歟。若或沈溺故常。堅守塗轍。以朝廷爲必可背。以法紀爲必可干。則我祖宗憲典甚嚴。朕不敢赦。百爾有位。宜悉朕懷。欽哉。故諭。隆慶六年七月十六日。

兩宮徽號詔

詔曰。朕以寡昧。祇奉宗祧。永惟盡倫盡制之君。皆有尊親養親之典。蓋禮緣分定。而孝因心推。彝憲具存。朕曷敢後。恭惟我聖母皇后。體備坤儀。翼宣化理。敷遺後嗣。啓佑宏多。我聖母皇貴妃穆修壺教。克嗣徽音。誕育眇躬。恩勤備至。肆予小子。獲嗣丕基。惟皇考之光命是承。亦惟聖母之訓育是賴。崇功報德。實切朕懷。宜各極於尊稱。以永綏乎至養。是用博諮羣議。祇率舊章。以本年七月二十七日。謹奉册寶上聖母皇后尊號曰仁聖皇太后。聖母皇貴妃尊號曰慈聖皇太后。大禮肇舉。洪恩覃敷。於戲。福隆名壽。鴻庥祇迓。於三靈。愛始家邦。孝治永光於四海。播告中外。咸使聞知。隆慶六年七月二十八日。

神宗顯皇帝

冊立中宮詔

詔曰。朕惟兩儀之位。承乾以坤。萬化之原。由家而國。君聽外治。后宣內教。此天地之大義也。朕恭膺天命。嗣守祖基。夙夜兢兢。欲保茲厯。服傳之世。世。睠惟大婚之禮。所以昌祚基化。人道重焉。邇者聖母仁聖皇太后。聖母慈聖皇太后。特諭所司。簡求令淑。作配朕躬。朕仰遵慈命。謹昭告天地宗廟。於萬厯六年二月十九日。冊立王氏爲皇后。正位中宮。以共承宗祀。奉養兩宮。肇風化於九圍。縣本支於萬世。布告中外。咸使聞知。萬厯六年二月二十一日。

兩宮徽號詔

詔曰。朕惟帝王之孝。莫大尊親。稽我祖宗列聖。致隆所尊。顯號鴻名。有加無已。孝思維則。具有彝章。朕嗣統之初。屬在幼沖。罔知攸濟。惟我聖母仁聖皇太后。聖母慈聖皇太后。擁佑誨迪。備極劬勞。七載於茲。萬邦作乂。豈予寡昧。能勝負荷。實賴我聖母洪仁懿訓之所致也。迺惟恩德。莫罄報酬。茲當加禮之成。益篤慈闈之慶。謹稽舊典。申薦徽稱。祇告於郊廟社稷。率文武羣臣。奉冊寶加上聖母仁聖皇太后尊號曰仁壽懿安皇太后。聖母慈聖皇太后尊號曰慈聖宣文皇太后。顯揭鴻名於宇宙。於昭至德之光華。爰霈明恩。用覃廣愛。於戲。禮協義而稱隆。式備尊親之典。孝因心而廣愛。洪敷錫類之仁。播告寰區。咸宜知悉。萬厯六年三月初八日。

皇子誕生詔

詔曰。朕聞自古帝王。紹聖祈天。必隆胤祚。蓋以祗承宗社。茂衍本支。邦家之慶。莫大於此。朕以眇躬。嗣登大寶。於茲十年。幸方內乂安。四夷賓服。庶不墜祖宗丕構。惟大婚有年。熊祥未協。中外人心。舉深後望。朕用是不釋於懷。茲荷皇天錫佑。列聖垂庥。以今年八月十一日。第一子生。係恭妃王氏。出上副兩宮聖母。憂勤之念。下慰四海。臣民仰戴之情。粵稽舊章。用覃大賚。於戲。震符誕啓。縣統緒於萬年。解澤旁流。霈仁恩於九有。詔告天下。咸使聞知。萬曆十年九月初六日。

兩宮徽號詔

詔曰。朕聞家國之祥。無逾於昌後帝王之孝。莫大於尊親。累朝以來。著於彝憲。朕以寡昧。纂承祖宗之遺業。懼弗克堪。惟我聖母仁聖懿安皇太后。慈聖宣文皇太后。擁翼教誨。式臻治理。乃睠懷宗祧之重。於嗣續大計。尤惓惓焉。茲者恭荷天庥。誕生元嗣。發祥鍾慶。實惟慈澤之所貽。永念深恩。宜登顯號。爰祇告郊廟社稷。率文武羣臣。奉冊寶。加上聖母仁聖懿安皇太后尊號。曰仁聖懿安康靜皇太后。聖母慈聖宣文皇太后尊號。曰慈聖宣文明肅皇太后。用闡揚盛美。仰答洪慈。載考舊章。庸敷慶典。於戲。敦孝治於九重。申舉棊隆之典。霈德音於萬國。宏施不匱之仁。播告寰區。咸宜知悉。萬曆十年九月十一日。

寧夏平定詔

詔曰。朕纘承丕緒。君主華夷。內安外寧。茲二十載。蚤夜兢兢。惟敬天勤民是念。端居靜攝。毋敢怠荒。祇圖邊境乂安。與民休息。何期變亂之事。忽起朔方之間。逆賊哮拜。承恩父子者。本以夷種。冒竊冠裳。包藏

禍心素恃強很。乃搆叛卒劉東暘許朝土文秀等。借言撫馭乖方。糧餉虧剋。乘機煽禍。羣造反謀。戕殺命官。據城負固。妄意祿山之故事。敢萌元昊之邪心。辮髮從夷。僭稱王號。傳播偽檄。擅毀敕書。奪庫放囚。搜金括帛。燒毀衙舍。逼脅親藩。句虜爲援。毒民肆虐。欲奪靈州以成犄角。謀窺關陝而犯中原。九塞因是騷。三秦爲之震動。誠神人共憤。而罪惡滔天者也。幸賴皇穹厭禍。宗社垂庥。大小臣工效謀於內。文武將吏宣力於外。兵摧強虜。水灌堅城。犬羊膽寒。豺狼氣奪。旣熊羆之畢集。乃晝夜而兼攻。釜底遊魚。尙思奪鬣。檻中逸獸。無計逃生。衆士咸賈勇以先登。羣兇遂就擒而授首。三旬逆命。未馴于羽之來。六月興師。竟奏獶狁之捷。遙傳露布。驩動雷聲。解一方之倒懸。開三尺之密網。論功行賞。弔死扶傷。僭竊掃平。地方寧靜。除劉東暘等臨陣先誅。闔門受戮。今檻致哮承恩等。獻俘千里。傳首九邊。近足以洩忠義不平之心。遠足以垂叛亂無將之戒。逆天者孰能逃於憲典。犯法者果何益於身家。生靈不幸。以致於斯。天地至仁。豈樂有此。茲特宣示薄海內外。九邊四夷軍民人等。安分者爲良民。保身者爲長道。恪遵王法。共享太平。嗚呼。除殘去暴。赫彰天討之公。鑒往懲來。聳聽皇綸之播。布告天下。咸使聞知。萬曆二十年十二月初八日。

乾清坤寧宮災敕

朕恭承天命。嗣續丕基。二紀於茲。不敢荒豫。乃今三月初九日夜。乾清坤寧宮災。天降異殃。明昭嚴譴。煨燼累朝之締構。震驚聖母之起居。罪由眇躬。何所逃責。夙夜惶惕。省思愆尤。蓋緣朕自靜攝以來。郊廟弗躬。朝講希御。批答停閣。聽受闕疏。以致賞罰乖違。臣鄰玩愒。大僚不以準繩檢下。而曲徇人情。諸司不以

勤恪泄官。而但圖私便。巧文繁誚。銷鑠之口何多。畏事避難。肩荷之大實尠。爵賞日頒。而誰爲激勸。民力日竭。而莫之省憂。慎刑有令。而出入或失其平。懲貪雖嚴。而饋遺尙仍乎舊。供億繁滋。而邑里稱擾。戰守未息。而師徒告勞。凡爾等之曠官。亦朕躬之失德。干和召變。職此之由。振紀肅綱。宜自今始。茲用敕爾文武羣臣。其各大滿積習。痛加修省。有官守者。勿任情優游。而廢壞庶事。有言責者。勿徇私雷同。以長姦亂政。事關朕躬。當與天下更始。責在爾等。其尙交修。做予諸凡。釁萌悉加補塞。更勿矯厲虛名。飾增詭行。但長浮僞。益滋煩苛。如乖理道之經。致拂天人之意。憲章具在。朕弗敢私。罪命重頒。咸宜恪守。仍申飭在外郡國邊鎮軍民。有司一體遵行。庶幾仰對上天仁愛之心。永迓宗社和平之福。故諭。

火災詔

詔曰。朕以眇躬。祇膺天命。嗣守祖宗鴻緒。二十有四載於茲。夙夜兢兢。罔敢懈懶。迨乎邇歲。靜攝深居。蓋周慎於保身。匪宴安而厭事。百司庶務。覽斷未嘗不親。吏蠹民艱。謔諷惟恐不徧。顧焦勞徒切於上。而政令未協於中。致干天和。流形災變。昨於三月初九日戌刻。乾清坤寧二宮。悉被火災。戴天心之仁愛甚著。荷列祖之庇佑尤深。幸朕所居。不至延蔓。而法宮嚴寢。一時盡灰。永懷譴告之殷。實繇涼德所致。拊躬自責。震悸弗寧。已痛加悔懲。籲禱郊廟。嘉興海內。勉於維新。茲下罪己之言。共圖交做之實。夫萬方之有疾苦。如在朕躬。一人之省咎愆。宜令衆喻。尙恪恭以承天戒。咸濯祓以分主憂。大法小廉。益謹奉公之節。內寧外謐。期臻至治之庥。布告臣民。咸使知悉。萬曆二十四年三月二十五日。

殿災敕

朕以涼德。嗣守丕基。夙夜兢兢。克謹天戒。昨歲乾清坤寧宮災。驚悸未定。乃今年六月十九日。皇極等三殿復災。夫三殿乃朕奉天紹祖臨御萬方之地。視寢宮尤重。纔踰歲所。疊見咎徵。變不虛生。誰貽之戚。蓋緣朕之不德。闕於大中。第防乾柄之下移。不念亢陽之有悔。諧臣頌爲明君。則不覺其入深。戇士激以危亡。則更滋其不信。上下之交。否隔愆尤之積。日多。罹此大災。罪其焉諉。願爾中外百職。善能導朕者。誰以模稜爲長厚。旣無望其擔當。以訕訐爲風標。亦奚資於補救。言清行濁。至誠感發之謂何。陽是陰非。盡力維持之安在。事多請託。官靡執持。安攘無策。而動輒譸張。行業不修。而競爲浮詭。貪黷雖禁。苞苴之入。自如侈靡相高。素絲之風絕少。似此難窮之陋習。已塵往歲之戒書。曾莫省憂。重干災變。自懲自艾。朕旣知非。分念分猷。汝寧不愧。茲用敕爾文武羣臣。其各痛滌前愆。勉圖後效。大臣務正己率屬。無以禮法假人。小臣務精白守官。無以驕蕩凌德。共建持危扶顛之策。各據奉公憂國之忱。忠邪自照於朕衷。賞罰常懸於朕握。國豈負爾。爾無負予。巽命載頒。咸宜遵守。仍飭在外郡國邊鎮軍民有司一體遵行。庶承皇天仁愛之心。用延國家靈長之祚。欽哉。故諭。萬曆二十五年七月初五日。

三殿使災敕詔

詔曰。朕仰荷天庥。恭膺寶祚。二十有五載於茲。追惟嗣服之初。蓋亦無時豫怠。第緣歲積。頗恃政成。兼以多病侵尋。猶須深居靜攝。郊廟闕躬承之禮。朝講希臨御之時。喜怒有失其平。用舍未歸於當。章奏每滯。

官曹半虛。忠言寡聞。民隱莫達。方隅多故。兵食之征。調日繁。營造又興。開採之徵。求四出。加之旱乾水溢。析民室家。汙吏貪官。朘民膏血。叢此人怨。屢干天和。乃於萬厯二十五年六月十九日。皇極等殿。皇極等門。文昭武成二閣。內外周迴廊房。一時被火。夫寢宮煨燼。曾幾何時。正殿崇嚴。又復罹此。震驚列聖。憂感慈闈。踏地跼天。靡所容措。況一人統御之地。乃萬國衣冠所歸。天意若斯。朕實不德。茲已虔申籲禱。痛加艾懲。被志改圖。擔從今始。嚴敕庶位。各獻忠猷。惟天視聽在民。惟民歸依在德。爰稽典制。特布詔條。庶藉有衆之歡。以回皇穹之眷。消咎徵於已往。迓福祉於將來。於戲。我國家忠厚比於行葦。舊德宏深。予一人儆戒切於苞桑。新恩溥被。式慰渴懸之民望。仰承仁愛之天心。敷告四方。咸宜知悉。萬厯二十五年七月初八日。

平倭詔

詔曰。朕纘承洪緒。統理兆人。海澨山陬。皆吾赤子。苟非元惡。普欲包荒。屬者東夷小醜。平秀吉。猥以下隸。敢發難端。竊據裔封。役屬諸島。遂興薦食之志。窺我內附之邦。伊岐對馬之間。鯨鯢肆起。樂浪玄菟之境。鋒鏑交加。君臣逋亡。人民離散。馳章告急。請兵往援。朕念朝鮮世稱恭順。適遭困阨。豈宜坐觀。若使弱者不扶。誰其懷德。強者逃罰。誰其畏威。況東方乃肩臂之藩。則此賊亦門庭之寇。遏徂定亂。在予一人。於是少命偏師。第加薄伐。平壤一戰。已褫驕魂。而賊負固多端。陽順陰逆。本求伺影。故作乞憐。册使未還。兇威復煽。朕洞知狡狀。獨斷於心。乃發郡國羽林之材。無吝金錢勇爵之賞。必盡卉服。用澄海波。仰賴天地鴻

麻宗社陰隲神降之罰。賊殲其魁。而王師水陸並驅。正奇互用。爰分四路。并協一心。焚其芻糧。薄其巢穴。外援悉斷。內計無之。於是同惡就殲。羣酋宵遁。舳艫付於烈火。海水沸騰。戈甲積如高山。氛祲淨掃。雖百年僑居之寇。舉一旦蕩滌靡遺。鴻鴈來歸。箕子之提封如故。熊羆振旅。漢家之威德播聞。除所獲首功。封爲京觀。乃檻致平秀政等六十一人。棄尸藁街。傳首天下。永垂兇逆之鑒戒。大洩神人之憤心。於戲。我國家仁恩浩蕩。恭順者無困不援。義武奮揚。跳梁者雖強必戮。茲用布告天下。昭示四夷。明予非得已之心。識予不敢赦之意。毋越厥志。而干顯罰。各守分義。以享太平。凡我文武內外大小臣工。尙宜潔己愛民。奉公體國。以消萌釁。以導禎祥。更念彫力殫財。爲日已久。嘉興休息。正惟此時。諸因事征。加派錢糧一切。盡令所司除豁。務爲存撫。勿事煩苛。咨爾多方。宜悉朕意。萬曆二十七年閏四月初八日。

平播詔

詔曰。朕嗣承歷服。式奉先猷。欲人並生。庶幾不擾。八年以來。俄煩兵甲。賴天地廟社之靈。將相臣民之力。內攘外卻。無損國威。然彼皆文告。不好自投。釁鑊朕甚憫之。非爲快也。惟此播州。故有楊氏。爲夷長率。受我冠裳。子孫之仍藉有年。朝廷之覆露良厚。夫何其末胄。應龍者。安忍無親。大逆不道。當其嬖寵。戕嫡。淫刑禍民。毒痛一方。凶殘七姓。國人皆曰可殺。朕心不忍。加誅。因其漢官。疆以戎索。曲從贖死。爲德帝宏。而乃下愚不移。肆行無忌。敢爲慢辱。妄意薦窺。旣逋重慶之囚。遂決跳梁之志。收藏亡命。搆煽苗夷。震駭兩川。恫疑四海。朕猶時覃在宥。未卽移師。而賊因撫成驕。因驕成亂。內則僭越王章。無復人臣之禮。外則矜

謂物力有輕中國之心。掩不備於綦江。梗道塗於湖貴。爲臣若此。孰其堪之。夫帝王之道。推亡固存。邇者東西之故。胡不聞焉。是用一勞師徒。四徵饋餉。天休人力。涌霧屯雲。發蜀楚黔滇土著之兵。下秦晉吳楚如林之甲。婁崖山門之隘。平地九衢。涇潭河渡之深。崇朝一葦。賊徒鼠竄。僞社飄焚。穴擣塗窮。登高塞向。猶自謂重關百仞。可敵萬夫。困獸千羣。堪資一戰。豈知天心既吐。地險何憑。死鬪不能。詐降不可。百道圍而鳥飛絕。九塚合而蹇兔啼。突士盡而鼓聲哀。騷歌悲而豔妻訣。夫應龍以極惡就經。一死安贖。是命劉屍傳首。襲天嚴誅。其妻孥黨與七十餘人。檻來闕下。重者分裂。輕者鉗孥。自餘在播者。下傳近獄。有司報治。千年守土。一旦邱墟。伊誰實然。豈朕之意。於戲。漢封遠矣。代有棄置。蠻夷君長。人安與安。惟虔劉無度。予一人實不忍於赤子。亦明天地雖廣。日月無私。穢無遠而不疏。惡無微而可蘊。苟有昏暴淫虐。蔑常亂紀。朕雖欲赦。如天弗容。其明告口外。有土有身。視爲前車。各戒爾後。氛慝初消。瘡痍未起。師之所處。荆棘生焉。邑里蕭條。哀此熒獨。凡蜀楚滇黔有因用兵。加派錢糧。及一切可緩積逋。若誣誤輕條。並命所司酌量蠲宥。救乏振滯。蕩滌煩苛。咸與維新。安生樂業。布告中外。俾共聞知。萬厯二十九年正月十三日。

冊立冊封詔

詔曰。蓋聞帝王久安長治之道。莫重於崇建元良。我祖宗家法相承。惟長是立。所以厚國本。定人心也。朕長子常洛。孝敬寬仁。天鍾粹美。奉朕諭教。時敏厥修。今德器日益端凝。學業日益精進。允堪宏受。慰朕至懷。入敬奏於聖母。諏詢今十五日吉。授冊寶爲皇太子。仰承廟社之靈。俯順臣民之望。爰封第三子常洵。

爲福王。第五子常浩爲瑞王。第六子常潤爲惠王。第七子常瀛爲桂王。俾各守藩。共維大統。典禮旣成。普天同慶。丕覃渥恩。於戲。長男主器。益繇有道之長。衆子分封。茂衍無疆之慶。敷予德意。咸使聞知。萬曆二十九年十月十五日。

徽號詔

詔曰。朕以涼德。嗣承丕基。永惟大寶難持。無時逸豫。賴我聖母在上。所以擁翼沖人者。三十年於茲。罔極深恩。未知所報。茲者定儲分藩。實系慈訓。旣成典禮。宜備鴻稱。是用祇告郊廟社稷。率文武羣臣。奉冊寶加上聖母慈聖宣文明肅皇太后尊號曰慈聖宣文明肅貞壽端獻皇太后。夫天地難酬。日月難繪。豈能紓予一人之深願。庶幾鬯爾萬國之歡心。爰考彝章。誕宣闡澤。於戲。慶源遠濬。昭百代之徽音。渥惠旁流。副四方之後志。布告遐邇。咸使聞知。萬曆二十九年十月三十日。

元孫誕生詔

詔曰。朕惟自古帝王。祈天永命。咸曰子子孫孫。至於萬年。蓋申命用休。惟此爲大。朕以眇躬。嗣登大寶。三十三年於茲矣。睠惟國本至重。懋建元良。具舉婚儀。廣生絳緒。恭荷皇穹純佑。列聖厚培。以今年十一月十四日。皇太子第一子生。係欽命選侍王氏出。克昌胤祚。朕心載寧。上鬯聖母之徽懷。下發臣民之悅懌。宜宣德惠。以光典彝。於戲。元子元孫。協震符而浚瑞。永年永世。流解澤以凝祥。詔告萬方。咸宜知悉。萬曆三十三年十二月十五日。

徽號詔

詔曰。蓋聞雖麟趾之化。子孫蕃昌。實惟父母之德也。朕以菲薄。纂承祖宗之宏緒。仰憑聖母懿訓。安享治理。三十有四年於茲。深惟祧鬯之重。茂建元良。具舉嘉儀。以廣儲嗣。今聖母壽躋六袞。適誕元孫。帝祉宏施。豈予一人所能祇受。揆厥慶源。茲澤之所鍾大矣。是用涓今春二月十一日之吉。祇告郊廟社稷。率文武羣臣。奉冊寶。加上聖母慈聖宣文明肅貞壽端獻恭熹皇太后。光鴻名於彝典。昭駿德於海隅。慶典具成。大賚宜溥。於戲。貽孫謀以翼子。萬年開長發之祥。聚大順以怡親。四海霑旁流之澤。布告中外。嘉興同休。萬曆三十四年二月十八日。

上諡號詔

詔曰。朕惟禮先報本。難酬罔極之恩。孝大尊親。式渙綦隆之號。代存成憲。典合輿情。欽惟我皇妣大行慈聖宣文明肅貞壽端獻恭熹皇太后。毓秀陰精。冥心玄宰。含宏光大。羣品賴以資生。恭儉慈仁。六官因之從化。夙承皇考。嗣啓冲人。敬戒不忘。劬勞靡替。教自家而刑國。四十年太平之業。允藉鴻庥。謀貽子以及孫。億萬載有道之長。咸憑燕翼。方舉稀齡之慶。遽興大耋之嗟。愛日有懷。慕更深於五十。籲天無計。恨莫贖於百身。遺誥甫頒。悵音容之已隔。餘徽尙在。景模範以難名。特命禮官。恪循舊制。博諮於衆。勿爽其真。擬儷極之尊稱。盛美光昭。琬琰揚配天之顯烈。哀榮徧洽。埏垓卜以二月二十八日。祇告天地宗廟社稷。恭上皇妣尊諡曰。孝定貞純。欽仁端肅。弼天祚聖皇太后。於戲。璇宮旣闕。薦遐祉於九京。寶冊常新。播休

聲於萬禩。布告中外。悉使聞知。萬厯四十二年二月二十九日。

遺詔

詔曰。朕以冲齡。纘承大統。君臨海內。四十八載。於茲享國最長。夫復何憾。念朕嗣服之初。兢兢化理。期無負先帝付託。比緣多病。靜攝有年。郊廟弗躬。朝講希御。封章多滯。僚案半空。加以礦稅繁興。征調四出。民生日蹙。邊釁漸開。夙夜思維。不勝追悔。方圖改轍。嘉與天下維新。而遘疾彌留。殆不可起。蓋愆補過。允賴後人。皇太子聰明仁孝。睿德夙成。宜嗣皇帝位。尙其修身勤政。親賢納諫。以永洪圖。皇長孫宜及時冊立。進學。瑞王惠王桂王。各擇善地。令早就藩。封大小臣工。務協恭和衷。輔理嗣君。保乂王室。是皆朕惓惓之至意也。內閣輔臣。亟爲簡任。卿貳大僚。盡行推補。兩次考選。并散館科道官。俱令授職。建言廢棄及礦稅。誑誤諸臣。酌量起用。一切權稅。併新增織造燒造等項。悉皆停止。各衙門見監人犯。俱送法司查審。應釋放者。釋放。師東缺餉。宜多發內帑。以助軍需。陣亡將士。速加卹錄。喪禮遵舊制。以日易月。二十七日釋服。毋禁民間音樂嫁娶。宗室親王。藩屏爲重。勿得輒離本國。各處總督鎮巡三司官。地方攸繫。不許擅去職守。聞喪之日。止於本處哭臨三日。進香。差官代行。衛所府州縣并土官。並免進香。詔告天下。咸使聞知。萬厯四十八年七月二十三日。

光宗貞皇帝

卽位詔

詔曰。維我皇明。運祚隆昌。基圖鞏固。煌煌大厯。聖聖相承。我皇考大行皇帝。奉天臨民。四十八載。乾綱在握。解澤旁流。淵穆端居。而慮周海內。化成久道。而誠切日中。方垂恭己之衣。忽陟上賓之馭。顧命神器。異於眇躬。仰遵彌留。憑几之言。俯循臣庶。累箋之請。宗社大計。弗甚固辭。茲於八月初一日。祇告天地宗廟。社稷。卽皇帝位。永惟皇考。啓佑之深。慈嗣服覲。揚之匪易。有懷兢惕。若陟淵冰。尙賴文武親賢。一心一德。惟是邦家彝憲。是訓是行。屬茲蒞阼之初。宜渙維新之號。其以明年爲泰昌元年。大赦天下。與民更始。於戲。監成憲以罔愆。繼述祇承。夫志事同。民心而出。治興。釐用協於章程。凡在照臨。偕臻闡澤。布告中外。咸使聞知。萬厯四十八年八月初一日。

遺詔

詔曰。朕以眇躬。嗣登大寶。夙夜祇懼。罔敢寧居。於凡用人行政。遵明皇考遺命。力疾舉行。哀勞交萃。奄至彌留。定數未移。考終何憾。但念朕紹承洪緒。癸亥方新。志業未就。所期續述。端屬後賢。皇長子由棧。茂質英資。克荷神器。宜早嗣皇帝位。其恪守祖宗彝憲。親賢勤學。立政安民。朝講一遵典制。冠婚擇吉。蚤行出入起居。倍宜兢慎。左右侍御。務近端良。內外文武百執事之臣。尙懷隱痛。同心協贊。永保基圖。朕從皇考在天之靈。陟降閉觀。於志畢矣。喪禮依舊制。以日易月。二十七日釋服。毋禁民間音樂嫁娶。宗室親郡王。藩屏寄重。不可輒離封域。督撫鎮守都布按三司官員。地方攸繫。不許擅離職守。聞喪之日。止於本處。哭臨三日。進香遣官代行。衛所府州縣土官。並免進香。詔諭中外。咸使聞知。萬厯四十八年九月初一日。

熹宗哲皇帝

卽位詔

詔曰。維我國家。受天明命。累洽重熙。列聖相承。代增其德。我皇考大行皇帝元良主器。二十餘年。睿質聖資。夙炳靈於天授。禋躬繕性。兼式穀於庭。慕嗣纘鴻圖。誕敷文命。用賢納諫。每率祖以攸行。致治保邦。若惟日之不足。繫克勤與永慕。遽厭世而上賓。顧命眇躬。屬茲神器。朕煢煢在疚。豈忍遽聞。而文武羣臣及耆老軍民人等。累箋勸進。辭拒至再。情益懇切。乃遵遺詔。以九月初六日。祇告天地宗廟社稷。卽皇帝位。朕以涼德。方在幼沖。深維上天眷命之隆。祖宗付託之重。孰憑依而攸濟。在典則之作求。惟茲臨御之初。宜有渙頒之號。其以明年爲天啓元年。大赦天下。與民更始。於戲。繼述覲揚。勉率循於無斁。翼爲明聽。尙匡弼之是求。所賴文武親賢。殫乃心力。輔朕不逮。以成我皇考未竟之志。貽爾萬邦無疆之休。布告遐邇。咸宜知悉。萬曆四十八年九月初六日。

上廟號詔

詔曰。朕惟帝王御世。躬明德而致盛治者。其子孫臣庶。必立廟以宗之。稱天以諡之。用是表因心之達孝。亦將示萬世以至公也。洪惟我皇祖考大行皇帝。秉乾剛之上德。撫豫大之昌期。以純孝奉慈闈。以至仁調庶品。振綱肅紀。每在篤恭不顯之中。過化存神。聿成端拱無爲之治。威旣著於除殘禁暴。惠猶深於興滅存亡。迺四十八載之浹髓淪肌。若南北東西之懷柔震疊。可謂考三皇五帝而不謬。對二祖八宗爲有

光者矣。茲者率土鞠凶。普天喪考。朕銜哀茹痛。勉嗣洪圖。深惟繼述之初。無若顯揚之大。特敕諭文武羣臣。稽古禮文。博參輿論。形容盛德。恭薦崇稱。乃於九月初十日。祇告天地宗廟社稷。奉冊寶上皇祖考大行皇帝尊諡曰範。天合道哲。肅敦簡光。文章武安。仁止孝顯。皇帝廟號神宗。於戲。耿光大烈。揄揚莫罄。夫鴻庥續緒。紹基啓佑。長思於駿惠。布告遐邇。咸使聞知。萬曆四十八年九月十二日。

上尊諡詔

詔曰。朕惟孝隆所生。詒穀遙追。夫聖善禮返自始。尊崇式協於情文。維盡制以盡倫。自率親而率祖。榮哀駢萃。淑懿光宣。恭惟皇祖妣溫肅端靖純懿皇貴妃粹穆貞姿。柔嘉令則。恭慎贊中闈之化。倣效鷄鳴。婉愉奉長樂之慈。歡承燕喜。備坤儀以毗乾御。培震器而勸蒙功。主鬯觀成。既參勞於翼子。含飴隆愛。旋受祉以詒孫。方期介慶於無央。倏爾栖真而莫待。屬鼎湖將祔。期展孝思。乃玉几俄憑。尚稽成事。肆予眇質。奄紹丕基。維水有源。似續永懷乎啓佑。謂地蓋厚。慈徽宜罄夫揄揚。特命禮官博詢輿誦。爰遵永命。克舉上儀。儷冊升華。像服儷長秋之御。易名節惠。鴻稱昭永世之辭。卜以九月十三日。祇告天地宗廟社稷。恭上皇祖妣尊諡曰孝靖溫懿敬讓貞慈參天胤聖皇太后。於戲。大典承乎先志。在天昭聖孝之隆。徽音播爲休聲。率土慰母儀之仰。布告中外。咸使聞知。萬曆四十八年九月十四日。

上尊諡詔

詔曰。朕惟恩隆一本。尊崇式備。夫上儀禮達重闈。徽懿遙光於顯號。敷天並戴。永世同辭。恭惟我皇祖妣

孝端皇后柔順含章。安貞厚載。培二儀以發育。含萬物而化光。石鸞銜文。已鍾靈於芳族。軒龍躍采。遂正位於椒塗。奉兩宮而齊思媚之賢。承九廟而篤迓釐之慶。佐一人之宵旰。道贊垂衣。宏六寢之休嘉。慈均佩觸。位奠承華之主器。德並恩勤。祥徵興慶之含飴。勞深啓佑。萬年作述。謀燕子以貽孫。四紀昇平。教刑家而化國。方忻愛日。遽謝長秋。我皇祖感故劍而興懷。肆冲人撫遺捲而增慟。非借棊隆之典。曷伸罔極之思。魯頌姜姬。特重闕宮之報。詩稱文母。亦登清廟之歌。爰命禮臣。式稽成憲。博參輿論。共贊懿章。萃愛戴於臣鄰。誠通口史。摹芳徽於琬琰。禮備榮哀。卜以九月十三日。祇告天地宗廟社稷。恭上皇祖妣孝端皇后尊諡曰孝端貞恪莊惠仁明媿天毓聖顯皇后。於戲。瑤牒恆新。賁幽光於有赫。鴻名不朽。緬英爽以如存。布告中外。咸使聞知。萬曆四十八年九月十四日。

上廟號詔

詔曰。朕惟在昔聖帝明王。德盛化神。臣民頌戴。繼統之君。鋪揚休烈。昭宣徽稱。光於四方。垂諸萬世。於以顯親崇孝。典至重已。恭惟皇考大行皇帝聰明天縱。仁孝性成。震潛勵就將之功。離照章繼述之美。任賢若渴。下令如流。發帑金以給軍興。撤稅璫而拯民瘼。休聲四洽。湛澤旁周。雖照臨甫閱旬時。而俄頃同流天地。治平之效。日異月新。夫何諒陰未幾。上賓不待。率土均喪。考之痛。冲人切紹庭之思。維繼序之不忘。詎追崇之敢後。謹命文武羣臣。博詢輿誦。參協彝章。僉言既同。上儀肇舉。乃於今年十月十六日。祇告天地宗廟社稷。奉册寶恭上皇考大行皇帝尊諡曰崇天契道英睿恭純憲文景武淵仁懿孝貞皇帝。廟號

光宗於戲。帝德難名。卽揄揚之未罄。皇建有極。惟昭示以永存。布告萬方。咸使知悉。泰昌元年十月十七日。

上諡號詔

詔曰。朕惟慈恩罔極。報莫殫夫。追崇殷禮。告成情實。均於遐邇。惟爰天而升秩號。宜率土之共尊親。恭惟皇妣恭靜端懿溫惠元妃淑穆純姿。柔明至性。當重闡底豫。佐盟饋以承歡。宏六寢休嘉。普袞裯而著惠。維茲慶澤。誕啓沖人。愛不異於裏毛。恩勤備至。道猶先於燕翼。訓迪彌周。深懷長發之祥。永結終天之慕。乃龍軒之儀未正。而鸞馭之景俄淪。先皇軫故劍之思。有懷儷極。嗣朕享垂衣之佑。並舉升尊。仰日月之光華。盛德難窮。繪畫履露霜之悽愴。榮名用寄。瞻依爰命。禮臣并參輿論。敬循穆卜。照薦崇稱。於十一月初三日。祇告天地宗廟社稷。恭上尊諡曰孝元昭懿哲惠莊仁合天弼聖貞皇后。於戲。盼蠻情通。神理貫幽。明而不昧。哀榮禮備。芳徽被寰寓。以常尊。布告中外。咸使聞知。泰昌元年十一月初四日。

上諡號詔

詔曰。朕惟孝隆一本。恩重所生。自非肇殷禮以追崇。何以報慈劬於罔極。祖宗列聖。彝章具存。銜恤酬恩。於朕爲猶切焉。恭惟皇妣昭肅恭和章懿才人懿德夙成。徽音克嗣。爰從潛邸。佐睿聖之修。逮事重闈。宣肅雍之化。宮掖仰其儀法。和慶毓爲休祥。祐命自天。誕育眇質。保護寧惟顧復。誨提兼極。愛勞朕得以蒙被恩勤。底於成立。奄承基緒。獲奉宗祧。揆厥慶源。何莫非慈恩啓佑之詒也。顧音儀睎侍。驚三載之居諸。

帷几瞻依。結終天之隱痛。永言孺慕。鬱有哀思。屬嚴考之上賓。肆鴻儀之並展。升尊儷極。昭薦崇稱。於十一月初三日。祇告天地宗廟社稷。恭上尊諡曰孝和恭獻溫穆徽慈諸天鞠聖皇太后。於戲。聖善難摹。秩號祇從。夫節惠孝思不匱。榮哀期徧於邇遐。誕告萬方。咸使知悉。泰昌元年十一月初四日。

冊立中宮詔

詔曰。朕惟君統天下以爲家。后輔一人而正內。故大婚彝倫之本。風化所基。聖人謹焉。朕以冲齡嗣膺寶。麻惟是宗祧重計。夙夜祇念。茲者遵承皇考詔命。特諭所司。簡求令淑。作配朕躬。是用祇告天地宗廟。於天啓元年四月二十七日。冊立張氏爲皇后。正中闈而奉九廟。帥六壺以式萬方。茂開祚胤之祥。丕衍邦家之慶。布告中外。咸使聞知。天啓元年四月二十九日。

皇子誕生詔

詔曰。朕惟自古帝王。續圖繇麻。率隆胤祚。以重宗祧。朕以眇躬。紹承洪緒。夙夜祇念。皇祖皇考。儲祇垂麻。詒孫翼子。所望早昌。嗣續以慰在天之靈。蓋三年於茲。乃荷皇穹眷佑。九廟居歆。以今年十月二十二日。皇子誕生。係皇貴妃范氏出。嘉慶集於邦家。歡悰洽乎億兆。肆頒渥澤。覃被多方。於戲。震得男而應索。道開長發之祥。巽申命以疏恩。用佐維新之政。布告中外。咸使聞知。天啓三年十月十六日。

皇子誕生詔

詔曰。國家彙德存仁。聞馨受祉。天必錫子胤嗣。以昌世衍祚於無疆。朕卽位以來。夙夜祇畏。罔敢怠荒。冀

圖所以崇昭格而大庥美。幸賴玄穹垂眷。暨我皇祖皇考丕顯之靈。以今年十月初一日誕生皇子。爲容妃任氏所出。是日寶厯初頒。千官拜舞。而慶從天錫。喜自外傳。知爾萬方。普同歡悅。特援舊典。用沛新恩。於戲。周嗣振振。敢忘仁厚之訓。堯天蕩蕩。用成雍洽之休。恪爾奉行。服我新政。播告中外。咸使聞知。天啓五年十月二十五日。

懷宗端皇帝

卽位詔

詔曰。我國家列聖。纘承休烈。化隆俗美。累洽重熙。遠垂萬熙。我大行皇帝。仁度通天。英謨憲古。勵精宵旰。銳慮安攘。海宇快覩。維新疆土。勤思恢復。萬機總攬。六幕禔麻。方啓鴻圖。忽賓龍馭。爰膺顧命。及予眇躬。驚聞憑几之言。凜念承祧之重。而文武羣臣及軍民耆老。合詞勸進。至於再三。辭拒弗獲。乃仰遵遺詔。於八月二十有四日。祇告天地宗廟社稷。卽皇帝位。以明年爲崇禎元年。朕以冲人。統承鴻業。祖功宗德。惟祇服於典章。吏治民艱。將求宜於通變。毗爾中外文武之賢。諸子股肱耳目之用。光昭舊緒。愈懋新猷。於戲。際茲景命。維新嘉興。更始鑒於先王成憲。庶永無愆。乃若宣布詔書。俾阻深之咸耀。匡扶不逮。使次第而可行。惟爾百司。與朕一德。播告天下。咸使聞知。天啓七年八月二十四日。

冊立中宮詔

詔曰。朕聞坤順承乾。兩儀迺以奠位。內治贊外。六合斯以蒙休。王化攸關。典禮是式。朕荷天眷。命序纘洪。

圖深惟儀刑於萬國。宜首崇位於母儀。妃周氏受命先帝。配朕潛邸。含章體順。懿範克紹。前徽率禮。蹈謙淑德。允稱作合。是用祇告天地宗廟社稷。以天啓七年九月二十七日册立爲皇后。正位中宮。於戲。佐一人以主鬯。宏開有道之長。叶三靈以永綏。益衍無疆之慶。布告中外。咸使聞知。天啓七年九月二十八日。

册封懿安皇后詔

詔曰。朕嗣承大統。丕煥新猷。凡厥典章。必稽祖制。爰溯世宗入繼之始。特崇莊肅皇后之稱。友愛篤於因心。芳聲昭於國史。聿懷前烈。豈敢或愆。敬惟皇嫂皇后發祥瑤室。正位璇宮。道合靜貞。性鍾仁孝。先皇久資內助。宗廟夙享馨香。陰教用章。徽音嗣美。是用仰參舊典。備舉隆儀。以正月二十日祇告天地宗廟社稷。恭上尊號曰懿安皇后。於戲。追龍馭於鼎湖。式重倪天之配。光鴻名於玉册。永垂奕世之麻。布告四方。所宜知悉。崇禎元年正月二十二日。

誕生太子詔

詔曰。朕惟帝王膺天庥而奉宗祧。首重元儲。尤隆世嫡。朕以眇躬。嗣服丕基。夙夜祇念我皇祖。皇考集慶發祥。源深緒遠。佇昌嗣續。仰慰貽謀。茲荷上帝居歆。宗社垂佑。以今年二月初四日第一子生。係皇后周氏出中闈。開家胤之先。萬國愜元良之祝。肆頒渥澤。覃被多方。於戲。震祥肇毓。坤元贊乾。始以凝麻。渙號鴻宣。解澤麗巽。申而布命。誕告中外。咸使聞知。崇禎二年三月初九日。

册立東宮詔

詔曰。朕惟自古帝王。嗣大厯服。長治久安。莫不首重建儲。所以定宗祧。隆國本。凝天眷而繫人心也。我祖宗列聖相承。德祚綿洽。率繇茲道。以裕貽謀。朕祇紹丕基。兢懷付託。乃荷皇穹眷佑。胤嗣蚤開。長子慈煇。睿託坤元。祥鍾震一。中外起敬承之頌。天人表協應之符。昨者文武臣名疏請再三。舉行冊禮。而朕以子方襁褓。謙讓未遑。茲屆青陽載仲之辰。正值蒼巽誕彌之月。禮官復申前請。衆志誠難固違。爰考舊章。式諏吉日。祇告於天地宗廟社稷。授冊寶立慈煇爲皇太子。以仰繩累葉無疆之緒。俯慰兆人胥戴之情。大典考成。環垓同慶。於戲。位定承乾。恩覃申巽。惟嫡惟長。萃全盛而行重熙。是錫是敷。保庶民以歸皇極。播告天下。咸使聞知。崇禎三年二月初十日。

明書卷五十六

志六

禮儀志一

史官論曰。夫禮者人治之。大聖有專經。史有專志。子思氏有言曰。非天子不議禮。善乎明太祖之詔天下也。曰。朕聞三皇立極。導民以時。庖廚稼穡。衣服始制。民居奠焉。五帝教以仁義。益未備之時。宜天下從之。民用和睦。自周至於漢唐宋。增損益周。國乃用昌。民受咸和。家用永康。朕蒙皇天后土眷命。祖宗之靈。統一天下。紀元五年。朕本草芥。失習聖經。況摧強拊順。二十餘年。居無寧日。故理道未臻。民不見化。鄉閭市里。尙染元俗。天下大定。禮儀風俗。可不正歟。茲條畫事宜。再整彝倫。恤念孤寡。務遵先王之法。顧以德薄。恩澤未孚。下民未悅。恐貽上天之怒。夙夜祇懼。若履淵冰。咨爾臣庶。體予至懷。期臻禮儀之風。永底昇平之治。已又詔翰林院作稽古定制書。先是時。禮尙書崔亮言。禮者理也。人心之理。協之以同。然卽百世可通也。故元王祭無樂。大臣無廟。仕者不奔祖父之喪。無功總之假。冠婚任俗。飲射具文。民無定志而濫。士異學而莫止。伶人道流。秉禮司頌。齊民下賤。踰格犯分。雖有洪武禮制而莫之或行。夫國無禮。猶水無坊。人無禮。猶室無基。衝嚙圯毀。夫焉有極。宜徵四方明道奧學之儒。萃於京師。準以典誥。案以三禮。參以詩

之詠歌。孔氏遺言。皆比以今法。寧要無繁。寧徑無易。裁成明典。以行之天下。垂後世範。俗同德。上善其言。令天下舉者。儒宿學博。聞通古之士。禮送京師。與纂修。而曾魯。何克寬。陶凱。胡翰。徐一夔。梁寅。周子諒等。咸集。以吉凶軍賓嘉及冠服車輅儀仗鹵簿字學樂律爲綱。凡儀度名數沿革爲目。書成。命曰大明集禮。及定郊祀典制。上曰。凡祭享之禮。載牲致帛。交於神明。費出已帑。神明歆之。如庶人陌錢。瓣香皆可格。不以菲薄而不享者。何以所得之物。皆力所致。若國家倉廩府庫。乃生民脂膏。以爲尊醪俎饌。充實神庭。徵求福祿。以私其身。神可欺乎。惟爲國爲民禱祈。如水旱疾疫。師旅之類是矣。於朝常禮成。諭中書曰。朝廷之禮。所以辨上下。正名分。不以賤加貴。不以卑踰尊。百官在列。班序有倫。奏對雍容。不失其序。非惟朝廷尊。亦天下瞻仰所在也。今百官朝參奏事。禮儀多未嫻。自今定制。不如儀者罪之。及禮官申朝儀。復諭曰。禮儀者朝廷之表。有虞時羣后德讓。百僚師師。其申諭百官。景行古人。無敗度取戾。及孝慈錄成。敕學士濂曰。養生送死。聖王之大政。諱亡忌疾。衰世之陋習。三代喪禮。節文尤詳。而散於衰周。厄於暴秦。漢唐以降。莫能議此。夫人情有無窮之變。而禮爲通變之宜。得人心之所安。卽天理之所在。其以考定喪禮。頒布之。及定天下房舍服色之等第。則諭廷臣曰。古者帝王之治天下。必定禮制。以辨貴賤。明等威。是以漢高初興。卽有衣錦繡綺縠之禁。歷代皆然。近世風俗相承。流於僭侈。閭里之民。服食居處。與公卿無異。而奴僕賤隸。往往侈肆。貴賤無等。僭禮踰度。此元之失政也。其行禁之。一日上從容謂禮官曰。禮者所以美教化而定民志。成周設大司徒。以五禮防民之僞。而教之中。夫制中莫如禮。修政莫如禮。齊家莫如禮。故有

禮則治無禮則亂。居家有禮則長幼序，宗族和，朝廷有禮則尊卑定，等威辨，元興以夷變，夏民染其風，先王之禮幾乎熄矣。而人情狃於淺近，未能猝變。今命爾稽考典禮，合於古而宜於今者，詳定之。布天下，俾習以成化。庶幾復古之制，及禮官上所定禮儀，上覽之慨然曰：禮者國之防範，人道之紀綱。朝廷所當先務，不可一日無。自元氏廢棄禮教，因循百年，而中國之禮變易幾盡。朕卽位以來，夙夜不忘，思有以振舉之。以洗滌汙俗，爾所定禮儀，今雖已成，宜更與諸儒參詳考訂，斟酌先王之典，以復中國之舊。務合人情，永爲定式。庶幾愜朕心也。於是禮官集翰林學士以下雜議，反復審慎，定爲禮。每裁定條上之，上允。乃列諸典冊。觀此則明之爲禮也可知矣。今按典制司於儀制者：首朝賀，次朝儀，次冊立，次上號，次大禮，次講讀，次軍禮，次監國，次王國，次蕃國，次冠禮，次婚禮，次宴禮，次頒降，而司於祠祭者：首郊廟，次墳陵，次羣祀，次喪禮，次雜禮。次有司應行禮，次品官，庶人四禮，列著於篇，第以增定者爲則，初儀不具。

○朝賀

正旦冬至百官朝賀儀

凡正旦冬至前一日，尙寶設寶案於皇極殿寶座之東，鴻臚司設表案二於殿東中門外。欽天監設定時鼓於文昭閣，教坊司設中和韶樂殿內東西，設大樂於皇極門內。至期，錦衣衛陳鹵簿儀仗於丹陛及墀，設朋扇於殿內，陳輦輅於皇極門墀中，金吾衛列甲士於門外，旗首衛設金鼓於午門，列旌旗於皇極門，御馬監設仗馬，馴象所設象於墀。欽天監設報時位於丹陛東，鼓初嚴，百官朝服於午門候，次嚴，百官及

進表人員四夷人等入丹墀立。欽天監預鷄唱官於文昭閣下。而將軍六員在殿內分列。又四員於丹陛四隅及侍衛將軍各分立。鳴鞭四人立於中。護衛官二十四員立丹陛南。四員立陛北。設方物及撤案。以序班十六員於丹陛左右。外贊則鳴贊十二員。立糾儀御史十二員。殿前錦衣六員。光祿四員。序班二員。傳呼鳴鞭者錦衣四員。俱列殿門外。導表六科官二員。序班二員。於表案左右。掌領侍衛官及錦衣指揮百戶。司籥者於簾下。俟捲簾畢趨出。鼓三嚴。則有殿中侍班翰林院官四員。糾儀御史四員。中書官四員。序班二員。及各遣祭官。而執事禮部堂上官。內鳴贊。設表案并舉案官。序班五員。典儀鴻臚一員。捧表禮部司官四員。展表則大卿貳二員。宣表致詞。傳制鴻臚五員。捧寶尙寶官二員。導駕六科給事中十員。俱詣中極殿外。候上具袞冕升座。鐘止序立。遣祭官以次復命訖。各趨向丹墀班內。禮部官跪奏方物。得旨復位。鴻臚卿跪奏執事官行禮。五拜三叩頭畢。鴻臚跪奏。請陞殿。駕興。導駕官前導。捧寶於前。中和樂作。上御寶座。導駕侍班及糾儀御史各序立。置寶於案分立。樂止。鳴鞭。報時鷄唱訖。外贊唱排班。班齊鞠躬。大樂作。四拜興。平身。樂止。以後凡拜樂如之。內贊進表。宣表。展表。皆跪。俯伏興。平身。宣表官退。移表案。外贊跪。衆官皆跪。代致詞。官跪於中。致詞云。公侯駙馬伯文武百官某官某臣某等。茲遇。

正旦則云三陽開泰萬物咸新。冬至則云律應黃鍾。

日當 恭惟皇帝陛下膺乾納祐。奉天永昌。賀訖。四拜。傳制官奏傳制。俯伏興。乃由東門至丹陛。東立。稱有

制外贊跪乃宣制。

正旦則云履端之慶。冬至則云履長之慶。

與卿等同之。宣訖贊俯伏興。平身。搢笏。三舞蹈跪。贊山呼。百官拱手。

加額呼萬歲。三次曰萬萬歲。樂工軍校齊聲應之。復四拜。鴻臚卿跪奏禮畢。鳴鞭。中和樂作。駕興。捧寶導駕至中極殿。樂止。引班官引百官以次出。序班撤方物案。乃設黃幄於丹陛上。陳王府勳臣總兵及四夷所進馬閱之畢。駕還宮。

冬至大祀慶成儀

舊制冬至卽行賀禮。後以分祀二郊。以冬至大報。是日行慶成禮。次日賀。

帝大祀禮成。駕還。百官具朝服立迎於金水橋南。隨至皇極殿丹墀內侍立。執事官先至殿前東西立。候上御中極殿。具袞冕服。陞座。鴻臚寺卿跪奏。執事官行禮。鳴贊贊入班。鞠躬五拜三叩頭。興。平身。各供事。遂奏請陞殿。樂作。上御皇極殿。樂止。鳴鞭。傳排班。鳴贊贊排班。班齊。鞠躬五拜三叩頭。興。平身。又贊跪。鴻臚卿於丹陛中道跪致詞云。公侯駙馬伯文武百官某官某等。恭惟園丘大報載成。禮當慶賀。畢。由東門入殿內侍立。又四拜奏禮畢。贊禮畢。鳴鞭。上還宮。百官退。

萬壽聖節朝賀儀

儀與正旦冬至同。但致詞云。恭惟皇帝陛下萬壽聖節。臣某等誠懼誠忭。敬祝萬萬歲壽。不傳制。但加設玉帛案二於殿內簾前。

凡遇大朝賀。衍聖公一班。大學士一班。尙書都御史真人一班。侍郎寺正卿一班。而詹翰除部銜入本班。開坊以上列諸少卿前。史官列光祿少卿前。庶吉士列光祿寺丞前。科道爲一班。次六部司官。後以品序。凡郊祀先期七日。聖節正旦冬至先期三日。百官具吉服於靈濟宮習儀致詞。以勳臣班首。官缺則禮部題請。俱鴻臚卿代。後以衍聖公及三氏子孫三年入賀。待以賓禮。不朝參。

中宮正旦冬至命婦朝賀儀

前期一日。女官設御座於宮中。設香案於丹墀之南。陳儀仗及女官之擎執者於御座及丹陛。丹墀。陳女樂於丹陛東西。北向。設箋案殿東門外。設司贊位於丹墀東西。司賓位於命婦班北。東西相向。命婦至宮門外。司賓引入就拜位。尙宮尙儀等詣內奉迎請陞座。皇后具服出。導從如常。樂作。陞座。樂止。司贊唱班齊。樂作。贊四拜。樂止。已後凡拜作止。皆如之。內贊唱進箋。引箋案女官前導。舉箋案女官舉案由殿東門入。樂作。至殿中。樂止。贊衆命婦跪。女官宣箋目訖。與唱宣箋。展箋女官取箋。宣箋女官宣訖。舉案於殿東。贊命婦皆興。司賓引班首陞於東階。樂作。由殿東門入。樂止。內贊唱跪。外贊唱皆跪。班首稱某夫人妾某氏等。茲遇與皇。敬詣殿下稱賀。致詞。皆以司言女言代。內外皆興。由西門出。樂作。降自西階。樂止。後四拜。司賓將旨。至於丹陛。稱有旨。跪。司言宣旨。如皇。但云與夫人等同之。興。又四拜。尙儀奏禮畢。皇后興。樂作。還宮。樂止。命婦出。

中宮千秋節命婦朝賀儀

與正旦冬至同。但致詞云。茲遇千秋令節。敬詣皇后殿下稱賀。不傳旨。○凡命婦應朝賀者。各照其夫品級。執禮部印信票。清晨由各門從便入。

東宮親王及妃正旦冬至宮中朝賀儀

凡正旦冬至日。上陞乾清宮御座。引禮引皇太子及妃。親王及妃詣上位前。贊禮贊鞠躬四拜。平身。皇太子親王皆鞠躬四拜。平身。太子妃。親王妃皆四拜。後如之。贊禮引皇太子跪致詞。後皆跪。皇太子稱長子某。茲遇履端之節。謹率諸弟某等。欽詣父皇陛下稱賀。贊俯伏與平身。皇太子等皆然。妃止四拜。興復位。

再行四拜。禮畢。○引禮引皇太子等詣中宮前禮同。但致詞云。恭詣母后殿下稱賀。畢皆出。後多不致詞。○朝太后儀多改致辭。

東宮正旦冬至百官朝賀儀

凡遇正旦冬至。典璽官設東宮座於文華殿中。錦衣陳儀仗。教坊陳大樂。府軍衛列甲士旗幟於門外。殿門及門外列將軍十二人。餘設箋案及入拜宣箋。目宣箋皆如大朝賀。止四拜。不山呼。致詞則云。某官臣某等。茲遇同皇敬惟皇太子殿下茂膺景福。賀畢。傳有令。宣令云。履端之節。同臻嘉慶。又四拜。儀禮跪啓禮畢。還宮。百官出。○千秋節同。但致詞云。茲遇皇太子殿下壽誕之辰。臣某某等敬祝千秋壽。不宣令。

東宮妃正旦冬至命婦朝賀儀

女官設東宮妃座於東宮。儀如朝中宮。但致詞云。某夫人妾某氏等。茲遇履端之節。敬詣皇太子妃殿下

稱賀。

聖節正旦冬至天下司府州縣慶祝儀

凡遇其日。各地方設黃幄龍牌於公廳。各官具朝服。行舞蹈。山呼十四拜禮。如大慶。賀告天祝壽。曰。某衙門某官臣某等。荷國厚恩。叨享祿位。皆賴天生我君。保民致治。今茲〔正旦〕〔冬至〕〔聖誕〕聖壽益增。臣等下情。無任

忻躍感戴之至。

○朝儀

朔望朝儀

凡朔望日。上服皮弁服。百官皆具公服。常朝序立於丹墀。東西相向。謝恩見辭。官序立於皇極門外北向。候上陞座。鳴鞭。贊排班。樂作。行一拜三叩頭。禮畢。樂止。鴻臚司奏謝恩見辭。行五拜三叩頭。禮畢。鳴鞭。駕還宮。百官出。初班首官出班鞠躬云。某官臣某等起居。贊禮云。聖躬萬福。後免行起居禮。

常朝御殿儀

凡蚤朝。文官自左掖門。武官自右掖門入。如中極殿朝。至鹿頂內行禮訖。就侍立位。各衙門官以次行禮。

訖不入內侍官至鹿頂外北向立鳴鞭以次出○如皇極殿朝俱於中極殿行禮奏事畢四品以上及翰林院官科道官於中左右門候鳴鞭各詣殿內序立餘官在丹墀重行北面立候朝退以次出○如先於皇極殿朝後卻奏事者文武於丹墀依序重行北向立候鳴鞭行禮訖百官如前入及立候謝恩見辭人員行禮訖鳴鞭捲班退有事奏者於皇極門或中極殿進奏無事奏者以次出失儀者監察御史面糾三品以上不面糾具本糾候旨行大朝賀不面糾

常朝御門儀

凡蚤朝鼓起百官各於左右掖門序立候鐘鳴開門進過金水橋至皇極門東西相向立候上御寶座鳴鞭行一拜三叩頭禮分班鴻臚官宣念謝恩見辭人員傳贊午門外行禮畢各衙門奏事畢糾儀無失儀者不糾鳴鞭駕輿百官出○凡午朝上御左順門先期設御座設案文武執事奏事官候駕出各序立內門五府六部翰林院官六科官俱案西序立侍班御史序班將軍俱案南北向鴻臚錦衣管將軍及侍衛立將軍西各衙門以次奏事如機密重情許赴御前奏後設記注史官四員在御座西稍南班各科臣上後令翰林官有事先羣臣奏○晚朝惟洪武時行後革

忌辰朝儀

凡遇各廟忌辰上服淺淡服御皇極門或西角門視事不鳴鐘鼓不行賞罰不舉音樂百官各具烏紗帽淺淡服烏角帶朝參後服青綠如奏祭祀奏者服紅後多輟朝參奏事

輟朝儀

凡聞皇妃喪輟朝三日發引下葬免一日親王喪三日公主喪一日至日不鳴鐘鼓不鳴鞭不設儀仗上及百官各服如忌辰服於皇極門朝參其謝恩見辭官員亦不用公服如常朝官服色。

諸王朝見儀

凡各王大朝行八拜禮常朝一拜三叩頭禮凡伯叔兄見天子在朝行君臣禮於便殿行家人禮伯叔兄坐東面西坐受天子四拜伯叔兄就於受禮位坐天子正中南面坐。

外戚朝見儀

凡皇后父見上行君臣禮后見父母行家人禮皇太子見皇后父母皇后父母東立皇太子行四拜禮皇后父母答兩拜。

諸司朝覲儀

凡天下官員朝覲至京自十二月十六日爲始鴻臚寺官陸續引見二十五日以後每常朝方面官隨京官行禮於文班序立降京官一等知府於午門外行禮正月初一大朝會以後方面官隨班知府以下在皇極門外金水橋分東西序立如常朝各行禮○凡大班糾劾朝覲考察官鴻臚引上御路法司及科道官各露章糾劾待職之罪朝覲俱俯伏免冠待罪候旨如奉旨免宥加冠叩頭連呼萬歲次日謝恩如常儀○凡獎賞廉能於會極門設御座百官先行一拜三叩頭禮內閣并吏部都察院堂上官禮部錦衣掌

印官、吏掌科、河南掌道、禮部郎中，俱於御座東面北序立。鴻臚寺官引廉能官上小礮，跪。吏部等官過跪。吏部堂上官奏後，面跪的是廉能官。見在應朝某省某等官某等若干員，奉旨引來聽候獎賞。奏知畢起。一躬入班。廉能官叩頭。候上語獎諭承旨。上又說與他每賞賜。鴻臚禮部承旨叩頭起。俱一揖。一躬引下。吏部等官過致詞云：仰惟皇上留心吏治，澤被生民，臣等不勝慶忭。叩頭稱賀畢起。一揖。一躬入班畢。駕興，各官退。

東宮朝儀

凡朔、望日，文武百官朝退。詣文華殿門外分東西侍立。候皇太子陞殿樂作。百官行一拜禮。其謝恩見辭官員亦隨班行禮畢。皇太子興入，以次出。若啓事，百官皆稱臣。

凡朝參官出入以班列。撓越者，糾儀御史參罰。

登極儀

洪武初，圜丘告祭禮成。校尉設金椅於郊壇前之東南向，設冕服案於金椅前後。望瘞畢，丞相以下於望瘞位跪奏曰：告祭禮成，請卽皇帝位。羣臣扶擁至金椅上坐。百官先排班，執事官舉冕服案寶案至前。大臣奉袞冕進至案上，丞相爲上加袞冕入班，唱排班。班齊鞠躬樂作。四拜平身樂止。以後樂之作止皆如之。班首至上前跪搢笏。百官皆跪捧寶丞相奉寶上言：皇帝進登大位。臣等謹上御寶。尙寶卿收寶訖。一拜。百官如之。復位兩拜。三舞蹈。三叩頭。三山呼。又一拜定。再鞠躬四拜。上興。百官捲班退。具鹵簿導從入。

太廟追尊仍告祀社稷。各行禮。御奉天殿。百官上表賀。先期布列各官及鹵簿儀衛五輅幢幡儀仗等各如儀。鼓初嚴。百官具朝服。次嚴。各依品從齊班於午門外。以北爲上。東西相向。通班贊禮。及宿衛等官入就位。諸侍衛各服其器服。及尙寶卿侍從官入。鼓三嚴。百官入。各就位。上袞冕陞座。大樂鼓吹振作。樂止。捲簾。安寶鳴鞭。引班官引百官北面立。樂作。至立定。樂止。唱班齊。樂作。四拜。樂止。已後樂如之。遂端表案。捧表官捧表置案上。展表官展訖。宣訖。皆跪。俯伏興。復位。四拜。三舞蹈。山呼萬歲。衆擊鼓。齊聲應之。俯伏興。平身。又四拜。賀畢。遂册皇后立皇太子。以卽位詔告天。○凡嗣位。公侯等上箋勸進者。三令旨。俞允。有定期。先一日陳設鹵簿儀仗車輅。設中和樂而不作。設雲蓋於承天門上。設雲輿於午門外。設宣讀案於承天門上。西南面。是日蚤。遣官祇告天地宗廟社稷。上具孝服。詣大行皇帝几筵。祇告受命畢。卽於奉天殿具冕服。行告天地禮。赴奉先殿謁告祖宗畢。詣大行皇帝几筵前。行五拜三叩頭禮畢。詣母后前行五拜三叩頭禮畢。詣奉天殿卽位。百官具朝服入丹墀。候鴻臚司官引執事官進至華蓋殿。行禮畢。陸殿御寶座。鳴鞭。百官上表稱賀。上命免賀。行五拜三叩頭禮畢。出承天門外。候翰林官齎詔書用寶訖。請頒詔。翰林捧詔授禮部。上還宮。詔出午門。錦衣奉入雲蓋。導至承天門開讀。如常儀。

○册立 附誕生命名

皇后册立儀

凡册立。先期設御座於奉天殿。如常儀。尙寶卿設寶案於御座前。侍儀設册寶案。册東寶西。設奉節官。承

制官奉冊官奉寶官。又預奏定正使副使。又設受冊寶褥位。餘侍班護衛鹵簿儀衛如常。禮部設龍亭儀仗。大樂於奉天門外正中。以俟迎冊寶至中宮。鼓嚴三次。陞座。捲簾。鳴鞭。報時。鷄唱。如常。禮部官捧冊寶置於案。奉制。奉冊。奉寶。及掌節官各入殿。就上位。西向立。行四拜禮。樂作。樂止如常。乃宣制。承制官宣制曰。冊妃某氏爲皇后。命卿等持節展禮。宣訖復位。唱俯伏興。奉冊寶官舉冊寶節。皆以次授受。皆搢笏跪受興。退復位。又大班四拜。遂持節前導。舉案次之。出奉天門置龍亭。官在後。節在前。初冊寶將出門。跪奏禮畢。上還。百官出。○受冊寶儀。先一日。內使陳設如常。其日設儀仗及擎執者。陳樂於殿庭。冊寶將至。尙儀奏請皇后首飾。褱衣出閣。至殿南面立。樂作。樂止俱如常儀。冊寶至宮門。使副取冊寶置門外。先設案上。前稱冊福使臣某。副使臣某。奉制授皇后冊寶。退復位。內使監令入詣皇后殿言訖。出復位。引諸命婦入就拜位。讀冊寶內官及司贊內官俱就位。引禮引冊寶使以冊寶授內使監令。各奉冊寶入詣皇后受冊位前。皇后降詣庭中。內使監令跪。以次奉。皇后跪。以次受訖。乃讀冊讀寶。收訖。尙儀奏拜興。樂作。四拜興。樂止。內使傳使副。稱皇后受冊禮畢。使副退。詣奉天殿再拜復命。跪曰。奉制冊命皇后禮畢。再拜平身退。○初。皇后受冊寶訖。陞座。引禮引內命婦班首一人詣殿中再拜跪。致詞曰。茲遇皇后殿下膺受冊寶。正位中宮。妾等不勝歡慶。謹奉賀拜興。再拜興。復位。引禮又引外命婦如內命婦儀。復位。尙儀奉禮畢。皇后降座。樂作。還閣。樂止。命婦出。○百官次日稱賀上表箋。儀同大慶賀儀。奉表後。班首官跪奉箋。內使接箋入中宮啓聞。餘如儀。○後更定先期三日。遣官祭告天地宗廟。○後增定慶賀皇太后儀。○皇后

謁告奉先殿八拜。至上前謝恩八拜。公主等及宮官四拜。上箋如常儀。親王於上位前行慶賀。次詣皇太后前。次詣皇后前。俱八拜禮。如常儀。○命婦慶賀皇太后。如慶賀皇后儀。○皇帝皇后謁廟儀。○前期。太常奏皇帝尚儀。奏皇后及妃各齋三日。內外執事官各齋一日。至期。太常光祿奏省牲如常儀。所司陳設如時。祿儀。是日有司嚴整以俟。錦衣衛備儀衛如常儀。內使監設皇帝、皇后及妃肩輿於各宮。先備輅於奉天門中。宮妃翟車於輅後。中外嚴辦。皇帝、皇后及妃各陞出宮。出奉天門陞輅。后及妃升車。內外護衛儀仗從。女官遮以幃幕。至太廟大門。皇帝降輅。皇后、妃降車。障以龍幃。導駕官導皇帝、后、妃於後寢。先是。命官捧七廟主陞神御座。至是。皇帝捧太祖。皇后捧孝慈皇后主。出陞神御座。執事官各司其事。奏就位。皇帝、后、妃皆就位。樂作。搢圭上香。出圭復位。樂止。四拜。行初獻禮。樂作。皇帝搢圭奠帛進爵。先太祖。次孝慈高皇后。出圭復位。各廟捧主官至此。皆上香奠帛獻爵訖退。奏跪讀祝。樂止。跪讀訖。樂作。俯伏興。平身。樂止。典儀唱行亞獻禮。樂作。女官事皇后。照初獻行。典儀唱行終獻禮。樂作。女官啓妃行。同亞獻。但一妃獻太祖。一妃獻高皇后。畢。樂止。皇帝飲福酒受胙。皆跪如常儀。四拜。樂作。止如常。奏禮畢。復四拜。捧帛祝燎。皇帝奉太祖神主。皇后奉高皇后神主。納櫃訖。出陞輿。凡陞輅陞輿。教坊跪奏樂。駕興。鼓吹振作。還宮解嚴。

皇妃册立儀

凡册妃與册后禮同。先期翰林院具祭文。上及皇妃各具服。率詣奉先殿行謁告禮。如常儀。畢。妃詣上前。

行八拜禮畢。詣皇太后及皇后俱八拜禮。謝恩畢。宮中設皇妃座。陳儀仗女官。俟皇妃謝恩回宮陞座。長公主、公主各親王妃行四拜禮。次引六尚女官。又次引四品以上命婦。俱行四拜禮。後定是日寅刻。上具服告於皇祖。分遣文武大臣告列聖宗廟。乃御殿行禮。

皇嬪冊立儀

凡冊嬪如冊妃儀。但宣制曰。某年某月某日冊某氏爲德嬪、賢嬪、莊嬪、麗嬪、惠嬪、安嬪、和嬪、僖嬪、康嬪。餘如儀。但不受拜賀耳。

皇太子冊立儀

凡冊立皇太子。洪武定受冊寶於殿上。宣德以後。則命使持節至文華殿授皇太子。遇冊立事。先期定官位及儀仗侍班如常。鼓三嚴。上御謹身殿。具袞冕。啓請皇太子於奉天門。具冕服。百官、僧、道、耆老人等入立班。及上御奉天殿。大樂鳴鞭。報時鷄唱訖。引進四人引皇太子入奉天門。樂作。自東階東門入。內贊接引至丹陛拜位。樂止。捧冊寶官俱入。俟皇太子兩拜。凡拜。樂作。樂止如常。遂傳制皇太子跪。宣制曰。冊長子某爲皇太子。宣畢。俯伏興。平身。復兩拜。遂授冊。受冊。授寶。受寶。俱跪。先搢圭。後出圭。俯伏興。平身。引皇太子出。樂作。復位。捧冊寶導皇太子行四拜禮。內使舁冊寶亭前導。皇太子出奉天門。樂作。樂止如常。儀仗鼓吹百官送至東宮。安奉冊寶。初皇太子禮畢降階。禮部尚書跪奏用寶。捧詔書用寶訖。赴午門開讀。由中門出奉天門。樂作。樂止如常。午門開讀。百官迎詔。至中書省頒行。執事官奏禮畢。鳴鞭。上興。樂作。還

宮樂止。○後受於文華殿。加使如册立皇后儀。○是日皇太子朝謝中宮。致詞云。小子某茲受册命。謹詣母后殿下。恭謝諸王賀東宮。致詞曰。小弟某茲遇長兄皇太子榮膺册寶。不勝忻忭之至。謹率諸弟詣殿下稱賀。百官進慶賀表箋。又進慶賀東宮箋。內外命婦慶賀中宮。遂擇日皇太子謁廟。若有梓宮在殯。則樂設而不作。明日奉先殿行禮畢。仍詣几筵謁告。若皇太子尚幼。册使捧册寶至左順門。授內臣捧入。禮皆保姆奉皇太子行。或保姆竟代。先期皆遣官祭告天地宗廟社稷如常儀。

皇太子妃册立儀

凡册立皇太子妃。前一日。內官設節册案於東宮內殿。設香案於其南。女樂儀仗如常儀。至日。正副使等官持節捧册至左順門。以節授內官。入行禮。北面立俟報。內官持節由正門入。引禮請皇太子妃具禮服。宮人執扇迎於宮門外。妃至拜位。內官置節册於案。四拜跪受册。摺圭出圭如常。興復四拜。禮畢。內官持節出。妃送出宮門外。內官報使臣禮畢。使臣復命。妃乃具禮服。詣奉先殿行謁告禮。如常儀。女官導詣宮門。上皮弁服。皇后燕居冠服。陞座。妃行八拜。禮畢。詣皇妃前四拜。回宮。詣皇太子前四拜。妃陞座。王妃公主郡主宮官應賀者。於丹墀行四拜。禮畢各退。

親王册立儀

凡册立親王。洪武初。皇帝預告太廟。及期。臨軒拜册。年幼者遣官保抱以從事。後卽日告內殿庭。遣節使就各王府册立之。罷預告。臨軒之禮。前期擇日告太廟。是日。皇太子侍立位於御座之東。餘如册東宮儀。

但宣制曰。封皇子某爲某王。禮畢。朝謝中宮。行八拜禮。謝東宮。行八拜禮。致詞曰。小弟某等。茲受封冊。謹詣皇太子殿下。恭謝親王。彼此行賀。四拜禮。百官賀諸王。行八拜禮。致詞曰。某官某等。茲遇親王殿下。榮膺冊寶。封建禮成。無任忻忭之至。次日。東宮及百官上表箋賀皇帝中宮。東宮賀中宮。東宮在上前。致詞云。長子某。茲遇諸弟某等。受封建國。謹詣父皇陛下。稱賀。中宮則曰。母后殿下。皆八拜禮。中宮受內外命婦賀。致詞云。妾某氏。茲遇親王受封建國。恭詣皇后殿下。稱賀。東宮乃受百官賀。與東宮初立儀同。

公主册立儀

凡公主册立。行禮於乾清宮。上皮弁服。中宮翟衣。遣使宣制。皆以女官。公主服九翬四鳳冠翟衣。於殿西受册畢。四拜。收册訖。詣上前八拜。中宮前八拜。次見皇妃。東宮及妃。如常儀。

皇子誕生儀

凡皇子初生三日。上親詣南郊。奏告。同日告太廟社稷。內殿及各壇廟行事。俱祭服具告文。行三獻禮。南北加太牢。餘酒果脯醢。文官五品。武官四品。隨詣南郊。文官三品。武官公侯駙馬伯皇親。仍詣內殿。各具服行禮。上御皇極殿。百官具吉服稱賀。先後行四拜禮。自誕生之日爲始。吉服十日。擇日頒詔天下。分遣翰林六科官齋捧御書。往各王府報知及朝鮮。

皇子命名儀

凡皇子生三月。欽天監擇日時。禮部同翰林院備查。欽賜過宗室名同字行者。進覽。以避重複。開擬數字。

上請簡定前期。上擇內夫人之敬慎者。以奉皇太子翦髮。前一日。上詣廟告。至日。保姆抱。遂翦髮爲髻。留角如儀。上具皮弁服。御乾清宮陞御座。皇后率妃嬪之生子者。各具服朝。行四拜禮畢。皇后侍立東面。妃嬪後。保姆抱皇子出寢。至授皇后。內贊曰。皇后率某妃嬪某氏。若皇后生。則云皇后。敢用吉日。祇見皇子上降座。命以制詞。執皇子右手。賜之名。皇后敬對畢。授保姆還寢。皇后率妃嬪復四拜。次日上御門降手敕。以皇子睿名。傳諭禮部。行宗人府。上籍玉牒。

皇女誕生命名儀

凡皇女誕生。祇告內殿。彌月卽命名。不用外衙門擇日。餘如皇子命名儀。是日宮中舉宴禮如儀。

○上尊號

皇太后上尊號儀

天子登極。奉母后或母妃爲皇太后。則上尊號。其後或以慶典推崇皇太后。則加稱二字或四字爲徽號。前期。太常官具奏致齋三日。遣官祭告天地宗廟社稷。上親告几筵。是日鳴鐘鼓。百官具朝服隨班行禮。前一日。內使於奉天門設冊寶綵輿。冊東寶西。設香亭於南。教坊設中和韶樂及大樂。不作。是日陳設如常儀。內官設太后寶座於宮中。及儀仗。女官女樂如常。設冊寶案一於皇太后座前。設皇帝拜位於丹陛上。設親王拜位於丹墀。至期。皇帝臨奉天門。捧冊寶官俟。皇帝具冕服出。置綵輿。舉輿。導駕隨冊寶陸輅。百官於金水橋南北向序立。冊寶過皆跪。過乃興。隨皇帝至思善門內降輅。百官在門外北向序立。女官

請皇太后陞座冊寶由中門進。置丹陛。皇帝拜位。左右內引禮官導皇帝由左門入。至丹陛右。內贊唱執事官各司其事。皇帝至拜位。親王等各具冕服就拜位。奏四拜。傳唱百官皆四拜。捧冊寶官由中門入。至皇太后左立。皇帝由殿左門入。至拜位。傳王及百官皆跪。搢圭奉冊寶訖。宣冊寶畢。出圭俯伏興。平身。王及百官皆如之。奏復位。奏四拜。王及百官同畢。奏禮畢。駕興。是日禮成。內官先具謁告儀物。翰林院具謁謝文。皇太后率皇后皇妃。各具服祗謁奉先殿。及几筵如常儀。謁謝禮畢。皇太后服燕居服。陞宮中寶座。儀仗女樂如常。內引禮引皇帝。皇后。皇妃。皇太子。親王。公主。及宮官。行慶賀禮如常儀。次日。外命婦四品以上入進表箋。行四拜禮。○太皇太后尊號同。○上徽號則無几筵之謁。舉大樂韶樂。上致詞曰。嗣皇帝臣伏惟皇太后陛下。功德兼隆。顯崇徽號。永膺福壽。率土同歡。而慶賀日命婦致詞云。某夫人妾某氏等。恭惟皇太后殿下。德同坤厚。允協徽稱。壽福無疆。輿情歡戴。若尊號則未立皇太子。徽號則皇太子。班親王上。其宮中慶賀如常儀。

○大禮

耕籍儀

凡耕籍。每歲仲春上戊日。祭社稷及先農。前期預告奉先殿。先二日。順天府官以耒耜及種種種進呈。少頃。內官捧出授順天府官。捧由午門左門出。置綵輿。鼓樂送至籍田所。至日。祭社稷畢。味爽。上具翼善冠黃袍。御奉天門。太常寺官請詣先農壇。上陞輦。鹵簿導從詣壇所。具服殿。更衣致祭畢。還具服殿。更翼善

冠黃袍。少憩。百官易便服。訖。太常卿奏請詣耕籍位。導上至耕籍位。南向立。三公以下從耕者各就耕位。戶部尙書北向跪進耒耜。順天府官進鞭。教坊作樂歌呼。左右贊相上乘耒三推訖。原官跪受耒耜鞭。太常奏復位。順天府官捧青箱隨種而覆之。上御觀耕臺。視三公五推。尙書九卿九推訖。奏耕畢。從耕官各就班。導上詣齋宮。上陞座。奏從耕陪祭官叩頭。奏順天府縣官老人叩導訖。引上中下農夫各十人。著本等衣鞋執農器叩頭。終畝。人賜布一疋。贊入班。百官序定。致詞云。親耕旣成。禮當慶賀。五拜三叩頭。禮畢。賜百官酒飯。鴻臚官承旨贊入班。又五拜三叩頭。尙膳監進膳。三品以上官就殿臺。四品以下官臺。下御路傍。東西向皆賜座。并宴勞耆老人等於壇傍。教坊用大樂隊。舞村田樂雜戲。跪奏致語。進酒。進湯。進膳。及百官行禮。俱奏樂如常儀。畢。入班行一拜三叩頭禮訖。駕輿還宮。○肅宗行西苑耕穫禮。及帝社稷壇春祈秋報禮。後革不列。

視學儀

凡上擇日視學。前期一日。太常備太牢牲幣祭儀。設大成樂於殿上。列樂舞於階下。錦衣設御幄於大成門東。上南向。設御座於彝倫堂。設經案於堂內左。設講案於堂內西南。至日。置經於案。設鹵簿大駕。及大樂於午門外。是日百官先詣國子監門外迎駕。分奠陪祀官具祭服。候行禮陪祀。武官自都督以上。文官三品以上。翰林官七品以上。駕從長安門出。樂設而不作。學官率諸生迎上於大成門外。跪叩頭。過。上步入御幄。具皮弁服。盥洗詣大成殿。陛下。典儀唱執事官各司其事。執事官先斟酒於爵。候上至拜位。百

官亦各就位。四配十哲兩廡分奠。官各就位。迎神樂作。樂止。上行二拜。百官同跪。拵圭奠。獻出圭。樂作。樂止。興如常儀。送神二拜。樂作。止如之。導上出。還入御幄。易常服。訖。上陞輿。由櫺星門。自太學門入。諸生先分列堂下。學官列諸生前。迎駕如常儀。上至彝倫陞御座。贊學官諸生行五拜三叩頭禮。衍聖公三氏子孫。武官都督以上。文官三品。翰林官七品以上。陞堂各以次序立。贊進講。祭酒等以次陞堂。由東小門入。至堂中。舉案授經。皆跪叩頭。就西南几榻上坐講。上賜各官坐。諸生圍立聽祭酒講畢。叩頭退。就本位。司業講如儀。凡講畢。叩頭。各官起立宣制。學官諸生跪聽。行五拜三叩頭禮。畢。先從東西小門出。列於成賢街之右。候上進茶。命光祿寺賜各官茶。畢。各官退。列於堂門外。叩頭序立。上起陞輿。由太學門出。陞輦。鹵簿大樂前導。出太學門。學官諸生跪叩頭送。上還宮。次日。百官常服行慶賀禮。致詞云。恭惟皇上敬禮先師。親臨太學。增光前烈。丕闡鴻猷。臣等欣逢盛事。禮當慶賀。明日。襲封衍聖公。率三氏子孫。祭酒司業。率學官諸生。上表謝恩。上具皮弁服。御皇極殿。百官朝服侍班行禮。上易服。御皇極門。禮部引奏。賜衍聖公等衣服。諸生鈔錠。是日。賜宴於禮部。凡陪祀官皆與宴。又明日。謝恩。上賜敕勉勵師生。祭酒捧出。至太學。開讀。再明日。仍謝恩。凡公侯伯聽講。班列學官之次。諸生之前。三氏族人立文官之次。各衙門辦事監生。回監迎駕。聽講觀禮。

大射禮儀

凡遇郊廟之祭。先期命文武官執事。行大射之禮。其儀按周禮王大射。則合諸侯之耦。其屬有射人掌張

三侯。司弓矢。掌六弓八矢之法。服不氏。掌贊張侯。以旌居乏而待獲。古大司馬。今兵部職也。今以兵部掌之。鵠七。虎鵠五采。熊鵠五采。皇太子用之。豹鵠五采。親王用之。一品二品用豹鵠。四采。三品至五品用鵠。三采。六品至九品用狐鵠。二采。文武官子弟及俊秀用布鵠。無采。又曰。容爲執旗者蔽身。設射中。五皮樹中。天子大射用之。閭中。天子宴用射用之。虎中。皇太子親王用之。兕中。一品至五品。鹿中。六品以下及俊秀。其職事設司正。掌驗射品級。尊卑人力強弱而定耦。其中否則書於算。兵部官職之。司射。掌先以強弓射鼓衆氣。武職充之。司射器官。掌辨弓分三等。驗人力授之。工部官職之。舉爵官。掌飲中者。光祿爲之。請射者。掌定耦。以次請射。執旗者。於容後中的。舉紅旗。采以采。旗西以白。東以青。過以黃。不及以黑。以軍士爲之。引禮則掌文武官進退之法。凡射先定耦。以次就射位。人三矢。同耦以齒序。勝負以多少計。貴不矜。凡天子射。則行禮而後射。射復行禮。賞罰出於一時。無定例。

策士及讀卷傳臚上表謝恩儀

凡會試放榜。於三月十五日。策士先期鴻臚設題案。殿東。光祿寺備試桌。至日蚤。禮部引貢士入丹墀序。立百官公服侍立如常。鴻臚請陞殿。上常服御皇極殿。鳴鞭。百官行叩頭禮。執事官舉題案於殿內。侍以題置殿上。貢士就拜位。行五拜三叩頭禮。各分東西立。禮部及執事舉題案。由左階置丹墀東。奏禮畢。鳴鞭。駕興。百官出。軍校列桌。禮部散題。貢士跪接。如遇雨。列兩廡。○讀卷。○殿試後二日。駕御文華殿。不用侍班儀衛。讀卷官執卷隨至門外。上陞殿。傳進各官至丹陛。行叩頭禮。入殿內。東西立。傳讀卷。爲首者至

御前朗讀訖。內侍接卷至御案。叩頭興復班。依次如儀。三卷畢。上若命再讀幾卷。或免讀。各官執卷跪接。置如儀。出丹陛。行叩頭禮畢。出門外。候上將試卷裁定。御批一甲三名。餘發內閣。上還宮。是日各官先將二甲一名以拆填黃榜。○傳臚。○至期於中極殿東置黃榜案。百官具朝服候行禮。是蚤鼓未鳴。先開左掖門。放讀卷提調執事各官入中極殿門外。候上具皮弁服陞座。各官行叩頭禮畢。進殿內供事。讀卷官拆第一卷。奏第一甲第一名某人。二三卷如之。填黃榜訖。用寶完。翰林官捧出皇極殿。候讀卷提調等官先退出。執事官行五拜三叩頭禮。導駕陞殿。作堂下樂。鳴鞭。執事官舉案於簾前。以榜授禮部官置案。各貢士就拜位四拜。奏傳制。舉榜由殿左門置丹墀御道中。贊跪。傳制官稱有制。制曰。某年三月十五日。策試天下貢士某人等若干名。第一甲賜進士及第。第二甲賜進士出身。第三甲賜同進士出身。第一甲第一名某人。二三名如之。第二甲某人等若干名。第三甲某人等若干名。傳訖。俯伏興平身。又四拜。進士分東西侍立。執事官舉榜案於皇極左門出。進士隨出。百官入班。致詞官於丹陛中致詞曰。天開文運。賢俊登庸。禮當慶賀。五拜三叩頭禮畢。鳴鞭。駕興。○上表謝恩。○設表案如常。至日。設鹵簿。駕鴻臚寺官狀元。捧表置於案。退立丹墀御道稍東。諸進士以次立。上具皮弁服御中極殿。執事官行禮。陞殿作樂。鳴鞭如常。百官朝服行禮如常儀。鴻臚引狀元及進士入班。四拜進表。宣表目。俯伏興。徹樂。狀元進士又四拜禮畢。鳴鞭。駕興。

巡狩儀

凡遇天子巡狩。以皇太子或皇太孫監國。并擇留守大臣。先期誥告天下諸司及各處鎮守督撫官。預護駕兵馬。及備辦供應。臨時上親奏告郊廟。分遣官告北郊社稷羣廟各神祇。分撥護駕總兵以下官軍。兵分五軍翼衛。設京城守門大臣及官兵。增添京城內外巡捕。及各邊文職重臣。充行邊使。閱視邊備。遴選扈從勳戚及文武官。譯字天文醫士。教坊樂官。廚役等項。俱給牙牌牌子。鑄給各官行在衙門印信。關防。戶部侍郎一員。率屬官六員。帶領太倉銀前行。整理官軍糧料。工部官同內官監官前行。督修橋道。及行宮。簾殿。凡要緊重事。達行在奏聞。餘從在京通政司封送行在。各衙門專啓請皇太子或皇太孫。事有疑礙。差人赴行在取旨。各進表箋。赴在京禮部。照常授司禮監。其特賀大禮。不係常典。原人詣行在恭進。至日。輒祭於承天門。駕出正陽門。錦衣衛設武陳駕。備輦輿儀仗等物。扈行大約用旗校八千人。百官送駕於郊外。行叩頭禮。凡經過處所。祭祖陵。皇陵。孝陵。獄鎮瀆。名山大川。先師孔子。帝王陵寢。古先聖賢。忠臣烈士祠墳。禮部預期奏聞。或親祭。或遣官。俱翰林院官撰告文。太常寺備祭品。各處撫按二司有司官。俱於管轄境上候駕。先赴行在鴻臚司報名。御駕行殿各官吉服朝見。所過軍衛官吏生員耆老人等。合迎送駕者。隨地方官後跪迎送。凡朝見行五拜三叩頭禮。過藩封處所。親王具常服出城迎接。其宗室不許擅離本府。先期命文武大臣侍於途。王道傍拱立。文武官下馬侍立左右。禮部尙書跪奏某王某恭迎聖駕。見內侍引王至駕前行叩頭禮。隨傳旨示王隨至行宮。上少憩。具冕服陞行殿。文武侍班如常儀。王由殿左門入。行五拜三叩頭禮。賜宴從官。叩頭如常儀。凡經過地方。分遣廷臣考覈守令諸官賢否。卽加黜

陟分遣官存問高年賜幣帛酒肉至巡狩處朝賀宴饗如京師儀聖駕回京百官郊外迎行叩頭禮入宮
遲上親行祭告禮於內殿餘遣官祭如初儀百官上表稱賀如常儀宴勞屬從人等賞賜鈔錠收各行在
敕印關防撤回守門巡邊各官內外解嚴

親蠶儀

凡皇后親蠶先期擇日順天府遴蠶母奏送蠶室工部具蠶具什物送給蠶母順天府將蠶種鉤筐一副
進呈訖捧出置綵輿送蠶所親蠶壇先在安定門後改建於西苑先一日設皇后採桑位於臺東向以西
爲上設公主及內外命婦採位以次訖至日蚤備兵衛儀仗及重翟車蠶公令備鉤筐內執事女樂并司
贊六尚女官等皆乘車先至壇所將明內侍奏請皇后詣先蠶壇所皇后服常服女官導引乘肩輿侍衛
如常儀公主及內命婦乘車從外命婦先入壇候皇后入壇至具服殿憩易禮服詣先蠶處祭畢禮詳祭
祀更常服司賓引外命婦先詣採桑臺位南北向女侍執鉤筐東向公主以下各就位南北向執鉤者跪
進鉤執筐者跪以筐受桑皇后採桑三條還至壇南儀門坐觀命婦採桑三公命婦採五條列侯九卿命
婦採桑九條各以筐授女侍司賓引內命婦一人詣蠶室觀蠶母飼蠶畢復命尚儀奏採桑畢皇后還具
服殿陞座尚儀奏司賓率蠶母等先行叩頭禮訖贊外命婦四拜賜命婦宴於殿內外并賜蠶母酒食於
臺傍公主及內命婦坐殿內文武二品坐殿臺上三品以下坐臺下教坊奏女樂進酒進膳進湯如儀畢
公主以下行四拜禮奏禮畢皇后輿還宮命婦退

